

Evangelio según Lucas

Jesucristo roy pjlú ère, e jyã tara Lucasdë

Kjibokwo ère sorë

Domer shäng kjlara ko Lucas. E no dwlomnega. Woyotjlikoba ga Lucas, e judío llëm wleniyo. E jëktong shäng parkë ba kjlara Pablo tjok, tak pjang Colosenses 4.14 go, Filemón 24 go, 2 Timoteo 4.11 go sorë li eni. Domer shäng kjlara obi ko Teófilo. Woyotjlikoba ga e Roma so, domer tjwłõ ara wleniyo bakoe.

Kjibokwo ère tara Lucasdë ba kjlara Teófilo kong, Jesús roy li miyde pjlú wlo. Jesús öör kjok ère kjing go judióga döga, nopga judío llëm wleniyo döga, e tara ba kong. E öör, Data Sbõ'li miyde nopga uunkongdë wlo, e tara ba kong bakoe.

1-4 Miga, Tjlapga Teófilo.

Llëbo shäryara Sbörë bi tjrëko li, e tër bop kong, miydëp wlo. Tja omĩno llëm, gueniyo nopga omĩno ara ba bokkwo go, ba soyozlong tek lëkong. Epga beno löng ba roy laga. Ga roy le lok li kuya lok ga kjone kjone tjlä ga «E jyã tëy, llëye inaba li ber wëlle wlo» le. Ga jyã tara lok beno bi kong. Ba jyã tagaga li kjlëböso, ga tjlökwö tara lok li beno bi kong kjibokwo oblë oblë go. Tjara omtë eni bakoe. Jesús roy kurorshko ga tja wotjlino ga «¿E sorëro?» loror, «Tja omkjakrokë ba miydagaga kong» loror bakoe. Ga jakrokror shäng yõtso, eeri ga öötong luyo kop arae. E kjishko ga tja wotjlino ga e jyã

tër ber bop kong beke. Miydëp e go wlo ga llëbo pinaba bop kong li, e jlõe.

«Chida buk dörö kjlara ko Juan» le Tjlapga parkaga kjok dogo so kjlararë

⁵ Tjlapga Herodes sök Judea so pjlyoshko ga tjlapga sök kjlara syöshtaga Sbö kong nopga kjishko wleniyo ko Zacarías, e Abías tjëyo. Ba boy ko Elisabet, e Aarón tjëyo bakoe.

⁶ Epga pjök li pjlo bek Sbö bokso, ba tjlökwo kole lok ÿyado.

⁷ Epga wapga llëm, Elisabet kjrong kjishko. Eshko ga epga öötong tjlabla tjän.

⁸ Dbar kjwara ga Zacarías tjëyoga parkë Sbö kong ba u roy wlo dbaryo li öötonge.

⁹ E ba sdëkwo kjishko ga jyã shira lok, ga lono Zacarías kong, opzrëk jek Sbö u roshko, llëbo lõ pjläblë suya eshko wlo.

¹⁰ Eni ga opzrëno jek öötong shäng ba llëbo lõ pjläblë li suk. E wopro ga nopga tjeng kjoko kës li beno tjeng syöshtë Sbö kong.

¹¹ Eshko ga këm kjër roshko ga Tjlapga parkaga kjok dogo so weno shäng Zacarías kong kjlara, shäng llëbo lõ pjläblë sukklo jong lishko e sor go, or këlëkong.

¹² ÿya ga beno shäng sëya llëm erä.

¹³ Eshko ga Tjlapga parkaga li tjlä ba kong ga «Zacarías, llëye bangkjрэp llëme. Llëye rokorop Sbö kong bop syö go li, e kura, ga shärye bop kong. E kjishko ga llëye bangkjрэp llëme. Llono ga bop boy, e wa buk kjlara domer. Bukshko ga koiëp Juan.

14 Eshko ga pja ber wopjlu, woowa llëme. Nopga ara ber löng wopjlu eshko bakoe.

15 Bop wa, e ber kësbang Sbö bokso. Kjillgwo bo dyo ie wlo llëm, ää dbo ara ie wlo llëm bakoe. Buk llëm obishko ga ba go Sbö Sëya tjwe ber kësbang ba tjok.

16 »Ba kjishko ga Israel tjëyoga ara wotjlik owa wleniyo, e tjwe Tjlapga, ba Sbö li kolë iröng obi.

17 Sbö Sëya ber ba tjok kësbang, beno kësbang tjlapga tek dënnashko so Elías tjok dik. Ga e jek shäng Tjlapga bäm go. Eshko ga dataga ie ber wotjlik pjlu ba wapga kong obi, nopga Sbö bangkjre llëm wleniyo, e ie ber ba tjlokwo kolë. Eni ga nopga posharye, Tjlapga wlokjre wlo» le.

18 Kuya ga tjle ba kong ga «Tja tjlabla, bor boy, e tjlabla bakoe. ¿Tjlokwo lep shäng li, e jlöre miydër sorë?»

19 «Tja Gabriel. Tja parkë Sbö kong ba bokshto. Tja ichara lan bop tjok, chida li roy pjlu söga bop kong.

20 Ga tja tjlokwo kjrorop llëm kuzong ga pja ber shäng tjle llëm äär jong tjlokwo loror bop kong li shäryono eni pjir guing» le ba kong.

21 E wopro ga nopga beno löng Zacarías koshë kjoko li wotjlik lok arae. «¿Shäng wop ara oto lëba? ¿Opshik Sbö u kjwe roy dwayo maling llëm ega?» le ëng kong eni.

22 Eshko ga opshinoshko ga tjle ga äe. Eni ga miydara lok ga llëbo ñno yoshko këm kjër roshko. Tjle ga ä e kjishko. Beno shäng tjle or goshko erä.

23 Ga ba pak shäryë Sbö kong ba u roy wlo dbaryo li pjitongshko ga to iröng obi ba ushko.

24 E irgo ga ba boy beno shäng kjlaraso llëme. Beno sök ba ushko, opshino llëm öötong moglo shkëng (5). Wotjlik ga

25 «Tja wapga llëm kjishko ga tja kong wa twe Tjlapgarë bor kong, tja wa tjokshko ga tja lëba ame wlo» le.

«Jesús buk döröe» le Sbö parkaga kjok dogo sorë

26-27 Kjoglo shäng kjlara ko María. E sök Nazaret kjokyo, e Galilea kjokyo obi. Domer miydoydë llëm obi, gueniyo tjlökwö twono José kong, orkwosmok ba tjok wlo le. José, e David tjëyo. Elisabet shäng kjlaraso llëm moglo tjershko (6) ga ba parkaga kjok dogo so ko Gabriel li ichara Sbörë María ik.

28 Eni ga Sbö parkaga li tjwe shäng ba shwoy ga tjlä ba kong ga «Miga, María. Pja woyde Tjlapgarë ara. Ba kong ga pja tjwlö ara. E shäng bop tjok» le.

29 Kuya ga woyotjlïya beno sök ara. «¿Tjölkwö le shäng eni bor kong ega?» le ba pjlúshko.

30 Eshko ga Sbö parkaga li tjlä ba kong ga «María, llëye bangkjrep llëme. Sbö ber shäng wopjlu bop tjok.

31 Pja ber shäng kjlaraso llëme. Pja wa buk kjlara domer. Bukshko ga koiëp Jesús.

32 E ber tjwlö kësbang. E kowëba Sbö Tjwlö Kësbangyo li Wa. E ie Sbö Tjwlö Kësbangyorë ber shäng Israel tjëyo pjluyo, ba pjeyo tek dënashko so David i dik,

33 ber Israel tjëyo pjluyo iyado wlo. E ber pjludbaryo li, e pjir llëme» le.

34 Kuya ga tjlä ga «¿Tja wa tjok sorë? Tja domer miydoydë llëm obi.»

35 «Bop go Sbö Sëya tjwe ber kësbang bop tjok, ga pja kjingue Sbö Tjwlõ Kësbangyo dbo lirë. Eshko ga pja ber shäng kjlaraso llëm, laga Sbörë eni. E kjishko ga chida buk li, e iak beno buk dboy Sbö kong, e kowëba Sbö Wa bakoe.

36 Lër bop kong kjrina obi ga bop pjeyo Elisabet, e tjlabla tjän ëmdë ga wa buk kjlara döröe. Lâywëba ga e wapga llëm wleniyo laraba. Gueniyo shäng kjlaraso llëm moglo tjer (6) tjän.

37 Llëye shärye Sbörë ga ä wlo drete» le ba kong.

38 Kuya ga tjlë ba kong ga «Jölö. Tja ichaga Tjlapgarë. Eni ga llëye lorop li, e miydaga ber Sbörë» le.

E irgo ga Sbö parkaga li toe.

María öör Elisabet ik

39-40 E irgo ga María to jek maling Elisabet ik. Elisabet sök Judea kjokyo dlup shwo lëkong. E sök eshko ba lanma Zacarías tjok. María öötong shäng eshko, opzrëno jek ba u roshko ga «Miga» le Elisabet kong.

41 Kuya chida buk Elisabet roshko lirë ga wiktong jlökoyo. Ga ba mekë go Sbö Sëya shrono beno kësbang ba tjok.

42 E kjishko ga tjlëno dbo go, tjlë ga «María, pja kjimtara Sbörë ara, walëga uunkong kjinmo, bop chira kjimtara ara bakoe.

43 Bor Tjlapga mekë li pja. Tjara tjwlõ llëme. ¿Tja ip tjwe llë kjïydo?

44 Bop ybö kur ga chida li wiktong jekdo bor bö roshko, wopjlú kjishko.

45 Llëye lara Tjlapgarë bop kong li tjlökwo kjro-rop. E kjishko ga pja ber wopjlú» le ba kong.

- 46 Kuya ga tjlē ga
«Tja bor Tjlapga poshräk arae.
- 47 Tja wopjlú Sbö tjok,
e bor döga.
- 48-49 Tja ba parkaga, tja tjwlō llēm wleniyo,
gueniyo ga tja ñna, tja miydara.
Llëbo shäryara Sbö Kjangyo lirē bor kong kësbanqe.
E kjishko ga eeri jek lëkong ga tja roy shdär
nopga uunkong kong.
“Walē kjwe kjimtara Sbörē kësbanq jlöe” le
ÿyado.
- E ko Eröe. E bishīya dik llëme.
- 50 Pja songe le ba bangkjruga uunkong kong ÿyadoe.
- 51 Llëbo kësbanq shärye ÿyado, e dbo ara kjishko.
Nopga opposhräk ä wleniyo, opyē woydē ber
kësbanq li,
e shdöra kjloroe.
- 52 Pjlupga këskes wleniyo,
e lona beno tjwlō ame.
Nopga wlēp wleniyo,
e poyona beno këskesē.
- 53 Nopga pjli ara wleniyo kong,
llëye woyde li, e twara ba kong pjire.
Nopga tjeng llëbo ara wleniyo,
e ichara jek or rorēe.
- 54 Shji Israel tjëyoga ber löng ba parkaga.
Shji kjimtara.
Shji songe le ÿyado.
- 55 Lara eni jlökoyo bi pjeyoga tek dënashko so kong,
Abraham kong bako,
ga shäryara eni» le.

⁵⁶ Ga María beno sök Elisabet tjok ba ushko moglo mya dik. E irgo ga tek shrono shäng iröng obi ba ushko.

Juan No Waga bukshko dbaryo

⁵⁷ Elisabet dbaryo öötongshko ga wa buk kjlara domer.

⁵⁸ Eshko ga ba mekë beno wopjläe. Roy kura nopga tjeng ba zlong bäng'li, ba pjeyogarë, ga beno löng wopjlä ba tjok eshko bakoe. Miydara lok ga llëbo shäryara Tjlapgarë pjlä ba kong.

⁵⁹ Öötong dbargwo kjwongshko (8) ga chida li söra lok, doyo jyã te wlo. «Koiëy Zacarias, ba data li ko» lara nopga löng lirë,

⁶⁰ gueniyo ga ba mekë tjlä ga «Eni llëme. E ko Juan» le.

⁶¹ Kuya lok ga tjlä ba kong ga «¿Eni ega? Pja pjeyo ko eni drete» le.

⁶² Ga tjläno lok chida data li kong or goshko, koie ber llë miyde lok wlo.

⁶³ Eshko ga ba data kjorkwang rokono kjwangna, llëbo jyã të e go wlo. Twara lok ba kong ga jyã tara ga «E ko ber Juan» le. İya nopga uunkong lirë ga beno löng yëy le erä.

⁶⁴ Jekdo eshko ga chida data li tjläno jek obi, ga Sbö poshrëra arae.

⁶⁵ Kuya lok ga yëy le uunkong lirë. Ga llëbo shäryono li, e lanyotkëba ara Judea kjokyo dlup shwo lëkong kjwang jikong.

⁶⁶ Kuya nopga löng eshko lirë ga beno löng wotjlik ara uunkong. Tjlä ëng kong ga «Jlökoyo ga Tjlapga shäng chida li tjok. ¿E kjishko ga e ber llë shäryë?» le lok eni.

Tjlapga poshrëra Zacaríasdë

⁶⁷ Eshko ga Zacarías go Sbö Sëya shrono beno kësbang ba tjok, ga tjlökwo lara Sbö Sëyarë ba kong. Kuya ga lara jekdo eshko obi. Tjlë ga

⁶⁸⁻⁶⁹ «Tjlapga, e poshrëy ara.

Shji Israel tjëyo Sbö li e.

E shrono, shji kjimte wlo, shji döya wlo bakoe.

Bi döga ichara kjlara bi kong, e kësbang,

e ba parkaga tek dënashko so David li tjëyo.

E poshrëy träk llëm e kjïshko.

⁷⁰ Tek dënashko ga tjlökwo twara beno bi kong,

lak ba tjlökwo lagagarë drete.

Tak pjang eni:

⁷¹ “Tja tjwe ber bomi döga, bomi wloyoga wloshko dwayo,

bomi woydaga llëm li wloshko dwayo bakoe.

⁷² Pjäy songe lër ÿyado.

Bor tjlökwo tworor bomi kong beno ÿyado wlo li woyojer llëme.”

⁷³ Tjlökwo lara bi tjlapga Abraham kong jlökoyo li beno jong eni.

⁷⁴⁻⁷⁵ Shji döya bi wloyoga wloshko dwayo.

Eni ga llëye bangkjrëy llëm,

dbar kjwobi go, shji löng së obishko ga

ba tjlökwo li söy ga pjlu, pjlo bek, owa llëme.

⁷⁶⁻⁷⁷ Ga pja, bor wa,

pja jek Tjlapga tjwe li bäm goshko, irbo poshäryëp shäng ba kong wleni.

E kjïshko ga pja kowëba Sbö Tjwlö Kësbangyo tjlökwo laga.

Ba tjlökwo lorop ba nopga kong li go ga

miyde lok ga owa pjang ba go li löna Sbörë
beno dret,
ga döra llëbo owa shärye löng li dbo dorko dwayo,
shdüya Sbörë ame wlo.

Lörop ba kong li, e irbo poshäryëp shäng ba kong
wleni.

⁷⁸⁻⁷⁹ Bi Sbö, shji woyde ara, shji songe le ñyado.

Miyde ga shji tjeng kjok ro sī roy wleni,
shji wolon li, e bangkjrëy arae.

Eni kuzong ga bi kong bi döga iche tjwe kjlara kjok
dogo dwayo,

kälä shjiy dlo wleni,

dba, e ie ber bi kong tjaglën wleni.

Dlo li kälä të shjiy shji löng lishko,

shji ber tjeng kjok ro sī roy ame wlo,

shji wolon li, e bangkjrëy ame wlo bakoe.

Irbo pjlú li, e pñya bi kong, shji ber löng wlëp wlo»
le.

⁸⁰ Ga chida li kun jem, ga ba wotjlík pjlú li kun
jem bakoe. Öötong kësbangshko ga öötong sök kjok
dogro no llëmshko, äär jong ba dbar opping Israel
tjëyoga kong, Sbö tjlökwo roy le ba kong wlo li
öötong guing.

2

Jesucristo bukshko dbaryo

¹ Chida li buk chirawa obishko ga pñlu kësbangyo
sök Roma kjokyo li ko Augusto. Dbar kjwara ga ba
parkagaga ichara jek ko kjrë kjok kjwang jìkong,
nopga tjeng kjlobi miyde wlo.

² E bäm goshko ga ko kjrayde eni llëm, kjre eshko
jä. Kjreshko ga Cirenio parkë sök Siria so ichaga.

³ Eshko ga nopga uunkong jek jongya ba tjlapgaga tek dēnashko so li kjokshko irōng obi, ko twē ba ko kragaga kong wlo.

⁴ Eshkoshko ga José sōk Nazaret kjokyo, e Galilea kjokyo obi. Eni ga José opshino jek ey dwayo, to jek shāng Judea kjokyo, ga öötong shāng Belén kjokyo, David weno buk lishko. To shāng eshko, David, e ba tjlapga tek dēnashko so kjīshko.

⁵ Dēnashko ga tjlōkwo twono María kong, orkwosmok ba tjok wlo le, gueniyo eshkoshko ga orkwosmoydē ba tjok llēm obi. Eni ga jek shāng ko twēshko ga María jek shāng ba tjok bakoe. Eshko ga María wloshko tjeng döröe.

⁶ Löng Belén kjokyo wopro ga María chida bukshko dbaryo li öötonge.

⁷ Ga wloshko wa buk kjlara domer, ba wa bām ĩyo. Ga popgara shwong chida popgoklo wleniyo go, ga iara beno buk öng dli ioklo bapkwō kjing go, öng tjeng lishko. Söya jek no pozlong uyo roy ga ä, shtoyo dret kjīshko.

Sbö parkagaga kjok dogo so weno löng öng dagaga kong

⁸ Eshko soshko ga öng wlēp ushko so dagaga löng kjlōbö, ber tjeng ba öng li dē ba kjokshko. Shkē ga

⁹ Tjlapga parkaga kjok dogo so weno shāng kjlara ba kong eshko, Tjlapga dbo kãä tonō lletlet pjribri löng lishko. Ĩya lok ga bangkjre lok ara.

¹⁰ Gueniyo Tjlapga parkaga li tjlē ba kong ga «līēye bangkjre mi llēme. Tja tjwe shāng llēbo roy pjlu söga bomi kong. Kuromi ga pjāy ie ber löng wopjlu trāk llēme. Kuromi ga pjāy ber wopjlu li, e ber nopga uunkong kong bakoe.

11 Lunashko ga David kjokshko ga chida buk kjlara. Chida li, e bomi döga. No pjluyo ichara Sbörë shrono buk li e. E ber bomi pjluyo bakoe.

12 Chida li miydëmi wëlä wlo ga wlëmi ga popgak iak buk öng dli ioklo bapkwö kjing go» le.

13 Jekdo eshko ga Sbö parkagaga kjok dogo so weno tjeng ara obi ba kjlara li sor go. Ga Sbö poshrëra lok ara, tjlä ga

14 «Kjok dogo ga Sbö, e poshrëya lok träk llëme.

“Pja kësbanqe” le lok ba kong.

Kjok ëre kjing go ga nopga woyde Sbörë ara li, e ber löng wopjlú ëng tjok» le.

15 E irgo ga Sbö parkagaga li to jem lok kjok dogo iröng obi. E irgo ga öng dagaga li tjlä lok ëng kong ga «Lläbo roy ichara Tjlapgarë bi kong. Eni ga shji to ik Belén kjokyo» le.

16 Eni ga jek lok shëstëng, ga tjwe löng ga chida li wlëna bë buk öng dli ioklo bapkwö kjing go. María, José, e wlëna löng eshko bakoe.

17 Chida li ñna pjir ga llëye lara Sbö parkagarë ba kong li roy shdöra lok nopga uunkong kong.

18 Kuya lok ga beno löng wotjlik arae.

19 Gueniyo Maríaara omkuno, ga beno sök kjing erä. Woyojeya llëm, söya tjeng ba pjlushko erä.

20 Ga öng dagaga lira to iröng obi, ba öng iara beno tjeng lishko. Llëye lara Sbö parkagarë ba kong li ñna lok, kura lok pjire. E kjishko ga Sbö poshrëra lok ara, tjlä ga «Sbö, pja kësbanqe» le lok eni.

Chida Jesús söra ba mekä, ba datarë Sbö u zlong bäng

21 Öötong dbargwo kjwongshko (8) ga chida li doyo jyã tara pjire. Eshko ga koiara Jesús, ko li lara Sbö parkagarë María kong, e shäng kjlaraso llëm li llëm obishko.

22-23 Ga sopono, dbar tak pjang kjok llgwekklo tara Moisésdë li go sorë ga eni.

Tjlapga tjlökwö tak pjang eni: «Wapga domerga bäm ïyo, e kje ber tjeng dboy Tjlapga kong.»* E kjishko ga chida li söra ba mekë, ba datarë jek Jerusalén kjokyo, kje ber shäng dboy Tjlapga kong wlo.

24 Tjlapga tjlökwö tak pjang eni: «Dunggwo kkring pjök, dunggwo kjwo kësks wleniyo, llëm ga dunggwo kjwo chilawa wleniyo twe Tjlapga kong kjwo pjök.»† E kjishko ga Tjlapga sëngglo li shäryara eni.

25 E dbaryoshko ga domer sök kjlara Jerusalén kjokyo ko Simeón. E domer pjlo bek, Sbö poshrëya shäng ara, Israel tjëyoga döga dbaryo li koshe sök ïyado, e goshko Sbö Sëya bakoe.

26 Pjlara ga Sbö Sëya tjlä ba kong ga «Pja wolon llëm, no pjluoyo iche le Sbörë li ïnop om go guing» le.

27 Jesús söra ba mekë, ba datarë jek Sbö u zlong bäng, llëye tak pjang kjok llgwekklo tara Moisésdë go li shärye eni wlo dbaryoshko ga Simeón ichara Sbö Sëyarë jek eshko ba koshë. Öötong löngshko ga

28 chida li ïna, ga kjrara ba wloshko, ga Sbö poshrëra ara, tjlä ga

29-32 «Borwa pjluoyo ëre ichorop,
ïya tjëyoga löng kës lirë wlo.
Ëre ber iök shjiy wleni,

* 2:22-23 Éxodo 13.2, 12. † 2:24 Levítico 12.8.

nopga judío llëm wleniyo kong.
 Bop tjëyo Israel,
 e poshrëkoba ara ba kjïshko.
 Tjlapga, tja bop parkaga.
 Llëye lorop bor kong jlökoyo li,
 e shäryorop eeri.
 Borwa döga ëre
 ïnor bor bokkwo go.

E kjïshko ga tja shinmotkë wopjlu ga pjluë» le.

³³ Lanyotke Simeóndë shäng eni li kuya ba mekë,
 ba datarë ga beno löng wotjlík arae.

³⁴ E irgo ga tjlökwö lara Simeóndë beno pjlu ba kong lok. Ga tjlä chida mekë María li kong ga «Israel tjëyoga kong ga chida ëre, e ber shäng no kjone kjone longga, ber tjwlö ame wlo, no kjone kjone poyongga, ber tjwlö ara wlo bakoe. E ber shäng llëbo jyäglö ichara Sbörë wleni, ga läywëba owa ara,

³⁵ oba wotjlík sorë ba pjluushko li igöy wëlä wlo. Gueniyo llono ga ba kjïshko ga pja ber woydë ara, pja shorkera söglorë wleni» le.

³⁶ Eshko walë shäng kjlara ko Ana, e Sbö tjlökwö laga. Ba data ko Fanuel, e Aser tjëyo. Ana, e tjlablae. Mite obishko ga orkwosmono, ga beno sök ba lanma tjok lu pjloglo kjäk (7).

³⁷ E irgo ga ba lanma shinmotkono, ga beno sök syä. Eshko ga öötong sök lu pjloglo sak kjwong kjingsho pkëng (84). Beno sök Sbö u zlong bäng Sbö poshrëk shkë dba, opshik llaw llëme. Syöshtë Sbö kong ara, ga ië llëm Sbö kong dbar kop ara bakoe.

³⁸ Eshko ga tek shrono shäng chida buk li zlong bäng. İya ga beno shäng wopjluë. Ga tjlä ga «Sbö, chida ëre ichorop borwa pjluo. E kjïshko ga tja

wopjlu bop tjok» le. Eshko Jerusalén kjokyo ga nopga tjeng ara ba pjlujo tjwe dbaryo li koshë. Ga chida li roy lara ba kong pjire.

³⁹ Tjlokwo tak pjang Tjlapga kjok llgwekklo go shärye wlo li shäryara lok pjirshko ga chida li söra José, Maríarë to jek iröng obi Galilea kjokyo, ga öötong löng ba kjokshko Nazaret kjokyo.

⁴⁰ Eshko ga Jesús kun jem, beno dbo ara, kjok miydë ara bakoe. Ga kijimte Sbörë arae.

Kjwozir Jesús sök Sbö u zlong bäng nopga kjok miydë tjok

⁴¹ Lu pjlobi go ga ba data, ba mekë, e jek lok Jerusalén kjokyo, Israel tjëyoga döktong tek Egipto kjokyo dwayo dbaryo shrëk wlo.

⁴² Ga Jesús öötong lu pjloglo sak kjwara kjingsho pjökshko (12) ga jek dbar li shrëk ba tjok bebi, sgara judíogarë sorë ga eni.

⁴³⁻⁴⁴ Dbar li shrëra lok pjir ga ba data, ba mekë, e tek löng iröng obi, ga nopga jek löng ara ba tjok. Jesús lira tek shäng ba tjokdo lara lok, miga llëm, beno shäng Jerusalén kjokyo. Jëktong lok dbar kjwarashko ga wlëya lok ba pjeyoga tjreko,

⁴⁵ gueniyo wlëna llëme. Eni ga sano jek iröng obi Jerusalén kjokyo, wlëya lok eshko wlo.

⁴⁶ Kjöshko ga wlëna lok bë sök Sbö u zlong bäng, no pinggaga kjok llgwekklo tara Moisésdë go li tjreko. E sök ba tjlokwo le lok li kuk, ga omkjakrokë jong bakoe.

⁴⁷ Kuya nopga löng lirë lok ga Jesús kjok miydë ara, llëbo jakroke kjöme li dboryara pjluë. E kjishko ga yëy le lok erä.

48 Īya ba mekë, ba datarë äär eshko ga ba wa sök nopga li tjrëko ga yëy le erä. Eshko ga ba mekë tjlë ba kong ga «Jesús, ¿pja opshäryë borwa kong kjweni ega? Tja, bop data, tjawa to löng bop wlëk. Tjawa woydë ara bop kjïshko» le.

49 Kuya ga tjlë ba kong ga «¿Tja wlëmi löng ega? ¿Tja sök bor Data ushko, e miydëmi llëmdo?» le.

50 Gueniyo tjlökwo lara li llë loklo miydara lok llëme.

51 E irgo ga tek shrono shäng iröng obi ba tjok ba ushko Nazaret kjokyo. Ga kuno sök ba mekë, ba data tjok. Llëye lara lok ba kong kës li söya eni. Ba mekëra, llëye shäryara li woyojeya llëm, söya tjeng ba pjlúshko erä.

52 Ga Jesús kun jeme. Ba kjok miydë li kun jem bakoe. «Jesús kjwe pjlú» le Sbörë, le nopgarë eni bakoe.

3

Juan No Waga shäng kjok dogro no llëmshko

1 Tiberio sök pjlú kësbangyo öötong lu pjlöglo sak kjwara kjingsho shkëngshko (15) ga Poncio Pilato sök Judea so ichaga, Herodes sök Galilea so pjluyo, ba shjiy Felipe sök Iturea so pjluyo, Traconite so pjluyo bako, Lisantias sök Abilene so pjluyo,

2 Anás, Caifás, e löng syöshtaga Sbö kong nopga kjïshko kësksëyo.

Eshkoshko ga Juan, Zacarías wa li sök kjok dogro no llëmshko. Eshko ga tjlökwo lara Sbörë Juan kong, le oba kong wlo.

3 Eni ga to jek shäng kjok buk kës Jordán diyo sor go, tjlë oba kong ga «Llëbo owa shäryëmi löng li, e owa jlöe lozĩ, ga rayozĩ, ga pjäy wër jer di roshko.

Shäryoromi eni ga owa pjang bomi go li löya Sbörë ber drete» le.

⁴ Shäryono eni, tara Sbö tjlökwo laga tek dënashko so Isaíasdë sorë li eni. Tjlëno beno eni:

«Kjok dogro no llëmshko ga ëbo tjlë shäng dbo go ga
“Irbo poshäryozi Tjlapga tjwe li kong.

Shäryozï ber beke.

⁵ Dipkwo uunkong li,

e klungyo dlingko, kjing ber bek wlo.

Dlup kësks, chilawa li,

e löngko, kjing ber bek wlo.

Irbo sjöng li,

e llgwekko, ber pjlo bek wlo.

Irbo pjlebgyoyo ara li,

e kjingako, ber kjing bek wlo bakoe.

⁶ Ga no pjluoyo iche Sbörë no döya wlo li,

e ñya nopga tjeng kjok kjwang jïkong lirë” le.»*

⁷ Eni ga nopga tjwe jong Juan shwoy ara, we jer di roshko wlo. Ga Juan tjlë ba kong ga «¡Pjãý so dgur kjoyoe! ¿Nopga owa shdüzlong dbaryo dörö lishko ga pjãý där laga ërë bomi kongdo?

⁸ Pjãý jëk pjlo beke. Miydëba e go ga llëbo owa shäryëmi löng li, e owa jlöe loromi, ga rayoromi jlökoyo. Lër bomi kong ga akkwo ëre ëmdë shärye Sbörë ber Abraham tjëyoga ga pjluë. E kjïshko ga “Tjawa Abraham tjëyoga kjïshko ga tjawa shdüya Sbörë llëme” lëmi llëme.

⁹ “Zër e” le Sbörë shäng. Kjor botjyë pjlu llëm wleniyo tjeng kës li ze jek tas, dbuya iök roy, suya wlo» le.

¹⁰ Kuya lok ga tjlë ba kong ga «¿Eni ga llëye shäryërwa?»

* **3:6** Isaías 40.3-5.

11 «Ëye shwong ko pjök ga twe kara ëye shwong llëm li kong, ëye dli tjök ga shdöya, twe ëye dli llëm li kong» le ba kong.

12 Nopga dbur töngga Roma so kong li shrono löng eshko, we wlo bakoe. Epga tjlë ba kong ga «Tjlapga no pingga, ¿llëye shäryërwa?»

13 «Pjäy ichara bomi kägäyorë dbur töng bayo kjöme li, e shimirë erö, shimi e kjinmo llëme» le ba kong.

14 Ængkjwagaga löng eshko li tjlë ba kong ga «¿Tjawa orwë llong?»

«Llëye dömi oblë shjiryo llëme. Llëye dömi dbo go llëm, jyöyotkëmi i llëm bakoe. Pjäy tjwlëkoba kjöme ga pjäy ber löng wlëp ba tjök» le ba kong.

15 Eshko ga nopga beno löng wopjlú anmoyö, ga wotjlik lok ga «¿No pjluyo ichara Sbörë shrono shäng li, e Juan kjwe lëpde?» le.

16 E kjishko ga Juan tjlë ba kong ga «Pjäy wër shäng di goshko. Gueniyo no tjwe bor irgo kjlara. Bek wlo ga tja ba drepkwota dök wlo llëm, e tjwlö ara bor kjinmo anmoyö kjishko.† Era, pjäy we iök go, ga pjäy go Sbö Sëya iche tjwe ber kësang bomi tjök.

17 Tjwe kjwlë tjök, dwla pjloyong wlo wleni. Dwla pokeshko ga dwla bo töya ber tjeng ba bap-kwo roy. Gueniyo ba kasho lira suya iök roy. Iök li pjë jong ri ri iyado, sjer llëme» le.

18 Eni ga nopga poshduna Juandë tjlökwö oblë oblë go ara, ga Sbö tjlökwö roy pjlu lara ba kong bakoe.

† **3:16 Drepkwota döga** lanyo, e tak pjang Mateo 3.11 go.

¹⁹ Eshkoshko ga Pjlu Herodes, ba shjiy boy li kjrara beno sök ba boy. Lläbo owa shäryara oblë ara bakoe. E kjishko ga wlonä Juandë ara.

²⁰ Gueniyo Juan kólara llëm, llëbo owa shäryara jek këgong, Juan iara beno shäng no shdũžlong uyo roshko.

Jesús wara Juandë

²¹ Iayde shäng no shdũžlong uyo roy llëm obishko ga Juan shäng oba wë ara. Pjlara ga Jesús jek öötong shäng eshko, ga wara Juandë jer di roshko. Wara pjir ga Jesús shäng syöshtë Sbö kong wopro ga kjok dogo roshwino beno oojong erä,

²² ga Sbö Sëya to ter kjok dogo dwayo so dung-gwo kjoyo, ga opyono sök ba go, ikoba ga wëllëe. Eshko ga ybö kuraba ter kjok dogo dwayo, tjlë ga «Bor wa li pja. Pja woydër ara. Tja wopjlú bop tjok» le.

Jesús data, kjokë, tjlapgaga tek dëna dwayo

²³ Ga Jesús lu pjloglo sak myashko (30) ga ba pak soyarae.

Jesús, e José wa lëba.

José, e Elí wa.

²⁴ Elí, e Matat wa.

Matat, e Leví wa.

Leví, e Melquí wa.

Melquí, e Jana wa.

Jana, e José wa.

²⁵ José, e Matatías wa.

Matatías, e Amós wa.

Amós, e Nahúm wa.

Nahúm, e Esli wa.

Esli, e Nagai wa.
²⁶ Nagai, e Maat wa.
Maat, e Matatías wa.
Matatías, e Semei wa.
Semei, e José wa.
José, e Judá wa.
²⁷ Judá, e Joanán wa.
Joanán, e Resa wa.
Resa, e Zorobabel wa.
Zorobabel, e Salatiel wa.
Salatiel, e Neri wa.
²⁸ Neri, e Melquí wa.
Melquí, e Adi wa.
Adi, e Cosam wa.
Cosam, e Elmodam wa.
Elmodam, e Er wa.
²⁹ Er, e Josué wa.
Josué, e Eliézer wa.
Eliézer, e Jorim wa.
Jorim, e Matat wa.
³⁰ Matat, e Leví wa.
Leví, e Simeón wa.
Simeón, e Judá wa.
Judá, e José wa.
José, e Jonán wa.
Jonán, e Eliaquim wa.
³¹ Eliaquim, e Melea wa.
Melea, e Mainán wa.
Mainán, e Matata wa.
Matata, Natán wa.
³² Natán, e David wa.
David, e Isaí wa.
Isaí, e Obed wa.
Obed, e Booz wa.

Booz, e Salmón wa.
Salmón, e Naasón wa.
³³ Naasón, e Aminadab wa.
Aminadab, e Aram wa.
Aram, e Esrom wa.
Esrom, e Fares wa.
Fares, e Judá wa.
³⁴ Judá, e Jacob wa.
Jacob, e Isaac wa.
Isaac, e Abraham wa.
Abraham, e Taré wa.
Taré, e Najor wa.
³⁵ Najor, e Serug wa.
Serug, e Ragau wa.
Ragau, e Péleg wa.
Péleg, e Heber wa.
Heber, e Selaj wa.
³⁶ Selaj, e Cainán wa.
Cainán, e Arfaxad wa.
Arfaxad, e Sem wa.
Sem, e Noé wa.
Noé, e Lamec wa.
³⁷ Lamec, e Matusalén wa.
Matusalén, e Enoc wa.
Enoc, e Jared wa.
Jared, e Malalel wa.
Malalel, e Cainán wa.
³⁸ Cainán, e Enós wa.
Enós, e Set wa.
Set, e Adán wa.
Adán, e Sbö wa.

4

Jesús tjl̄na Ärë, llëbo owa shäryë wlo le

¹ Eshko ga Jesús go Sbö Sëya jlökoyo. Eni ga tjwe iröng Jordán diyo dwayoshko ga söra Sbö Sëyarë jek öötong shäng kjok dogro no llëmshko.

² Eshko ga tjlīna Äre shäng dbargwo sak pkëng (40), llëbo owa shäryë wlo le. Dbar eshko ga Jesús iono llëme. E irgo ga pjli jonge.

³ Eni ga Ä tjlë ba kong ga «Pja Sbö Wa jlökoyo ga akkwo ëre posgos ber pjlung shosho suk pjir, uëp wlo» le.

⁴ Kuya ga tjlë ba kong ga «Sbö tjlökwo tak pjang eni: “No mär dli go dö llëme”»* le.

⁵ E irgo ga söra Äre jem öötong shäng dlup jong kjókshko dbo go, ga kjok kjwang jīkong kjrīna kjrīna li pina ba kong uunkong jekdo.

⁶⁻⁷ Eshko ga tjlë ba kong ga «Pja kjök tok, tja poshrëp wleni ga kjok uunkong ëre twër ber bop kong. Ba llëbo wolësowa tjeng kës kjwe, ba dbo ara, e ber bopoya, ga pja ber ba ichaga. E twak beno bor kong uunkong, ga twër woydë ë kong ga twër» le.

⁸ Kuya ga tjlë ba kong ga «Sbö tjlökwo tak pjang eni: “Tjlapga, bop Sbö li poshrëmirë döe. E kolomirë döe”»† le.

⁹⁻¹¹ E irgo ga söra Äre jek öötong shäng Jerusalén kjokyo, Sbö u kësbang jong lishko. Eshko ga söra jem öötong shäng Sbö u dbo go, ga tjlë ba kong ga «Sbö tjlökwo tak pjang eni:

»“Ba parkagaga kjok dogo so iche Sbörë bop dë,
pja shaya ba orkwo go,
pja dre pjë akkwo go llëm wlo.”‡

* 4:4 Deuteronomio 8.3. † 4:8 Deuteronomio 6.13. ‡ 4:9-11 Salmo 91.11-12.

E kjĩshko ga pja Sbö Wa jlõkoyo ga pja optos jer na dwayo» le.

¹² Kuya ga tjlẽ ba kong ga «Sbö tjlõkwo tak pjang eni bakoe:

»“Tjlapga, bop Sbö li tjlĩy llẽme”»Š le.

¹³ Tjlĩna Ärẽ pjir ga rayara to ey dwayo. Ga barwara ame äär jong lono jã.

Jesús ba pak soyono

¹⁴ E irgo ga Jesús to jek Galilea kjokyo iröng obi. Jek shäng Sbö Sëya dbo ara li tjok. Ga e roy shdõktong kjok eshko kjwang jĩkong.

¹⁵ Kjok kjrina kjrina ga oba pĩya judíoga syõ uyo roshko, ga poshrékoba uunkong.

Jesús shäng Nazaret kjokyo

¹⁶ Pjlara ga Jesús jek öõtong shäng Nazaret kjokyo, kuno shäng'lishko. Ga öõtong woshtozlong dbaryo ga opzrëno jek shäng judíoga syõ uyo jong eshko li roy. Eshko ga kojono shäng, Sbö tjlõkwo lè nopga tjeng li kong wlo, sgara shäng enido sorè ga eni.

¹⁷ Ga kjibokwo tara Sbö tjlõkwo laga tek dënashko so Isaíasdè li twara tjeng ba kong. Eshko ga kjibokwo li koshwina, ga lara nopga li kong. Tjlõkwo tak pjang lara li tjlẽ eni:

¹⁸ «Tja kjrara Tjlapga Sëyarë,

ba tjlõkwo roy pjlu lè oba song wleniyo kong wlo.

E kjĩshko ga Tjlapga Sëya pjang bor go.

Tja ichara

tjlẽ nopga shdung löng li kong ga “Pjãy dār malinge”,

tjlē nopga kjok ĭgö llēm li kong ga “Pjāy kjok ĭk shara”,

tjlē nopga bokrotkēba ara li kong ga “Pjāy bokrotkēba ame”,

¹⁹ tjlē nopga uunkong kong ga “Sbö nopga dār dbaryo li öötonge.”*^{*}

²⁰ E irgo ga kjibokwo li llira, twara iröng ba kjimtaga parkē shäng judíoga syö uyo roy li kong, ga sirkeno sök eshko. Eshko ga ĩya nopga löng lirē beno löng dräng erä.

²¹ Eni ga Jesús tjlē ba kong ga «Sbö tjlökwo ère kuromi li, e shäryono eeri» le.

²² Tjlē shäng ga ba kugaga löng li tjlē èng kong ga «Kjwe pjlúe. Ba tjlökwo le li, e wolēsowa» le, ga beno löng yëy le erä. Ga tjlē èng kong ga «¿Domer kjwe José wa llëmdo?» le.

²³ Kuya Jesúsdē ga tjlē ba kong ga «Llëye lēmi woydē bor kong li, e miydoror pjir tjän. ¿No dwlomnega shäng kjlara swlo ara ga shji tjlē ba kong ga “Pja no dwlomnek pjlúra pja opdwlomnes om goshko” lëy eni llëmdo? Eni ga “Pja no dwlomnek pjlúra nopga tjeng bop kjok èreshko dwlomnezong” lēmi woydē bor kong eni. “Caper-naúm kjokyoshko ga llëbo shäryorop oblē oblē ara li roy kurorwa pjire. Eni ga bop kjok èreshko ga shäryos eni bakoe” lēmi woydē bor kong eni bakoe.

²⁴ Lër bomi kong jlökoyo ga Sbö tjlökwo laga, e iëba tjwlō ara ba kjok om go lishko llëme.

²⁵ Lër bomi kong jlökoyo ga Sbö tjlökwo laga Elías dbaryoshko ga shunyo shrono llēm lu pjloglo mya kjingsho bëy, ga pjli shrono ara kjone pogo.

* **4:19** Isaías 61.1-2.

Eshkoshko ga syãpga tjeng ara Israel kjokyo, Elías sök'lishko,

²⁶ gueniyo ichara Sbörë syãpga löng eshko li kjimtë llëme. Miga ichara Sarepta kjokyo, kjok li buk Sidón kjokyo worbo go, syã sök kjlara eshko kjimtë wlo.

²⁷ Sbö tjlökwo laga Eliseo dbaryoshko ga nopga tjeng Israel tjëyoga ara poglo go swlo ara, sho an do jikong wleniyo, gueniyo poptara kjlara llëme. Miga domer Siria so ko Naamán, era poptara» le.

²⁸ Kuya nopga tjeng judíoga syõ uyo roshko lirë ga iirkono ara ba kong.

²⁹ Ga kojono lok, ga Jesús söra lok jek kjok eshko dwayo. Kjok eshko li, e pjang dlup poglo go. Eni ga söra lok jek öötong lok dlup li dbo go, dbuya lon jer töshko wlo lara.

³⁰ Miga Jesús opdöno jek ba tjrëko, ga toe.

Ä sëya pjang domer goshko ichara Jesúsde toe

³¹ E irgo ga jek öötong shäng Capernaúm kjokyo, e Galilea kjokyo obi. Ga öötong woshtozlong dbaryo ga opzrëno jek shäng judíoga syõ uyo jong eshko li roshko, ga nopga pina.

³² Tjlökwo lara jlökoyo, dbo ara go. E kjishko ga nopga löng ba kuga li beno löng yëy le erä.

³³ Eshko ga domer shäng kjlara, goshko Ä sëya kjlara. Ga Jesús ïya sëya lirë ga öö le ba kong dbo goshko, tjlé ga

³⁴ «Jesús, Nazaret so, ¿pja tek shäng borwa barwë ega? ¿Pja tek shäng borwa pjigare? Pja ë miydër pjlué. Pja iak beno shäng dboy Sbö kong» le.

³⁵ Kuya ga sëya li wlona, tjlé ga «Pja kjinkozong. Pja opkjös domer kjwe go dwayo» le. Kuya ga

domer li dbura buk töshko, gueniyo llëye owa shäryara ba kong llëme. Eshko ga opkiono ba go dwayo.

³⁶ Eni ga nopga tjeng eshko li beno löng yëy le erä. Ga tjlë eng kong ga «¿Tjlökwo kjwe llëro? Dbo ara go ga Ä säyaga iche opkjë ga kole jlökoyo» le.

³⁷ Ga Jesús roy shdöra lok kjok eshko kjwang jikong.

Simón em poptara Jesúsde

³⁸ E irgo ga Jesús opshino judíoga syō uyo li roshko dwayo, ga jek öötong shäng Simón ushko. Eshko ga Simón em buk swlo ara, wloyo kjlikdë. Eni ga nopga tjeng eshko li tjlë Jesús kong ga «Rokërwa bop kong sira ga kjwe kjimtozong» le.

³⁹ Öötong shäng ba zlong bäng ga kjlik li zenoe. Jekdo eshko ga kojono, ga dli shäryono ba kong.

Swlopga poptara Jesúsde ara

⁴⁰ Jek kjok ro zar ga nopga swlo oblë oblë wleniyo söraaba ara Jesús kong. Ga orkwo iono kjlara kjlara kjing go, ga poptara.

⁴¹ Jesús, e no pjluyo ichara Sbörë shrono shäng li miyde Ä säyaga tjeng oba goshko lirë owa llëme. Epga toshko ga tjlë löng dbo go ga «¡Pja Sbö Wa!» le. E kjishko ga ichara Jesúsde tjlë llëme.

Jesús Sbö tjlökwo roy pjlú lono judíoga syō uyo oblë oblë roshko

⁴² Wëshko kjok shröngto ga Jesús opshino jek kjok eshko dwayo, to jongya ëye llëmshko, ber sök tjoksa wlo. E irgo ga nopga to löng ba wlëk. Ga wlëna lok, ga tjlë lok ba kong ga «Pja brik llëme» le.

⁴³ Gueniyo kuya ga tjlē ba kong ga «Tja to jongya kjok shto oblē oblē, Sbō ber no pjluyo sorē li roy pjlú shdök, miydēba wlo. Tja ichak shäng e kong wlo» le.

⁴⁴ Eni ga to shäng ba lē judíoga kjokyo kjrínashko kjrínashko, judíoga syō uyo lok kjwobi li roshko.

5

Nopga mā shaga kjrara Jesúsdē doglo pkëng (4)

¹⁻³ Pjlara ga Jesús shäng di bäng buk kësbang, shkung, so dlung kjoyo ko Genesaret* li kjako. Eshko ga nopga shrono löng ara ba zlong bäng, Sbō tjlökwo kuya lok wlo, ga Jesús lliya lok ara. Eshko ga ña Jesúsdē ga kyyong tjeng do pjök di bäng li kjako, roy no llēme. Nopga tjeng ba roy li opshino tjeng ba kjla mā shakklo kwoshkwē. Eni ga Jesús opyono kyyong buk kjlara roshko, kyyong li sogo ko Simón. Eshko ga tjlē Simón kong ga «Ichos jek sira di rong shwo lëkong» le. Ga ichara jeke. Eshko ga Jesús sirkeno sök kyyong li roshko, ga nopga beno tjeng pjöshko li pīya sök.

⁴ Tjlēno pjir ga tjlē Simón kong ga «Kyyong ère ichos jek këgong sit di rong wleshko, ga bomi kjla mā shakklo kjwe dbuzĩ dishko, pjäy mā shak wlo» le.

⁵ Kuya ga tjlē ba kong ga «Tjlapga no pingga, tjawa parkono löng shkē ga mā sharorwa kjlara llēme. Gueniyo tjawa ichaga pjarē ga kjla dburwa» le.

⁶ Shäryara eni ga mā shara lok träk llēme. Shiya lokshko ga kjla li kjiyo kjone kjone skoktong tjän.

* **5:1-3 Genesaret** di bäng, e ko **Galilea** di bäng bakoe.

⁷ Īya ga dwleto ga ba pjeyoga tjeng kjylland oblē roshko li rokara or go, tek ba kjimtē wlo. Ga epga shrono, ga parkono tjē jīkong. Ba kjylland do pjōk li pito, roy dlina tjung mā erō kjīshko.

⁸⁻⁹ Ga Īya lok ga mā shara lok ara ga beno löng yēy le erä. Eni ga Simón Pedro kjōk tonono Jesús bokshoto, ga tjlē ba kong ga «Tjlapga, pja opkjōs bor zlong dwayo sira. Tja domer owa wleniyo» le.

¹⁰ Ba pjeyoga tjeng kjylland oblē roshko li beno löng eni bakoe. Tjeng kjylland oblē roshko li, epga ko Santiago, Juan. E Zebedeo wapga.

Eshko ga Jesús tjlē Simón kong ga «Llēye bangkjrep llēme. Pja to shäng mā shak ame. Pja iēr to ber shäng no töng bor kong shara» le.

¹¹ Eni ga kjylland li shira tjeng pjōshko iröng obi, ba llēbo tjeng kēs li rayara, ga to jek lok Jesús tjok.

Domer poglo go swlo ara, sho an do jīkong wleniyo poptara Jesúsde kjlara

¹² Pjlara ga Jesús öötong shäng kjok kjrinasshko ga domer shrono shäng kjlara ba shwoy. Domer li poglo go swlo ara, sho an do jīkong. Jesús Īya ga kjōk tonono, kjujono bokdo kjlay klung go, ga tjlē ba kong ga «Tjlapga, tja poptēp woydē ga tja poptēp ga pjlúe» le.

¹³ Kuya ga porwara ba orkwo go, ga tjlē ga «Pja poptēr woydē. Pja ber pjlú shara» le. Jekdo esshko ga domer li poptono beno pjlúe.

¹⁴ Eshko ga Jesús tjlē ba kong ga «Pja poptoror lēp ē kong llēme. Pja nom opping syōshtaga Sbō kong nopga kjīshko li kong, pja Īya wlo eröe. Sbō sēngglo lara Moisésde, pja äär Sbō poshrök ba usshko ga pjlú

wlo li söp, twöp ba kong, pja poptono miydëba wlo» le.

¹⁵ Gueniyo ga Jesús roy shdöktong jek këgong. E kjïshko ga shäng lishko ga oba tön löng ba shwoy ara anmoyö, ba kuk wlo, ba swlo llë li popte wlo bakoe.

¹⁶ Gueniyo olöshko ga Jesús opkwë jek shäng ëye llëmshko, syöshtë Sbö kong tjoksa wlo.

Domer dre kuga llëm wleniyo poptara Jesúsde kjlara

¹⁷ Dbar kjwara ga Jesús sök oba ping. Eshko ga fariseoga, no pinggaga kjok llgwekklo tara Moisésde li go, e shrono löng Galilea kjokyo oblë oblë dwayo, Judea kjokyo oblë oblë dwayo, Jerusalén kjokyo dwayo bako, ga sirkeno löng eshko. Eshko ga Tjlapga dbo kësbang tjeng Jesús tjok, swlopga popte wlo.

¹⁸ Eni ga domerga tjwe löng eshko kjlëbö, swlo söno kjlara poglo roshko. Swlo li buk töshko, dre kuga llëm wleniyo. Söya lok kjër roshko, ie buk Jesús bokshto wlo lara.

¹⁹ Gueniyo jek opzrëk kjone go llëm, oba ara kjïy. Eni kuzong ga jem tyono lok u dbo kjing sdok li kjing go, kjing döra sira, swlo li lona ter pjang ba poglo roshko öötong buk dew, oba ara tjrëko, Jesús bokshto.

²⁰ İya Jesúsde ga swlo sögaga li mär ba go ga tjlë swlo buk töshko li kong ga «Domer, owa pjang bop go li lönor beno drete» le.

²¹ No pinggaga kjok llgwekklo tara Moisésde li go, fariseoga löng eshko, e wotjlik lok ga «¿Kjwe ëro? İ Domer kjwe shäng Sbö läywë owa, ber tjwlo llëm wlo le! Owa löngga nopga kong li Sbö eröe» le.

22 Wotjlik lōng llē li miydara Jesúsdē pjir kuzong ga tjlē ba kong ga «¿Pjāy wotjlik owa eni ega?

23 “Owa pjang bop go li lōnor beno drete” loror ba kong. Gueniyo lōnorde, de lōnor llēm, e ĩgōmi llēme. Gueniyo ga “Pja kojōzong. Pja jēkzong” loror ba kong ga poptororde, de poptoror llēm, era ĩgōmi wēlēe.

24 Kjok ēre kjing go ga no to ter kjok dogo dwayo ēre dbo ara, owa pjang nopga go li lōn ber dret wlo ga pjluē. Miydēmi wlo ga llēbo shāryēr e» le. Eni ga tjlē swlo buk tōshko li kong ga «Ľēr bop kong ga pja kojōzong. Bop bukklo kjwe kjros, ga pja nom bop ushko» le.

25 Kuya ga kojono nopga lōng li bokshto, ba bukklo li kjrara, ga to jek ba ushko Sbō poshrēk ara.

26 ĩya nopga tjeng eshko lirē ga beno lōng yēy le erā, ga Sbō poshrēra, ga tjlē lok ēng kong ga «Eeri ga llēbo ĩydē llēm obi, e ĩnoy jlōe» le.

Leví rokara Jesúsdē

27 E irgo ga Jesús opshino to ey dwayo. Jek jēk shāngshko ga domer sōk kjlara eshko ko Leví, e dbur tōngga Roma so kong. E sōk ba pak lishko. ĩya Jesúsdē ga tjlē ba kong ga «Pja tek bor tjok, pja pin wlo» le.

28 Kuya ga kojono, ba llēbo tjeng kēs li rayara, ga to jek ba tjok.

29 E irgo ga Leví dli shāryono kēsbang ba ushko, Jesús poshrēkklo. Eshko ga oba shrono lōng ara iē, tjreko nopga dbur tōngga Roma so kong shrono lōng ara bakoe.

30 İya fariseoga, no pinggaga kjok llgwekklo tara Moisésdë go lirë ga tjlë lok Jesús oppinggaga löng li kong ga «¿Pjây ië nopga owa wleniyo tjok kjweni ega?» le.

31 Kuya Jesús dë ga tjlë ba kong lok ga «Nopga löng pjlu, swlo llëm ga e dwlomnega woydë llëme. Swlopgara dwlomnega woydë.

32 Eni ga tja shrono shäng kjok ëreshko, nopga pjlo bek li rokaga llëm, nopga owa li rokaga, llëbo owa shärye löng li, e owa jlöe le, ga raye wlo» le.

Jesús lano shji ië llëm kjïshko

33 Eshko ga tjlë lok ba kong ga «Juan oppinggaga ië llëm syöshtë Sbö kong wlo dbar kop ara. Fariseo oppinggaga omshäryë eni bakoe. ¿Bop oppinggagara ië enido ega?»

34 «Orkwosmozlong dbaryoshko ga domer orkwosmok wlo li† shäng ba tjok obishko ga nopga mak löng eshko li‡ ië llëm ga äe.

35 Gueniyo domer li söraba ba shjiryoshko ga epga ië llëm eshko jä» le ba kong.

36 Eshko ga tjlëno ba kong lok llëbo jyäglo go obi. Tjlë ga «Shji shwong tjaglën§ zëy sira, shwong këguë* bängyëy e go wlo llëme. Shäryoroy eni kjwe ga shwong tjaglën li sreya, ga shwong këguë li ber owa bakoe.

† 5:34 *Domer orkwosmok wlo* le li, e *Jesús* loklo. ‡ 5:34 *Nopga mak löng eshko* le li, e *Jesús oppinggaga* loklo. § 5:36 *Shwong tjaglën* le li, e *tjlökwo twara Sböë jlökoyo tjaglën Jesús kjïshko* li loklo. * 5:36 *Shwong këguë* le li, e *tjlökwo twara Sböë Israel tjëyoga kong jlökoyo dë* nashko li loklo.

37 »Kjillgwo bo dyo dbo ara tjaglën† tyëy ba bapkwō këguë shäryak öng kwota go‡ roshko llëme. Shäryoroy eni kjwe ga ba bapkwō 'li böptur. Eni ga kjillgwo bo dyo 'li, e ber llëno ame, ba bapkwō 'li ber eni bakoe.

38 Eni kuzong ga kjillgwo bo dyo dbo ara tjaglën tyëy wlo ga woyde bapkwō tjaglën.

39 Eye kjillgwo bo dyo dbo ara këguë 'li iono ga kjillgwo bo dyo tjaglën 'li ie woydë llëme. Eshko ga tjlë ga “Këguë 'li pjlú, tjaglën 'li kjinmo” le eni» le.

6

Woshtozlong dbaryo ga Jesús oppinggaga dwla bo kjrono

1 Woshtozlong dbaryo kjwara ga Jesús jëk shäng dwla dgak buk 'li tjrëko ba oppinggaga tjok. Eshko ga ba oppinggaga löng dwla bo kjrë, ga kjwokäya or go, ue 'lok wlo.

2 Eni ga fariseoga kjone kjone tjlë ga «¿Llëbo shäryako woshtozlong dbaryoshko llëm 'li shäryëmi löng kjweni ega?» le.

3 Kuya Jesúsdë ga tjlë ba kong ga «¿Dënashko ga David, ba yorkagaga, e pjli 'lok arashko ga llëye shäryara tak pjang Sbö tjlökwō go 'li, e 'lomirë llëmdo?

4 David opzrëno jek shäng Sbö u roshko, ga pjlung shosho suk pjir iak beno tjeng dboy Sbö kong 'li uara, ga twara ba nopga jëk löng ba tjok

† 5:37 *Kjillgwo bo dyo dbo ara tjaglën* le 'li, e *tjlökwō twara Sbö-rë jlökoyo tjaglën Jesús kjishko* 'li 'loklo. ‡ 5:37 *Kjillgwo bo dyo dbo ara bapkwō këguë shäryak öng kwota go* le 'li, e *tjlökwō twara Sbö-rë Israel tjëyoga kong jlökoyo dënashko* 'li 'loklo.

li kong, ue wlo bako, e uaga syōshtagarē erō gueniyo» le.

⁵ Ga tjlē ba kong obi ga «Woshtozlong dbaryo kägäyo li, no to ter kjok dogo dwayo ère li e» le.

Woshtozlong dbaryo ga swlo poptara Jesúsde kjlara

⁶ Woshtozlong dbaryo oblēshko ga Jesús opzrēno jek judioga syō uyo jong kjok eshko li roshko, ga nopga tjeng eshko li pina. Domer shäng kjlara eshko orkwo kēlē slosloe.

⁷ Fariseoga, no pinggaga kjok llgwekklo tara Moisésde li go, e löng eshko bako, Jesús de, swlo li popte woshtozlong dbaryore ñya lok wlo, rote e go wlo.

⁸ Wotjlīk löng llē li miydara Jesúsde pjir kuzong ga tjlē swlo li kong ga «Pja kojōs shäng nopga löng kēs ère tjrēko» le. Kuya ga shäryara eni.

⁹ E irgo ga Jesús tjlē nopga tjeng li kong ga «Pjāy kong llēbo kjakrokēr kjrina. ¿Woshtozlong dbaryo ga llēye shäryëy oblē kong ga pjlú? ¿Llēbo pjlúre, de llēbo owa? ¿Ère dbaryo ga kjlara buk ba llēmdo shinmotkē wlo ga llēye shäryëy? ¿Wëyëre, de kjimtëy?» le.

¹⁰ Eshko ga löng ba zlong bäng pjribri li ñna uunkong, ga tjlē swlo li kong ga «Pja orkwo roshwīzong» le.

Kuya ga shäryara eni, ga ba orkwo poptono beno pjlúe.

¹¹ Gueniyo ga nopga löng li iirkono ara, tjlē lok èng kong ga «¿Llēye shäryëy Jesús kjwe kong ga pjlú?» le.

Jesús domerga kjrono doglo sak kjwara kjingsho pjök (12)

¹² Eshko dbaryo ga Jesús opshino to jem shäng dlup jong kjwara bigdo go, syöshtë Sbö kong wlo, ga syöshtono shkëe.

¹³ Wëshko kjok shröng ga ba oppinggaga rokara tek löng ba zlong bäng. Eshko ga kjrara doglo sak kjwara kjingsho pjök (12), ber löng Sbö tjlökwo roy laga ba äska wlo. Epga ko lok eni:

¹⁴ Simón, e koiara beno Pedro;

Andrés, e Simón lëng;

Santiago;

Juan;

Felipe;

Bartolomé;

¹⁵ Mateo;

Tomás;

Santiago, e Alfeo wa;

Simón, e zelote;

¹⁶ Judas, e Santiago wa;

Judas Iscariote, e Jesús soynega.

Jesús nopga pino träk llëme

¹⁷⁻¹⁸ E irgo ga Jesús to ter dlup li dwayo ba oppinggaga kjrara li tjok, ga öötong löng sdam lëkong. Eshko ga nopga tjeng träk llëm, opping ba tjok wlo. Nopga shrono löng ara ba kuk wlo, ba swlo llë li popte wlo bakoe. Shrono löng li, e Judea sopga, Jerusalén sopga, Tiro sopga, Sidón sopga bakoe. Tiro kjokyo, Sidón kjokyo, e tjeng dlung sor go. Eye tjeng eshko goshko Ä sëyaga ga e poptara Jesúsdë.

19 Eshko ga ëye ba shwong porwono ga poptono ba dbo kësbang go. E kjĩshko ga uunkong wotjĩk'lok ba porwë'le.

Llëye shäryëy, shji ber löng wopjłú wlo

20 Eshko ga ba oppinggaga ĩya Jesúsdë ga tjlë ba kong ga

«Nopga song wleniyo,
pjäy ber wopjłú,
Sbö ber bomi pjłuyo kjĩshko.

21 Pjäy löng pjli ara wleniyo,
pjäy ber wopjłú,
łlono ga pjäy ber löng bö tjung kjĩshko.

Pjäy löng slar ëë wleniyo,
pjäy ber wopjłú,
łlono ga pjäy ber löng jar kjĩshko.

22 Pjäy ĩywaba shjiktëng, pjäy wlokrëba llëm, pjäy
łäywëba owa, bomi ko e owa lëba, shäryëba
eni no to ter kjok dogo dwayo ëre kjĩshkoshko
ga
pjäy ber wopjłúe.

23 Eni ga pjäy äär kjok dogoshko ga pjäy potjwlën
ara. E kjĩshko ga shäryëba owa bomi kong
enishko ga pjäy woydë llëme. Pjäy ber
woowa llëm dey. Sglik lëmi, öö lëmi ara, pjäy
löng wopjłú kjĩshko bakoe.
Dënashko ga Sbö tjlökwo lagaga shdunaba eni
bakoe.

24 Gueniyo ga pjäy nopga dbur ara wleniyo,
pjäy song jló,
łlono ga pjäy löng pjłú dbaryo'li pjitong kjĩshko.

25 Pjäy löng bö tjung wleniyo,
pjäy song jló,

Ilono ga pjây ber löng pjli ara kjîshko.
 Pjây löng jar wleniyo,
 pjây song jlô,
 Ilono ga pjây ber löng slar ëë kjîshko.

²⁶ Pjây poshrëkoba arashko ga
 pjây song jlôe.
 Dënashko ga nopga to löng tjlê ga “Tja Sbö
 tjlökwo laga” le, gueniyo ichaga Sbörë llëme.
 Eshko ga epga poshrëraba ara bakoe.

Bi moskwoga woydëy ara

²⁷ »Gueniyo ga lër pjây bor kuga li kong ga bomi
 moskwoga woydozî ara. Eye, pjây ïywa shjiktëng ga
 kong llëbo shäryozî pjlu dey.

²⁸ Eye wotjlîk owa bop tjok ga pjây wotjlîk pjlu ba
 tjok. Eye, pjây bokrotke ga pjây syöshtë Sbö kong
 ba kjîshko dey.

²⁹ Pjây kwomso shpora oblërë pjlara ga kalëkong
 twëmi ba kong, shpoya wlo bakoe. Bomi shwong
 kop lëkong döra ga bomi shwong ter lëkong twëmi
 ba kong bakoe.

³⁰ E pogo tjwe bomi shwoy llëbo rokë ga twëmi
 ba kong. Llëbo döra bop shjiryo ga wëyë.

³¹ Pjây llëbo shäryos oblë kong, woydëmi ga
 shärye lok bomi kong sorë ga eni.

³² »¿Bomi woydagaga woydomirë dö wleni ga
 pjây potjwlëkklo llë lëmiro? Nopga owa ëmdë ga
 omshäryë e kjoyoe.

³³ ¿Bomi kjimtagaga kjimtomirë erö ga pjây
 potjwlëkklo llë lëmiro? Nopga owa ëmdë ga
 omshäryë e kjoyo bakoe.

34 ¿Dbur poskwomi, tjwlõ shimi iröng wlo dö ga pjây potjwlëkklo llë lëmiro? Nopga owa ëmdë ga omshäryë e kjoyoe.

35 Eni llëme. Nopga kong llëbo shärye Sbörë pjlu bako, “Tja kjimtara Sbörë” le llëm gueniyo. E kjishko ga bomi moskwoga woydozi ara. Llëbo shäryozï pjlu ba kong. Dbur poskwözi oba kong, ga tjwlõ shimi llëme. Eni ga bomi potjwlëkklo ber kësbange. Ga pjây ber löng Sbö Tjwlõ Kësbangyo li wapga jlökoyo.

36 Pja songe le bomi Datarë oba kong. Pja songe lozi oba kong eni bakoe.

«No oblë llëbo owa shäryono» lëy ë kong llëme

37 «“No oblë llëbo owa shäryono” lëy ë kong llëme. Eni ga “Pjây llëbo shäryono owa” le Sbörë bomi kong llëm bakoe. “Pja shdungko” lëy ë kong llëme. Eni ga “Pjây shdungko” le Sbörë bomi kong llëm bakoe. Llëbo shäryara oblërë bomi kong owa li iozi ber tjwlõ llëme. Eni ga owa pjang bomi go li löya Sbörë ber dret eni bakoe.

38 Oba sëziã. Eni ga pjây sëya Sbörë bakoe. Pjây kong llëbo twe bayo ara, so resgwo bapkwo tjung kjoyo, resgwo bapkwo li roshko resgwo yoroy, kjing lliy or go, sigwo yoy ber lliktëng wlo, kjing goshko iëy jek obi, ber tjung kjopkwo shopte jong om go wleni. Shäryëmi oblë kong sorë ga shärye Sbörë bomi kong eni bakoe» le.

39 E irgo ga tjlëno ba kong llëbo jyäglo go obi. Tjlë ga «Nopga tjeng do pjök kjok igö llëm wleniyo. ¿Kjlara wlosöya ba kjlara lirë le ga lon jer tjeng pjöyikong pjlebgo kjwaraso roy llëmdo?

⁴⁰ Oppinggaga tjwłõ ara, ba pingga kjinmo llëme. Gueniyo ga oppino pjirshko ga äär ber ba pingga dik.

⁴¹ »Bomi kjlara bok bäng kjor pjloyo ïmi kjër. E wopro ga bomi bok roshko kjorkwang buk kjwangna li ïgömi llëme. ¿Shäryëmi eni egaro?

⁴² ¿Kjorkwang buk bomi bok roshko li ïgömi llëm ga “Kjor pjloyo buk bop bok bäng kjwe shir bop kong” lëmi bomi kjlara kong sorëro? ¡Pjây Sbö tjłõkwo söga jlõkoyo lëmi, gueniyo pjây wotjlik owa bomi pjłushko! Kjorkwang buk bomi bok roshko li shizĩ bäm go. Enira kjor pjloyo buk bomi kjlara bok bäng li ïgömi wëlä, shimi ba kong wlo.

Kjor, e sorë miydëy ba bo go

⁴³ »Kjor doyo pjłú ga botjyë ga owayo drete. Kjor doyo owa ga botjyë ga pjłúyo dret bakoe.

⁴⁴ Kjor, e sorë miydëy ba bo go. Kjor bo kjrëy shklik doyo go llëme. Kjillgwo bo kjrëy shkõ sho doyo go llëm bakoe.

⁴⁵ No pjłú ga tjłë pjłú, wotjlik pjłú ba pjłushko kjishko. No owa ga tjłë owa, wotjlik owa ba pjłushko kjishko bakoe. Lläbo tjeng bomi pjłushko lomirë bomi kjamo go.

U shäryëy sorë

⁴⁶ »Pjây tjłë bor kong ga “Pja bor Tjlapga jlõkoyo” lëmi, gueniyo tja kolëmi llëme. ¿Shäryëmi eni egaro?

⁴⁷⁻⁴⁸ Eye tjwe bor shwoy, tja tjłõkwo kuya, ga llëye loror li shärye ga e so domer u ywaga kjlara kjoyoe. U shäryarashko ga shwleyo pjłona rong, ga ak iara ba so bäng pjribrie. Shäryara pjir ga di to jer, pjono u li goshko ga to wito llëm, u li shäryara pjłú kjishko.

49 Gueniyo ëye, tja tjlökwo kuya, ga llëye loror li shärye llëm ga e so domer u ywaga oblë kjoyoe. U shäryarashko ga ba shwleyo pjlonu uriso, rong llëme. Shäryara pjir ga di to jer, pjono u li goshko ga skwara pjir, söra dirë drete» le.

7

Ëngkjwaga kägäyo parkaga poptara Jesúsde kjlara

¹ Jesús tjlëno oba kong pjir ga opzrëno jek öötong shäng Capernaúm kjokyo.

² Domer sök kjlara eshko, e Roma so, e ëngkjwagaga ara kägäyo bakoe. Domer li parkaga tjwlëk shäng pjir wleniyo buk kjlara, woyde ara wleniyo, e swlo ara, wolontoe.

³ Ga Jesús roy kura ba kägäyo lirë, ga judío tjlapgaga kjokllgwega wleniyo ichara kjlëbö, Jesús rokë, ba parkaga li poptë wlo.

⁴⁻⁵ Öötong löng Jesús shwoy ga tjlë ba kong ga «Tjlapga, rokërwa bop kong ga domer li kjimtos sira. E judío bishīya dik llëm, gueniyo bi tjëyoga woyde ara. Tjawa kong syō uyo shäryara kwara om go. E kjimtako jlë» le.

⁶ Kuya ga to jek ba tjok.

Jek löng ääto ba ushko ga ëngkjwaga kägäyo li, ba pjeyoga ichara kjlëbö, lan Jesús kong obi wlo. Öötong löng ba shwoy ga tjlë lok ba kong ga «Domer li tjlökwo ichono bop kong. Tjlë ga “Tjlapga, pja tek bor ushko llëm ga bue. Tja llëno llëm, tjwlö llëm, pja opzrëk tek bor u roshko wlo.

⁷ Pja ñnor jek om go bop shwoy llëm e kjishko. Bor parkaga poptë lëp erö ga poptë dani.

8 Tja kägäyo tjok. Llëye le bor kong li shäryër eni İyado. Tja ëngkjwagaga ara kägäyo. Llëye lër ba kong li shärye lok eni İyado bakoe. 'Pja nomo' lër kjlara kong ga toe. 'Pja tegö' lër kjlara kong ga teke. Bor parkaga tjwlëk shäng pjir wleniyo ichër llëbo shäryë ga shärye eni" le bop kong eni» le.

9 Kuya ga beno shäng yëy le erä. Ga nopga jëk löng ba tjok li İya ga tjlä ba kong ga «Lër bomi kong ga domer, e mär bor go jlökoyo, Israel tjëyoga uunkong kjinmo» le.

10 E irgo ga domerga ichara li öötong löng ëngkjwaga kägäyo li ushko iröng obishko ga ba parkaga swlo ara li wlëna shäng pjlu tjän.

Syã wa shinmotkono woshrara Jesúsdë kjlara iröng obi

11 E irgo ga Jesús jek shäng jongya kjok ko Naín, ba oppinggaga tjok. Oba jek löng ara ba tjok bakoe.

12 Jek löng ääto eshko ga shinmo sökoba jek pjang kjlara, iëba sakshko wlo. Shinmo li meyo, e syã, ga wa domer oblë drete. Kjok eshko sopga jek löng ara ba yorkë.

13 İya Tjlapga Jesúsdë ga songe le, ga tjlä ba kong ga «Pja slar ame» le.

14 E irgo ga jek öötong shäng shinmo li zlong bäng ga ba bapkwo söya lok pjang li porwara. Ba sögaga jek löng li slongtëng löng. Eshko ga Jesús tjlä shinmo li kong ga «!Dwlas, lër bop kong ga pja kojözong!» le.

15 Ga shinmo li wloktëng sök, ga tjläno. Eshko ga ichara Jesúsdë to iröng ba mekë tjok obi.

16 İya löng lirë ga bangkjre lok träk llëme. Ga Sbö poshrëra lok ara. Tjlä lok ga «Sbö tjläkwo laga weno

shäng bi tjrëko kjlara kësbange» le. Ga tjlë'lok obi ga «Sbö shrono shäng, ba nopga kjimtë wlo» le.

¹⁷ Jesús roy shdöktong Judea kjokyo kjok kjwang jïkong, kjok shto oblë oblë ber tjeng ba worbo go bakoe.

Juan No Waga

¹⁸ E irgo ga llëbo shäryak eni'li, e roy kura Juandë pjir, laga ba oppinggagarë ba kong. Eni ga ba oppinggaga rokara ba shwoy do pjök,

¹⁹ ga ichara tjlë Tjlapga Jesús kong ga «¿No pjlyuo iche le Sbörë koshërwa löng'li pjare, de oblë koshorwarë?» le.

²⁰ Eni ga öötong löng Jesús shwoy ga tjlë ba kong ga «Tjawa ichara Juan No Wagarë tjlë bop kong ga “¿No pjlyuo iche le Sbörë koshërwa löng'li pjare, de oblë koshorwarë?”» le lok ba kong eni.

²¹ Jekdo eshko ga nopga swlo oblë oblë wleniyo, nopga goshko Ä sëyaga, e poptara Jesúsde ara. Ga nopga kjok ïgö llëm wleniyo poptara ara, beno löng kjok ïgö pjluë.

²² E irgo ga Jesús tjlë Juan oppinggaga li kong ga «Llëye ïnomi, kuromi li to lëmi Juan kong. Nopga kjok ïgö llëm wleniyo kjok ïnoe. Nopga jëk llëm wleniyo jëktonge. Nopga poglo go swlo ara, sho an do jïkong wleniyo poptonoe. Nopga kjok kugö llëm wleniyo kjok kunoe. Shinmoga woshrono iröng obi. Nopga song wleniyo kong Sbö tjlökwo roy pjluë lak ba kong.

²³ Eye mär bor go, ga tja raye llëm ga era ber sök wopjluë» le.

²⁴ Epga toshko ga Jesús tjlëno oba kong Juan kjïshko. Tjlë ga «¿Pjãy jek löng kjok dogro no

llēmshko, Juan ĩkshko ga pjāy äätē eshko llēm obishko ga domer, e kjwe sorē loromi? ¿E sjro bakwara pjlukdē wleni loromire?

²⁵ ¿Eni llēm ga e kjwe sorē loromi? ¿E doyono shäng shwong wolēsowa, tjwlō ara wleniyo go loromire? Miydēmi pjlu ga nopga dbur ara eniyo löng pjlu ushko.

²⁶ ¿Eni ga e kjwe sorē loromi? ¿E kjwe Sbō tjlōkwo laga loromire? E jlōe. Ga e tjwlō ara, Sbō tjlōkwo lagaga oblē kjinmo.

²⁷ Sbō tjlōkwo tak pjang li goshko ga Sbō tjlēno Juan kjīshko. Tjlēno beno eni: “No ichēr kjlara bop bām go, bop roy laga, irbo poshāryē bop kong wlo.”*

²⁸ Lēr bomi kong ga nopga uunkong kjok ēre kjing go äätē tjwlō ara, Juan kjinmo llēme. Eni gueniyo ga nopga löng Sbō sök no pjluoyoshko kjlobi li tjwlō ara, Juan kjinmo» le.

²⁹ (Jesús tjlōkwo kugaga uunkong, nopga dbur tōngga Roma so kong ēmdē ga tjlē ga «Sbō tjlōkwo, e beke» le, optwono Juan kong, we jer di roshko li kjīshko.

³⁰ Gueniyo ga fariseoga, kjok ĩlgwekklo tara Moisésdē li miydagaga pjlu wleniyo, era optwono Juan kong, we wlo llēme. E kjīshko ga Sbō tjlōkwo kjrara lok llēme.)

³¹ Ga Jesús tjlē obi ga «Eerishko dbaryo soga, ¿pjāy so llē kjoyo lēr bomi kong?

³² Pjāy so kjwozirga öö le löng ěng kong llēbo soynezlōng shtoyoshko tjör kjoyoe. Tjlē lok ga »“Tjawa dbonmo bakwono ga

* **7:27** Malaquías 3.1.

bëyotkoromi llëme.

Tjawa tono tēkwo woydoklo ga
pjây slatong llēm bakoe” le lok eni.

³³⁻³⁴ »Lër ega lër bomi kong. Juan No Waga shrono shäng ga iono llēm Sbö kong dbar kop ara, ga kjillgwo bo dyo iono llēm bakoe. Eshko ga “Kjwe goshko Ä sëya kjlara” loromi. E irgo ga no to ter kjok dogo dwayo ëre shrono ga tja ië ara, tja kjillgwo bo dyo ië bakoe. Eni ga “Domer kjwe ië sïyo, nelötkë äe, jëk nopga owa wleniyo tjok, ië nopga dbur töngga Roma so kong li tjok bakoe” lëmi eni. Lër bomi kong ga pjây so kjwozirga löng li kjoyo e kjïshko.

³⁵ Sbö kjok miydë li, e jlöe miydëba ba sögaga li go» le.

Fariseo ko Simón

³⁶ Fariseo shäng kjlara. Pjlara ga Jesús mana jek ba ushko ië, ga Jesús jek öötong sirkeno sök ië ba tjok eshko.

³⁷ Kjok eshko ga walë shäng kjlara, llëbo owa shäryaga wleniyo. Kuya ga Jesús sök ië fariseo li ushkosshko ga jek öötong shäng eshko, wloshko poshtikklo bapkwö tjlwö ara, roshko poshtikklo lö pjlëblëe.

³⁸ Öötong shäng Jesús zlong bäng ga slar ëëe. Ba boryo li tjöno Jesús dre kjing go, ga döya sök ba käkzong go. Eni ga ba dre li lö shira, ga kjing go poshtikklo li kwona.

³⁹ İya fariseo, Jesús maga lirëshko ga wotjlik ga «Domer kjwe Sbö tjlökwo laga wleniyo jlökoyo kjwe ga walë sök ba porwë kjwe owa miydara pjire» le.

⁴⁰ Fariseo li ko Simón.

Eni ga Jesús tjlē ba kong ga «Simón, tjlökwo lër woydē bop kong sira» le.

Kuya ga tjlē ba kong ga «Tjlapga no pingga, lozong» le.

⁴¹ Eshko ga tjlē ba kong ga «Pjlara ga nopga tjeng do pjök, pogo tjwlō dbur poskwongga wleniyo kong. Kjlara pogo tjwlō ba kong bayo domer parkē dbargwo sak dbāw pjloglo shkēng (500) āska wleni. Kjlara obi pogo tjwlō ba kong bayo domer parkē dbargwo sak shkēng (50) āska wleni.

⁴² Ga potjwlēya lok ga ä kuzong ga dbur poskwongga li tjlē ba kong lok ga “Wēyē, tja potjwlēmi ame” le. ¿Eni ga kjone dey ga e woyde ara anmoyō?»

⁴³ «Bor kong ga kjlara pogo tjwlō ara, potjwlēkklo ame li e» le.

Kuya ga tjlē ba kong ga «Lēp li eni jlōe» le.

⁴⁴ Eni ga walē li iya ga tjlē Simón kong ga «Walē kjwe izong. Tja shrono tek shäng bop u roshkoshko ga tja kong di tworop, tja dre shkwē e go wlo llēme. Gueniyo bor dre pōra kjwerē ba boryo go, ga dona ba kākzong go.

⁴⁵ Tja wlokjroropshko ga tja lõ shirop llēme. Gueniyo tja shrono tek lēkong ga bor dre lõ shiya kjwerē wop sit wop site.

⁴⁶ Kjyo kwonop bor dlu kjing go llēme. Gueniyo poshtikklo kwona kjwerē bor dre kjing go.

⁴⁷ E kjīshko ga lër bop kong ga owa pjang ba go ara li lõnor beno drete. E kjīshko ga tja woyde ara anmoyō. Gueniyo ēye kong, owa pjang ba go li lõnor sira dö ga tja woyde ara anmoyō llēme» le.

⁴⁸ E irgo ga Jesús tjlë walë li kong ga «Owa pjang bop go li lõnor beno drete» le.

⁴⁹ Eshko ga nopga mana tjeng ië ba tjok li tjlë ëng kong ga «¿Kjwe ëro? ¿Owa pjang oba go li lõya sorë?» le.

⁵⁰ Gueniyo ga Jesús tjlë walë li kong ga «Pja mär bor go kuzong ga pja döktonge. Pja nom wopjlú bop ushko» le.

8

Walëga Jesús kjimtaga

¹ E irgo ga Jesús jëk to shäng kjok kjrina kjrina, ga Sbö ber no pjluyo sorë li roy pjlú le shäng oba kong. Ga domerga kjrara doglo sak kjwara kjingsho pjök (12) li jek lõng ba tjok,

² walëga jek lõng ba tjok kjlëbö bakoe. Walëga li bäm goshko ga kjone kjone swlo oblë oblë, kjone kjone goshko Ä sëyaga, ga poptara Jesúsde beno pjlúe. Kjlara ko María Magdala so. Dämärshko ga Ä sëyaga tjeng ba goshko doglo kjäk (7) li ichara to uunkong.

³ Kjlara obi ko Juana, e Cuza boy. Cuza, e parkë shäng Herodes kong, ba llëbo daga. Kjlara obi ko Susana. Jesús kjimte walëga lirë lõng, ba dbur baña li go.

Dwla sguingga

⁴ Pjlara ga oba shrono kjok shto oblë oblë dwayo ga töno ara Jesús sök lishko. Eshko ga Jesús tjlëno ba kong llëbo jyäglo go. Tjlë ga

⁵ «Domer shäng kjlara dwla sguingga. Pjlara ga opshino to jek dwla sguing. Sguñyashko ga kjone

kjone lono tjeng irbo bäng, ga shglëraba, uara sënwarë drete.

⁶ Kjone kjone lono tjeng ak ara tjrëko. Gueniyo klung sho li shglëk llëm kjĩshko ga dwla li wenoshko ga danoe.

⁷ Dwla kjrina obi, e lono tjeng shkö sho roshko, ga wenoshko ga llgwĩna drete.

⁸ Dwla kjrina obi, e lono tjeng klung sho pjlú kjing go, ga kuno, botjyono pjlúe. Kjoneshko ga sok kjwara botjyono kjwo sak dbäw (100)» le.

E irgo ga tjlë ba kong jek sira obi ga «Ëye kwomgwo tjok ga woyde ga kuya yõtso» le.

Jesús tjlëno llëbo jyãglo go erä ega

⁹ E irgo ga Jesús oppinggaga tjlë lok ba kong ga «Rokërwa bop kong sira ga llëye lorop llëbo jyãglo go li, e llë loklo pjlollgwes borwa kong, miydërwa wlo» le.

¹⁰ Kuya ga tjlë ba kong ga «Sbö ber no pjluyo sorë li roy miydaydëba llëm li pinaba bomi kong, miydëmi wlo. Gueniyo nopga oblë kongda, lër llëbo jyãglo go erä. Eni ga

»“Ïya löng ga llë ïyde miyde lok llëm,

kuya löng ga llë loklo miyde lok llëm bakoe.”*

Dwla sguingga lanyo, e llë loklo lara Jesúsdë

¹¹ »Dwla sguingga lanyo, e llë loklo lër bomi kong. Dwla li, e Sbö tjlökwo loklo.

¹² Dwla lono irbo bäng li, e ëye Sbö tjlökwo kuno li loklo. Gueniyo Ä tjwe eshko, ga döya ba pjlúshko dwayo, tjlökwo li kjre llëm wlo. Eni ga epga dár llëme.

* **8:10** Isaías 6.9.

¹³ Dwla lono ak ara tjrëko li, e ëye tjlökwo li kuno ga beno shäng wopjlú li loklo. Gueniyo tjlökwo li äär ber ba pjlúshko jlökoyo llëm kjïshko ga tjlökwo li kjre dbar kjwöbö erä. E irgo ga llëye wen ba kong sira tjlökwo li kjïshko ga raye, söya ame.

¹⁴ Dwla lono shkö sho roshko li, e ëye tjlökwo li kuno li loklo. Tjlökwo li kura, gueniyo wotjlik sök ara, wo pjang dbur go, llëbo pjlú kjok ëre kjing goshko li woyotjlïya ara bakoe. E kjïshko ga tjlökwo li woyo ba kong ame, ga bo wen tjlökwo li kjïshko llëme.

¹⁵ E ga dwla lono klung sho pjlú kjing go li, e ëye tjlökwo li kuno, ga kjre jlökoyo ba pjlúshko li loklo. Kjre, ga söya ïyado, ga bo wen tjlökwo li kjïshko arae.

Iök shjiy

¹⁶ »Iök shjiy borkey, kjinguëy wlo llëm, jney bi bukklo dorko wlo llëm bakoe. Iëy jong kjókshko dey, nopga opzrëk jek eshkoshko ga kälã të shjiy wëlä wlo.

¹⁷ Llëbo jney, miydëba jekdo llëm wlo. Gueniyo llono ga e miydëba dret, iök shjiy iak jong kjókshko wleni.

¹⁸ E kjïshko ga bor tjlökwo kuzï yõtso, miydëmi pjlú wlo. Ëye llëbo tjok ga sëya jek obi. Ëye llëye llëm ga llëye tjeng sirawa li döya ba shjiryo drete» le.

Jesús, ba mekë, ba lëmga

¹⁹ Eshko ga Jesús mekë, ba lëmga, e shrono tjeng Jesús sök lishko, gueniyo öötong ba soshko llëm, oba ara kjïshko.

20 E kjĩshko ga roy laraba Jesús kong ga tjlẽ ga «Bop mekẽ, bop lẽmga, e shrono tjeng bop ik kjoko» lẽba.

21 Kuya ga tjlẽ ba kong ga «Ëye, Sbõ tjlõkwo kura, ga kole ga era bor mekẽ wleni, bor lẽng wleni» le.

Pjluk, di bång buk kësbang, e ichara Jesúsde

22 Dbar kjwara ga Jesús opyono kjong roshko ba oppinggaga tjok, ga tjlẽ ba kong ga «Shji to dipzẽ, di bång buk kësbang ẽre kjwo kalẽkong» le. Ga jek'lok.

23 Jek lõng dipzẽ wopro ga Jesús ponoe. Eshko ga pjluk tjwe jong tråk llẽm, dbo ara di bång buk kësbang li kjing go. Di iõya ara, ga di dlin jong kjong li roy, pir sek seke.

24 Eni ga ba oppinggaga äär lõng ba wolleng, tjlẽ ba kong ga «¡Tjlapga, shji ba pitoe!» le.

Kuya ga kojono, ga pjluk, di iõya, e wlona, ga beno tjeng tjẽkso.

25 Eshko ga tjlẽ ba oppinggaga kong ga «¿Pjãy oto? ¿Pjãy mår bor go llẽm ega?» le.

Eshko ga epga beno lõng sëya llẽm, kjok bangkjre lok ara bakoe. Ga tjlẽ ẽng kong ga «¿Domer kjwe ẽro? Tjlẽno pjluk, di iõya li kong ga kole pjluẽ» le.

Domer goshko Ä sëya kjlara

26 E irgo ga öõtong lõng Gadara kjokyo, di bång buk kësbang li kjwo kalẽkong.

27-29 Eshko ga domer shång kjlara, goshko Ä sëya kjlara. Shång dbar kop ara ga shwong pjung llẽm, sök u roshko llẽm, jek to shång sakshko erä. Ba orkwo, ba dre, e kjrocharaba drõng sho go pjloglo kop ara, där llẽm wlo laraba, gueniyo shaya sëya

lirëshko ga ba dröng sho li skoya jek tas tas erä, ga iche sëya lirë kjok dogro no llëmhsko.

Eni ga Jesús opshino jek shäng kjyong roy dwayo li ïya sakshko dwayoshko ga tek shrono shäng ba zlong bäng ga kjök tonο.

Ïya Jesúsdë ga tjlë ba kong ga «;Ä sëya, pja opkjos domer kjwe go dwayo!» le.

E kjïshko ga sëya li tjlë ba kong dbo go ga «;Sbö Tjwlõ Kësbangyo Wa li pja! ;Pja tek shäng bor barwë llëme! ;Rokër bop kong sira ga tja shdum llëme!» le.

³⁰ Kuya ga tjlë ba kong ga «;Pja ko llë?»

«Tja ko Kop Arae» le ba kong. Lara eni, Ä sëyaga tjeng domer li go ara kjïshko.

³¹ Eni ga rokara Jesús kong ga iche Ä sëyaga shdüzlong shtoyo llëme le.

³² Epga löng lishko soshko ga köchi tjeng träk llëm dlup poglo go, ië. Eni ga rokara Jesús kong ga iche jek köchi tjeng li go.

Kuya ga «jölö» le,

³³ ga sëyaga li opkjono lok domer li go dwayo, ga jek lok köchi li go shara. Wop eni llëm ga köchi tjeng li zrono jer ri ri dlup poglo go, optono lok jer uunkong di bäng buk kësbang li roshko, ga shteno lok dret eshko.

³⁴ Ïya köchi dagaga tjeng lirë ga töktong jek ey dwayo, ga öötong löng nopga löngshko ga llëye shäryono li roy lara nopga kong pjire.

³⁵ Kuya lok ga tek shrono löng ara ba ïk. Shrono Jesús shäng lishko ga ïya lok ba zlong bäng ga domer dämär ga goshko Ä sëya li, e wlëna lok bë sök eshko, doyono pjir shwong go, skwë ame, poptono sök pjlúe. Ïya lok eni ga beno löng sëya llëme.

³⁶ Domer goshko Ä säya li poptara sorë, e lara ba ïgaga tjeng eshko lirë nopga shrono tjeng li kong.

³⁷⁻³⁹ Eshko ga kjok eshko sopga uunkong tjlë Jesús kong ga «Rokërwa bop kong sira ga pja opshis kjok ëreshko dwayo» le. Lara eni, kjok bangkjre lok ara kjïshko.

Kuya ga jlõ lara, jer opyë sök kkyong li roy. Eshko ga domer poptono li tjlë ba kong ga «Rokër bop kong sira ga tja ios jek bop tjok.»

«Llëme. Pja nom bop ushko iröng dey. Llëye shäryara Sbörë bop kong li, e lëp oba kong, miydëba wlo» le ba kong. È irgo ga Jesús to ey dwayo.

Eni ga jlõ lara domer lirë, ga to jek kjok eshko kjwang jïkong. Eshko ga e poptara Jesúsde sorë li roy le öötong shäng oba kong eshko.

Kjoglo wolono buk kjlara, walë swlo ara kjlara

⁴⁰ Jesús dipzono jek di bäng buk kësbang li kjwo kalëkong iröng obi. Öötong shäng di kjako ga oba tönö löng träk llëm eshko ba wlokrë.

⁴¹⁻⁴² Eshko ga domer shäng kjlara ko Jairo. Judíoga syö uyo jong eshko li kägäyoga shäng kjlara li e. Ba wa walë kjlaraso li wolontoe. E lu pjloglo sak kjwara kjingsho pjök (12) erä. E kjïshko ga Jesús ïya ga tek shrono shäng ba zlong bäng ga kjök tonö, kujono bokdo kjlay klung go, ga rokara jek ba ushko.

Kuya ga «Jölö» le, ga to jek ba tjok.

Oba ara kjïshko ga Jesús jëk shängshko ga pollikoba arae.

⁴³ Löng li tjrëko walë shäng kjlara swlo ara lu pjloglo sak kjwara kjingsho pjök (12) tjän. Ba dbar ïya ïyado, poptë llëme. Öör shäng dwlomnega ara

shwoy, ga ba dburwa tjeng'li zana drete. Eni ëmdë ga poptono llëme.

⁴⁴ Eshko ga tek shrono shäng Jesús zlong bäng ba kokso shwo lëkong ga ba shwong worbo porwara, ga poptono jekdo eshko.

⁴⁵ Eni ga Jesús tjlë oba kong ga «¿Tja porwaga ërë?» le.

Kjlara kjlara tjlë ga «Tja llëme» le lok ba kong eni.

E kjïshko ga Pedro tjlë ba kong ga «Tjlapga, nopga ara kuzong ga pja polliya löng pjlor kar kare» le.

⁴⁶ Gueniyo kuya ga tjlë ba kong ga «Tja porwara ëborë, e miydorore. Kuror ga ëbo poptono, bor dbo kësbang go» le.

⁴⁷ Eni ga miydara walë lirë ga Jesús porwara li beno lütshko llëme. Eni kuzong ga tek shäng Jesús zlong bäng ga kjök tonon sök kjlo dete erä. Eshko ga nopga uunkong bokso ga porwara ega, poptono jekdo sorë, e lara ba kong pjire.

⁴⁸ Kuya ga tjlë ba kong ga «Pja mär bor go kuzong ga pja poptonoe. Pja nom wopjlú bop ushko» le.

⁴⁹ Jesús tjlë shäng walë li kong wopro ga no tek Jairo ushko dwayo shrono shäng kjlara ga tjlë Jairo kong ga «Bop wa yë shinmotkonoe. Tjlapga no pingga kjwe twëy tjötö ame» le.

⁵⁰ Kuya Jesúsde ga jlö lara llëme. Tjlë Jairo kong ga «Pja woydë llëme. Pja mär bor go ga bop wa poptë dani» le.

⁵¹ E irgo ga Jesús öötong shäng Jairo ushkosho ga Pedro, Santiago, Juan, Jairo, Jairo boy, epgara ichara opzrëk jek ba tjok. No oblëra ichara opzrëk llëme.

⁵² Eshko ga nopga slar wopjluk jong träk llëm, kjloshtë ara bakoe. Jesús opzrëno jek u li

roshkoshko ga tjlě löng li kong ga «Pjãý slar ame. Kjoglo, e wołono llěme. Buk pě erä» le.

⁵³ Kuya lok ga Jesús joywe lok jong erä. Miyde lok ga kjoglo li shinmotkonoe.

⁵⁴ Eni ga Jesús opzrěno jek öötong shäng kjoglo buk lishko, orkwo shara, ga tjlě ba kong dbo go ga «Kjwozirwa, pja kojōzong» le.

⁵⁵ Jekdo eshko ga kjoglo li woshrono, ga kojono shäng. Eni ga ba data, ba mekö, e ichara Jesúsde ba sěng.

⁵⁶ Eshko ga epga beno löng yěy le erä. Gueniyo ga Jesús tjlě ba kong lok ga «Llěye shäryono jūshko ěre lěmi ě kong llěme» le.

9

Ba oppinggaga doglo sak kjwara kjingsho pjök (12) li poshduna Jesúsde

¹ E irgo ga Jesús, ba oppinggaga doglo sak kjwara kjingsho pjök (12) li rokara, ga kong dbo twara, Ä sěya oblě oblě tjeng oba goshko li iche to wlo, swlo oblě oblě popte wlo bakoe.

² Ga ichara Sbö ber no pjłuyo sorě li roy lě oba kong, swlopga poptě bakoe.

³ Eni ga tjlě ba kong ga «Pjãý brikshko ga llěye sömi llěme. Pjãý kjorkung sök llēm, kjla llēm, dli llēm, dbur sho llēm bakoe. Shwong pjang bomi do go li sömi ga pjłú, gueniyo shwong oblěra sömi llěme.

⁴ Pjãý äär kjone pogo ga pjãý ber löng u kjwaraso, äär jong pjãý opshik kjok eshko dwayo guing.

⁵ Pjãý öötong löng kjone ga pjãý wlokjre llēm wleni ga pjãý opshik eshko dwayo, ga bomi dre

pjlungyo lõzĩ ber tjeng eshko. E ber pjãy kura lok llēm li jyãglo, ga owa li ber pjang ba go» le.

⁶ Eni ga epga to jek lõng kjok kjrinashko kjri-nashko, Sbõ tjlõkwo roy pjlú læ oba kong, ga swlopga popte lok bakoe.

Juan No Waga zrõraba

⁷ E dbaryo ga llëye shãrye Jesúsde shäng li roy shdõktong ara. Ga kura Pjlu Herodesde, ga beno sök wotjlík ara. No kjone kjone tjlë ga «E Juan No Waga li woshrokdo» le.

⁸ Kjone kjone obi tjlë ga «E Sbõ tjlõkwo laga tek dënashko so Elías tjwayde shäng» le. Kjone kjone obi tjlë ga «E Sbõ tjlõkwo lagaga tek dënashko so kjlara li woshrokdo» le.

⁹ Gueniyo Herodes tjlë ga «E lanyotkëba ara. ¿Eni ga ë læba? ¿E Juan woshrokdo? Nopga ichaga tjarë om go, Juan kãgã zë tase» le eni. Eni ga drõno ara, ãya wlo.

Jesús nopga sëno doglo sak dbãw dbãw pjloglo shkëng (5,000)

¹⁰ Sbõ tjlõkwo roy lagaga Jesús ãska li shrono lõng irõng obishko ga llëye shãryara lok li lara lok Jesús kong pjire. E irgo ga epga tõna Jesúsde tjeng dboy, ga sõra jek õõtong lõng kjok ko Betsaida.

¹¹ Gueniyo ga miydara kjok eshko sopgarë, ga to jek lok ba irgo. Shrono lõng ba shwoy ga nopga li wlojkrara, ga Sbõ ber no pjluyo sorë li roy lara ba kong, ga swlopga sõra lok tjeng eshko li poptara.

¹² Kjok sëng ga ba oppinggaga doglo sak kjwara kjingsho pjök (12) li tek shrono lõng ba zlong bãng ga tjlë ba kong ga «Kjok ëreshko llëye drete. Pjlú

wlo ga nopga kjwe ichos to na dwayo, jek llëbo soynekoba kjone lishko, dli tjwlëk wlo, pozlong shtoyo wlëk wlo bakoe» le.

¹³ Kuya ga tjlë ba kong ga «Sëzĩ pjäydë dey» le.

Kuya lok ga tjlë ba kong ga «Ëreshko tjawa pjlung shosho suk pjir tjeng kjwo shkëng (5), mã tjeng do pjökdewa erä. ¿Woydëp ga tjawa jongya dli tjwlëk nopga tjeng kës ëre kongde?» le.

¹⁴ (Eshko ga domerga tjeng doglo sak dbäw dbäw pjloglo shkëng (5,000) dik. Walëga, kjwozirga, e shtak llëme.)

Eni ga Jesús tjlë ba kong ga «Nopga kjwe ichozĩ wlar tjeng töshko, shtor shtor, doglo sak shkëng (50) sak shkëng (50)» le.

¹⁵ Kuya lok ga shäryara eni, ga nopga li wloktong tjeng töshko uunkong.

¹⁶ Pjir ga pjlung shosho suk pjir kjwo shkëng (5) li, mã do pjök li, e kjrara Jesúsde, ga kjok dogo ãya jem drëng ga tjlë Sbö kong ga «Tjawa kong dli tworop ëre. Tjawa ber wopjlú bop tjok e kjĩshko» le. E irgo ga dli li twara ba oppinggaga kong, pjlorgue lok nopga tjeng kës li kong wlo.

¹⁷ Nopga uunkong iono beno löng bö tjung, wopjlúe. E irgo ga dli worbo tona ba oppinggagarë lok shing roshko, beno tjeng shing kjwo sak kjwara kjingsho pjök (12), tjung tjunge.

No pjluyo ichara Sbörë shrono shäng li, e Jesús lara Pedrorë

¹⁸ Pjlara ga Jesús sök syöshtë Sbö kong. Ba oppinggaga löng ba tjok eröe. Eshko ga tjlë ba kong lok ga «¿Kumi ga tja ë lëba?»

19 «No kjone kjone tjlē ga pja Juan No Waga li woshrokdo le. Kjone kjone obi tjlē ga pja Sbō tjlōkwo laga tek dēnashko so Elías tjwayde shäng le. Kjone kjone obi tjlē ga pja Sbō tjlōkwo lagaga tek dēnashko so kjlara li woshrokdo le» le lok ba kong eni.

20 Kuya ga tjlē ba kong ga «E ga pjāye, ¿tja ë lēmi?» le.

Kuya Pedrorë ga tjlē ba kong ga «No pjlyuo ichara Sbörë shrono shäng li, e pja» le.

21 Kuya ga tjlē ba kong lok ga «Tja ë lēmi ë kong llēme» le.

Jesús lano ba wolon dbaryo kjishko

22 Eshko ga tjlē ba kong obi ga «Äär dbar kjwara ga no to ter kjok dogo dwayo ëre shdungoba ara guing. Judío tjlapgaga kjok llgwega wleniyo, syōshtaga kägäyoga, no pinggaga kjok llgwekklo tara Moisésdë li go, tja wlokjre lok llēme. Ga tja zrökoba, gueniyo äär dbargwo mya ga tja woshre Sbörë iröng obi» le.

23 E irgo ga tjlē uunkong kong ga «Ëye jëk woydë bor tjok jlōkoyo ga ber shäng bor woyotjlīk ïyado, wotjlīk llēbo shäryë kjok ëre kjing goshko ame bakoe. Bor kjīshko ga llēye shäryëba ba kong llë pogoshko li, e zrökoba pjang kjlōs go ëmdë ga e ba kong ga llēye llēme.

24 Ëye wotjlīk opdë om go, zrökoba bor kjīshko llēm wlo le ga äär kjok dogo llēme. Gueniyo ëye jëk bor tjok jlōkoyo, e zröraba bor kjīshko ëmdë ga era ber sök së ïyado kjok dogo.

²⁵ Ēye, llēbo tjeng kjok ěre kjing go kēs li kjrara tjeng ba wloy ěmdē ga e llēno llēme. Wolono ga öötong kjok dogo llēm ga to jeno ba llēbo li tjok.

²⁶ »Llono ga no to ter kjok dogo dwayo ěre tjwe bor dbo kãlã goshko, Data Sbö dbo kãlã go, bor parkagaga kjok dogo so tjok. Eerishko ga ěye, tja lökyokjre oba boksho ga eshko ga lökyokjrēr eni bakoe.

²⁷ Lēr bomi kong jlōkoyo ga pjäy kjone kjone löng ěreshko wolontē llēm obishko ga Sbö ber no pjluyo sorē li ĩmi wēlěe» le.

Jesús kjlopswono beno kãlã lletlet

²⁸ Dbargwo kjwong (8) irgo ga Pedro, Santiago, Juan, e söra Jesúsdē jem ba tjok dboshko, ga öötong löng dlup jong kjwara kjókshko li go, syöshtē Sbö kong wlo.

²⁹ Eshko ga Jesús syöshtē Sbö kong wopro ga ba bokkwo kjlopswono, shwong beno pjlublún, kãlã lletlete.

³⁰⁻³¹ Eshko ga Moisés, Elías, e weno löng lan ba tjok, kãlã tē shjiye. Ga wop tjok ga Jesús zrökoba Jerusalén kjokyo sorē li lanyotke lok ěng tjok.

³² Ba oppinggaga tjeng eshko li löng poywō erä. Gueniyo polläk ga ĩna lok ga Jesús kãlã shjiye. Domerga löng do pjök ba tjok li ĩna lok bakoe.

³³ Domerga li brik lok kjwlēshko ga Pedro tjlē Jesús kong ga «Tjlapga, tjawa löng na ga pjlúe. Tjawa ukwang shäryē kjwo mya, bop kong kjwara, Moisés kong kjwara, Elías kong kjwara bakoe» le. Lara eni, gueniyo llē layde shäng li miyde shäng llēme.

34 Shäng tjlë wopro ga pjäng sho lono ter kj-rina ba kjing go, ga ba oppinggaga li beno kjok bangkjrë ara.

35 Ga pjäng sho li roshko dwayo ga ybö kura lok ga tjlë ga «Bor wa li ëre. E kjroror. Ba tjlökwo kuzïa» le.

36 Kura lok pjir ga ïya lok ga Jesús beno shäng kjlaraso. Dbar eshko ga beno löng kjing, llëye ïna lok li lara ë kong llëme.

Dwlas goshko Ä sëya poptara Jesúsde kjlara

37 Wëshko ga ter shrono dlup li dwayoshko ga nopga shrono löng träk llëm, Jesús ik.

38 Eshko ga domer shäng kjlara nopga tjeng li tjreko. Tjlë Jesús kong dbo go ga «Tjlapga no pingga, rokër bop kong ga bor wa domer ëre is sira. Tja wa oblë drete.

39 Olö ga shaya Ä sëyarë, ie öö le, dbukza rish buk töshko, jek kjlo dete, ga kjamo ber bung erä. Shärye owa eni wop sit wop sit.

40 Tja tjlëno bop oppinggaga beno tjeng ëreshko wle kong ga “Bor wa ëre, goshko Ä sëya kjlara. Rokër bomi kong ga ichozï to bor kong sira” loror, gueniyo to ichara lok llëme» le.

41 Kuya ga tjlë löng li kong ga «Pjäy wotjlik owa. Pjäy mär Sbö go llëme. ¿Tja ber shäng bomi tjok kjër äär jong llono, pjäy mär ber löng ba go wlo? Tja sjeno shäng bomi tjok tjän» le. Eshko ga tjlë domer li kong ga «Bop wa tek sös bor kong» le.

42 Eni ga dwlas li söya lok jek shäng äätë ba zlong bäng ga dwlas li dbura sëya lirë rish buk töy, jek kjlo dete erä. Eshko ga sëya li wlona Jesúsde, ga dwlas li poptara, ga twara iröng ba data kong.

⁴³ Īya nopga tjeng eshko lirë ga beno löng yëy le erä, Sbö dbo ara kjïshko.

Jesús lano ba wolon dbaryo kjïshko pjłara obi

Llëye shäryara Jesúsdë li woyotjłikoba löng wopro ga tjłë ba oppinggaga kong ga

⁴⁴ «Llëye lër bomi kong li kuzi yõtso, woyojemi llëme. No to ter kjok dogo dwayo ëre twëba ber tjeng nopga włoshko» le.

⁴⁵ Gueniyo ga llëye le shäng li llë loklo miydara lok llëm, e jnena Sbörë beno, miyde lok llëm wlo kjïshko. Ga llë loklo kjakrokara lok ba kong llëm, bangkjre lok ara kjïshko.

Ëye tjwłõ ara anmoyõ

⁴⁶ E irgo ga ba oppinggaga kłlara tjłë ga «Tja ber tjwłõ ara pjāy uunkong kjinmo» le kłlara obi kong. Kuya ga tjłë ga «Llëme. Ber tjwłõ ara li tja» le. Ga llamoga omlë jong eni bakoe.

⁴⁷ Llëye le löng li miydara Jesúsdë drete. Eni ga kjwozirwa kjrara kłlara, ga iara shäng ba zlong bäng,

⁴⁸ ga tjłë ba oppinggaga kong ga «Ëye, kjwozirwa ëre włokjrara bor kjïshko ga tja włokjrara wleni. Ga ëye, tja włokjrara ga bor ichaga włokjrara wleni bakoe. Bomi tjreko ga ëye shäng kłlara wotõy anmoyõ ga tjwłõ ara anmoyõ li e» le.

«Ëye shäng bi włoyo llëm ga shäng bi shwo lëkong» lara Jesúsdë

⁴⁹ E irgo ga Juan tjłë ba kong ga «Tjłapga no pingga, domer ĩnorwa shäng kłlara, Ā sëyaga tjeng oba goshko li iche to shäng bop ko go. Gueniyo ga e bop oppinggaga bi tjok llëm kjïshko ga tjawa tjłëno ba

kong ga “Ä säyaga ichëp Jesús ko go ame” lororwa eni» le.

⁵⁰ Kuya ga tjlë ba kong ga «¡Wëyë! “Shäryëp ame” lëmi ba kong llëme. Ëye shäng bi wloyo llëm ga shäng bi shwo lëkong» le.

Jesús wlokrara Samaria sopgarë llëme

⁵¹ Eshko ga Jesús jem kjok dogo iröng obi wlo dbaryo li ääto, ga wotjlík ga to jongya Jerusalén kjokyo, lara jong kjwaraso eni. Ga to jek ba nopga tjok.

⁵² Jëk löngshko ga nopga ichara pjök mya ba bäm go ba roy söga wleniyo. Eni ga ba roy sögaga li öötong löng bäm go Samaria kjokyo kjrina, pozlong shtoyo wlëk lara.

⁵³ Gueniyo ga miydara Samaria sopgarë ga jongya jong Jerusalén kjokyo. E kjïshko ga wlokrara lok llëme.

⁵⁴ Roy kuya ba oppinggaga Santiago, Juan lirë ga tjlë lok Jesús kong ga «Tjlapga, ¿woydëp ga tjawa iök long ter kjok dogo dwayo, epga pjir wlore?» le.

⁵⁵ Kuya ga bojono ba shwo lëkong ga wlongza tjã tjã erä.

⁵⁶ Eshko ga jek lok kjok shto oblë.

Shji jëk Jesús tjok ga soyo tjok

⁵⁷ Eni ga jek löng irbo wopro ga no shäng kjlara eshko tjlë Jesús kong ga «Tjlapga, woydër ga pja jek kjone ga tja jek bop tjok eshko» le.

⁵⁸ Kuya ga tjlë ba kong ga «Shjiti kjloshko so, e pë klung bäng. Sënwa, e pë ba usho roy. Gueniyo no to ter kjok dogo dwayo ërera woshtozlong shtoyo drete» le.

59 E irgo ga tjlë oblë kong ga «Pja tek bor tjok, pja pin wlo» le.

Gueniyo kuya ga tjlë ba kong ga «Tjlapga, tja ichos jek bor data ushko sira. Bor data wolono, jnenor sakshko pjir ga tja tekdo iröng bop tjok» le.

60 Kuya ga tjlë ba kong ga «Shinmoga ber tjeng ëng jnek wëyë. Pja nom Sbö ber no pjluoy sorë li roy lë oba kong dey» le.

61 E irgo ga no shäng kjlara obi tjlë Jesús kong ga «Tjlapga, tja jek bop tjok lër. Gueniyo tja koshëp sira, “Tja toe” lër bor pjeyoga kong guing» le.

62 Kuya ga tjlë ba kong ga «Ëye ba pak soyono, ga wotjlik llëbo beno iröng li kjishko ga e llëno llëm Sbö ber no pjluoy lishko» le.

10

Nopga ichara Jesúsdë jek doglo sak kjäk kjingsho pjök (72)

¹ E irgo ga nopga jek löng ba tjok li kjrara Jesúsdë doglo sak kjäk kjingsho pjök (72). To kjok shto oblë oblë le lishko ga epga ichara jek löng pjök pjök ba bäm go.

² Eshko ga tjlë ba kong ga «Dwla bo kjrëy wlo ga ara, gueniyo parkagaga kjlobö döe. Eni ga rokozï dwla sogo li kong ga parkagaga wlëya obi, dwla bo ara li kjre wlo.

³ Eni ga pjây nomo. Pjây to löng sjëke. Pjây ichër jek löng öng wlëp ushko so llgwoklë jëk löng shjiti kjloshko so löngshko wleni.

⁴ Pjây brikshko ga pjây dbur sök llëm, kjla sök llëm, drepkwota sök llëm bakoe. Pjây jëkko eröe.

No wlēmi irbo ga “Miga” lēmi ba kong llēm, pjāy jek bek erōe.

⁵ Pjāy äär ber lōng kjone ga pjāy opzrēk jek u jong kjwara eshko li roshko, ga pjāy tjlēs nopga tjeng eshko li kong ga “Miga. Rokēr Sbō kong ga pjāy lōng u ēreshko uunkong ie ber lōng wlēpe” lozī ba kong eni.

⁶ Eshko ga pjāy wlokjre lok wopjlú wleni ga epga ie Sbōrē ber lōng wlēp jlōkoyo. Gueniyo pjāy wlokjre eni llēm ga epga kjimte Sborē llēme.

⁷ Pjāy öötong lōng kjone pogo ga pjāy to lōng u kjwara kjwara llēm, pjāy ber lōng u kjwaraso dey. Eye parkē ga e potjwlēkko ba pak li āska. E kjīshko ga pjāy sēya llē ga uozī, bomi potjwlēkklo li e.

⁸ »Pjāy öötong lōng kjone pogo ga pjāy wlokjre nopga eshko sorē wleni ga pjāy sēya llē ga uozī,

⁹ swlopga lōng eshko li poptozī, ga pjāy tjlē nopga lōng li kong ga “Sbō ber no pjluyo wlo li, e dbaryo dōrōe” lēmi ba kong eni.

¹⁰ »Gueniyo ga pjāy öötong lōng kjok kjrina ga pjāy wlokjre nopga eshko sorē llēm ga pjāy to lōng jek irbo pjlara pjlara tjwe lok li go, ga pjāy tjlē kjok eshko sopga li kong ga

¹¹ “Bomi kjokshko pjlungyo pjono borwa dre go li lōnwa ber tjeng jūshko, pjāy shdungko loklo. Gueniyo miydozī pjlú ga Sbō ber no pjluyo wlo li, e dbaryo dōrōe” lēmi ba kong eni.

¹² Lēr bomi kong ga no llgwezlong dbaryoshko ga kjok eshko sopga shdūya Sbōrē ara, Sodoma sopga kjinmo» le.

Kjok shto oblē oblē, ba tjlōkwo kjrēba woydē llēm kjīshko ga kjok eshko sopga wlona Jesúsde

13 E irgo ga tjlëno nopga kjok shto oblë oblë li kjışhko. Tjlë ga «iCorazın sopga, Betsaida sopga, pjây song jlõ, pjây shdungko! Llëbo ãydëba llëm wleniyo shãryoror bomi kong li ãna Tiro sopga, Sidón sopgarë tek dënashko kjwe ga llëbo owa shãrye löng'li, e owa jlõe lara, ga rayara, ga shwong pjuna shtëgro së ä wleniyo, pjlung sho iara ba dlu kjing go, ba woowa li ãya Sbörë wlo tjän.

14 Eni ga no llgwezlóng dbaryoshko ga pjây shdüya Sbörë ara, Tiro sopga, Sidón sopga, e kjinmo.

15 »Capernaúm sopga, ¿pjây wotjlík ga pjây söya Sbörë jem äär kjok dogo lëmiro? Eni llëme. Pjây iche jer äär iök pjë jong ri ri sjer llëm shtoyo li roshko» le.

16 Eshko ga tjlë ba oppinggaga kong ga «Pjây tjlökwö kjruga ërë ga e bor tjlökwö kjrasyde wleni. Ëye, pjây wlokrara llëm ga tja wlokrara llëm wleni. Ga ëye, tja wlokrara llëm ga bor ichaga wlokrara llëm wleni bakoe» le.

Nopga doglo sak kjäk kjingsho pjök (72) li shrono iröng obi

17 Eni ga nopga doglo sak kjäk kjingsho pjök (72) li toe. Tjlökwo lara lok kjok shto oblë oblë pjir ga tek shrono löng wopjlu iröng obi. Eshko ga tjlë lok Jesús kong ga «Tjlapga, Ä sëyaga ëmdë ga tjawa bangkjre. Epga ichororwa bop ko goshko ga tjawa kolara» le lok eni.

18 Kuya ga tjlë ba kong ga «Eni jlõe. Ìnor ga Ä zana Sbörë, ga e lono ter kjok dogo dwayo llgwölëng wleni.

19 Ga pjãy kong dbo tworor kësbang, bi moskwo kësbang li zami wlo, ga llëye wen owa bomi kong llëme. Dgur shglëmi, dyë shglëmi ëmdë ga llëye wen owa bomi kong llëme.

20 ¿Gueniyo pjãy löng wopjlú, pjãy kole Ä sëyagarë kjïshko egaro? Pjãy kole eni li tjwlõ ara llëme. Pjãy ko tak lok kjibokwo go kjok dogo lira tjwlõ ara. Woyde ga pjãy ber löng wopjlú e kjïshko shara» le.

21 Jekdo eshko ga go Sbö Sëya jlökoyo kjïshko ga Jesús beno shäng wopjlú ara, tjlë Sbö kong ga «Data, pja kjok dogo sopga, kjok ëre sopga, e Tjlapga. Llëye jnenop kjok miydagaga löng kong li pinop oba song, wotöy wleniyo kong. E kjïshko ga pja poshrër ara. Shäryorop eni, woydorop eni kjïshko» le.

22 Eshko ga tjlë nopga kong ga «Llëbo uunkong iara Data Sbörë beno tjeng bor wloshko. Sbö Wa ëre sorë, e miydaga ërë llëm, e miydaga bor Datarë eröe. Data Sbö, e sorë miydaga ërë llëm, e miydaga tjarë eröe. Gueniyo e sorë pin woydë ë kong ga pin» le.

23 E irgo ga ba oppinggaga ïya ga tjlë ba kong tjoksa ga «Llëye shäryër li ïmi löng bomi bokkwo go. Ëye omïno ga era ber wopjlúe.

24 Lër bomi kong ga llëbo ïmi, kumi löng ëre tjwlõ ara. Dënashko ga Sbö tjlökwo lagaga, pjilupga, e omïk woydë, omkuk woydë, gueniyo omïno llëm, omkuno llëm bakoe» le.

Samaria so kjlara pjlú wleniyo

25 Domer shäng kjlara, kjok llgwekklo tara Moisésdë li miydaga pjlú wleniyo. Pjlara ga kojono shäng Jesús zlong bäng, tjlïya wlo. Tjlë ba kong ga

«Tjlapga no pingga, ¿lëye shäryër, tja ber sök së ÿyado Sbö tjok wlo?»

²⁶ «¿Lëye tara Moisésdë pjang kjok ilgwekklo kjibokwoyo li go? ¿Bop kong ga e pjollgwep ber sorë?»

²⁷ «“Lëbo woydëpshko, llëbo woyotjlïpshko, llëbo shäryëpshko, pja sök së obishko ga Tjlapga, bop Sbö li woydos jlökoyo ÿyado”,* ga “Pja opwoydë sorë ga bop kjlara, e woydos eni bakoe.”† Kjok ilgwekklo tak pjang li e» le.

²⁸ Kuya ga tjëlë ba kong ga «Tja dboryorop beke. Shäryorop eni ga pja beno sök së ÿyado Sbö tjok» le.

²⁹ Eshko ga domer li opwlikë woydë. Eni ga tjëlë ba kong ga «¿Bor kjlara le li ë?»

³⁰ «Domer opshino kjlara Jerusalén kjokyo dwayo, jongya jer shäng Jericó kjokyo wlo lara. Jek jëk shängshko ga wlëna nopga lürkë ä wleniyorë irbo. Lëbo söya tjeng ba tjok li döra lok ba shjiryo dret, ba shwong pjang ba do go li tjok, shpora lok träk llëm, ga iara beno buk eshko ba llëmdo.

³¹ E bër ga syöshtaga Sbö kong ba nopga kjïshko wleniyo tek shäng kjlara irbo li go. Buk li ñna, gueniyo kjimtara llëm, koskara jek irbo sor go, jek bek erä.

³² E irgo ga Leví tjëyo tek shäng kjlara irbo li go bakoe. Omïno, ga kjimtara llëm, koskara jek irbo sor go, jek bek erä bakoe.

³³ E irgo ga tek shäng irbo li go kjlara obi, Samaria so shara. Buk li ñna, ga songe le.

³⁴ Eni ga jek öötong shäng ba zlong bäng. Shporaba jyäglo lok li dwlumnena kjyo go, kjillgwo

* **10:27** Deuteronomio 6.5. † **10:27** Levítico 19.18.

bo dyo dbo ara go, ga pjrira shwomzrëng go. E irgo ga poyona, iara ba öng kjing go, söra jek no pozlong uyoshko, ga dara buk eshko.

³⁵ Wëshko ga pozlong uyo sogo li potjwlëna dbur sho pjublún kjwo pjök go, ga tjlë ba kong ga “Shporaba kayo buk kjwe dos bor kong jüşhko sira. Dbur zanop ëre kjinmo wleni ga tja tjwe iröng obishko ga pja potjwlën eshko” le.

³⁶ »¿Eni ga bop kong ga nopga doglo mya li kjone dey ga beno shporaba kayo li kjlarayo?»

³⁷ «Songe laga ba kong li e» le kjok ilgwekklo miydaga lirë.

Kuya ga tjlë ba kong ga «Eni ga pja nom omshäryë e kjoyo bakoe» le.

Jesús öötong sök Marta, María, e ushko

³⁸⁻³⁹ Kjok kjrinishko ga walë shäng kjlara ko Marta, lëng ko María. Jesús jëk shäng irbo ba op-pinggaga tjok, ga öötong shäng eshko ga wlokrara Martarë ba ushko. Eshko ga María wloktong sök ba dre zlong, tjlökwo le sök li kuya wlo.

⁴⁰ Martara shäng wotjlík ara, llëbo shärye wlo li ara kjishko. E kjishko ga jek shäng Jesús zlong bäng ga tjlë ba kong ga «Tjlapga, bor lëng kjwe ichos jek bor kjimtë. Tja iara beno shäng parkë ara tjoksa. ¿E ïgöp llëmdo?»

⁴¹ «Marta, pja woydë ara, llëbo woyotjlíp shäng ara kjishko.

⁴² Gueniyo llëbo tjwlö ara li kjrinaso, ga tjwlö ara li kjayde Maríarë, ga döga ërë ba shjiryo llëme» le ba kong.

11

Shji syöshtë Sbö kong sorë

¹ Pjlara ga Jesús sök syöshtë Sbö kong. Syöshtono pjir ga ba oppingga kjlara tjlä ba kong ga «Tjlapga, tjawa pīs syöshtë, Juan ba oppinggaga pino dik» le.

² Kuya ga tjlä ba kong ga «Pjây syöshtë Sbö kong-shko ga lëmi eni:

»“Data, bop ko, e ber kësbang, dboye.

Pja tjwe ber sök borwa pjluvo wlo.

³ Dbar kjwobi go ga dli woydërwa li twos borwa kong.

⁴ Llëbo shäryara oblërë borwa kong owa li iërwa ber tjwlo llëme.

E kjishko ga owa pjang borwa go li löš ber dret eni bakoe.

Tjawa iëp ber löng borwa tjilzlong lishko llëme.”»

⁵⁻⁶ E irgo ga tjlä ba kong lok ga «Kjok rong bek ga pjây kjlara shwoy, no tjwe shäng kjlara pjola dwayo, ga pja dli ba kong drete. ¿Eni wleni ga pja to dli rokë bop pjeyo sök soshko kong llëmdo? Pja äär ba shwoy ga pja tjlä ba kong ga “Bor kjlara shrono shäng bor shwoy, ga tja dli ba kong drete. E kjishko ga tja sëm pjlung shosho suk pjir kjwo myare” lëp ba kong eni.

⁷ »Pja kuya ga tjlä bop kong ga “Llëme. Tja barwëp llëme. U bäng jong tuke. Bor wapga tjeng bor tjok pëe. Tja kojong, llëye twër bop kong wlo llëme” le.

⁸ »Gueniyo lër bop kong ga rokëp jek rokëp jek wleni ga kojong, llëye woydëp li twe bop kong pjire. Eshko ga kojono bop kjimtë, pjây ëng tjok pjlu kjishko llëme. Kojono, e barworop ara kjishko.

⁹ »Eni ga lër bomi kong ga llëbo rokozĩ Sbö kong, ga twe bomi kong. Llëbo wlëzĩ, ga wlëmi. “U bäng bäng dözĩ bor kong” lozĩ ba kong, ga dār bomi kong.

¹⁰ Ęye llëbo rokë ga e kjre. Ęye llëbo wlëk ga e wlëya. Ęye “U bäng bäng dözĩ bor kong” lë ga e dār ba kong.

¹¹ »¿Data kjone dey ga kong mã roke ba warëshko ga kong dgur twaydero?

¹² ¿Ga kong kjörkö wa ak'lë rokeshko ga kong dyë twaydero?

¹³ Eni ga pjäy nopga owa ëmdë ga pjäy wotjlik llëbo pjlu twë bomi wapga kong. Eni wleni ga bomi Data sök kjok dogo li kong llëbo rokëmishko ga pjäy kong ba Sëya twe» le.

*Jesús, Beelzebú**

¹⁴ Pjlara ga domer shäng kjlara tjlä llëm, goshko Ä sëya kjlara kjishko, ga sëya li ichara Jesúsdë toe. E irgo ga domer li beno shäng tjlä. İya löng lirë ga beno löng yëy le erä.

¹⁵ Gueniyo kjong kjong tjlä ëng kong ga «Ä sëyaga iche to, dbo twara Ä sëya kägäyo ko Beelzebürë ba kong li go» le lok eni.

¹⁶ Kjong kjong löng obi omtjlik woydë, ga tjlä ba kong ga «Llëbo İydëba llëm wleniyo shäryos borwa kong kjrina, pja ichaga Sbörë jlöre miydërwa e go wlo» le.

¹⁷ Wotjlik löng llë li miydara Jesúsdë pjir, ga tjlä ba kong ga «Pjlu llë, ba nopga ëngkjwë kar kar wleni ga e oppjik lok om go. Nopga tjeng u

* 11:13 Ä, e kowëba *Beelzebú* bakoe.

kjwaraso, e ëngkjwë kar kar wleni ga e oppjik lok om go bakoe.

18 ¿Eni ga Ä, e ëngkjwë ba sëyaga tjok wleni ga e pjir maling llëmdo? Lër bomi kong eni, tja Ä sëyaga ichë to, dbo twara Beelzebúrë bor kong li go lëmi kjïshko.

19 ¿Eni kjwe ga bomi oppinggaga kong dbo twaga ërë, Ä sëyaga iche wlo? E kjïshko ga pjây diktong löng jlöe laga epgarë om go.

20 Ä sëyaga ichër to, Sbö dbo ara go. Miydëmi e go ga Sbö ber no pjluyo wlo li, e dbaryo shrono tjän.

21-22 »Domer shäng kjlara dbo ara, wloshko opwlikoklo tjok. Shäng ba u dëshko ga llëbo tjeng u roshko li lüyotkëba ba shjiryo ga ä, wokjang ba opwlikoklo tjeng li kjïshko. Gueniyo ga tjwe kjlara obi, dbo ara ba kjinmo wleni ga shäng li zäya, ba opwlikoklo li döya ba shjiryo, llëbo tjeng ba u roshko li söya jek ba tjok, ba opwlikoklo tjok bako, ga shdöya oblë kong drete.†

23 »Ëye shäng bor shwo lëkong llëm ga e shäng bor wloyo. Ëye no töng bor kong llëm ga e shäng ba shdöga.

24 »Ä sëya pjang no goshko li toshko ga to shäng shto wlëk kjok dogro no llëmshko, woshtë wlo, gueniyo wlëya llëme. Eshko ga wotjlïk ga “Tja to bor ushko iröng obi” le.

25 Äär iröng ba ushko ga wlëya shäng pjlokjak pjir, poshäryak pjir wleni.

† 11:21-22 **Domer dbo ara** le li, e Ä loklo. **Ba llëbo döga** le li, e **Jesús** loklo. Lara eni li, e Ä sëyaga iche wlo ga woydara ga Ä zana guing loklo.

²⁶ Eni ga sëya oblë tōya ba tjok doglo kjäk (7), owa ba kjinmo, ga uunkong li pjë jek äär ber tjeng no li go. Eni ga no li beno shäng owa anmoyō, shäng bäm go sorë li kjinmo» le.

²⁷ Tjlë shäng wopro ga walë shäng oba tjeng li tjrëko kjlara, tjlëno dbo go. Tjlë ga «Bop mekë, pja wena, pja kuna. Miydër ga shäng wopjlú bop kjishko» le.

²⁸ Kuya ga tjlë ga «Ëng. Gueniyo ga ëye Sbö tjlökwo kuno, ga kole ga era ber shäng wopjlú anmoyō» le.

Jonás jyäglo

²⁹ Eshko ga nopga töno ara, tjwe jong obi Jesús shäng lishko. Ga Jesús tjlë ba kong ga «Eerishko dbaryo sopga, pjäy owa. Woydëmi ga llëbo jyäglo shäryër bomi kong, gueniyo shäryër llëm, Sbö tjlökwo laga Jonás, e jyäglo shäryotë bomi kong eröe.

³⁰ Dënashko ga Jonás, e beno llëbo jyäglo Nínive sopga kong. Ga no to ter kjok dogo dwayo ëre ber llëbo jyäglo nopga löng eerishko li kong eni wleni bakoe.

³¹ Sabá so pjluwo walë tek pjola dwayo, Pjlu Salomón kjok miydë li kuya wlo. Ga ëreshko no shäng kjlara tjwlö ara, Salomón kjinmo. E kjishko ga eerishko dbaryo sopga, pjäy llgweya Sbörëshko ga walë li kojong, ga tjlë ga “Kjwepga shdungko” le.

³² Nínive sopga, e Jonás tjlökwo kunoshko ga llëbo owa shärye löng li, e owa jlöe lara, ga rayarae. Ga ëreshko no shäng kjlara tjwlö ara, Jonás kjinmo. E kjishko ga eerishko dbaryo sopga, pjäy llgweya

Sbörëshko ga Nínive sopga kojong lok, ga tjlě ga “Kjwepga shdungko” le.

Iök shjiy bi doyo kong

³³ »Iök shjiy borkey, jney wlo llēm, iëy sbi dorko wlo llēm bakoe. Iëy jong kjókshko dey, nopga opzrëk jek eshkoshko ga kãlã të shjiy wělë wlo.

³⁴ Iök shjiy ïgömi wělë bomi bokkwo go. Bomi bokkwo pjlú wleni ga bomi doyo uunkong iök shjiy tjok wleni. Gueniyo bomi bokkwo owa ga bomi doyo uunkong kjok ro sī wleni.

³⁵ Eni ga pjāy sjëke. ¿Tjłõkwo kjroromi li, e jlõre? Bomi iök shjiy li e. E kjĩshko ga tjłõkwo kjroromi li jyõ wleni ga pjāy lõng kjok ro sī roy wleni.

³⁶ Gueniyo bomi doyo uunkong iök shjiy tjok, kjok ro yēt eshko llēm ga kjok ïgömi wělë, pjāy jëk lõng iök shjiy tjok wleni» le.

No pinggaga kjok llgwekklo tara Moisésdë li go, fariseoga, e wlona Jesús dë

³⁷ Tjlěno eni pjir ga e mana fariseo shäng kjlara lirë ië ba tjok ba ushko. Eni ga opzrëno jek ba tjok ba u roshko, ga sirkeno sök, ië wlo.

³⁸ Īya fariseo lirë ga Jesús orkwo shkwono judioga ĩ dik llēm ga beno shäng wotjlik ara.

³⁹ Eshko ga Jesús tjlě ba kong ga «Pjāy fariseoga llëbo shäryë ara, pjāy pjlúe lëba wlo, gueniyo pjāy wotjlik dbur tõng bomi kong erö, pjāy wotjlik llëbo owa shäryë. Pjāy so di ioklo, dli uoklo kjoyoe. E kwoshkwak ba poglo go, gueniyo roshko wliwlie.

⁴⁰ ¡Pjāy wotjlik llëme! Shji shäryara Sbörë pjir, bi doyo dö llēm, bi sëya bakoe. ¿E miydëmi llëmdo?

⁴¹ Gueniyo pjãy wotjl̄is ll̄ebo p̄jlú shãryë oba song wleniyo kong. Eni ga pjãy ber l̄ong p̄jlo bek Sbõ bokso jl̄okoyo.

⁴² »¡Fariseoga, pjãy song jl̄õ, pjãy shdungko! Ll̄ebo wl̄ënomi li shtëmi äär ba sakyõ (10) go, ba sakyõ (10) go, shimi kjrina kjrina, ga twëmi Sbõ kong. Bomi dli mokyõ obl̄ë obl̄ë tjok ëmdë ga shãryëmi jl̄okoyo eni bakoe. Gueniyo ga pjãy jëk l̄ong p̄jlo bek obl̄ë tjok ll̄ëm, Sbõ woydëmi ll̄ëm bakoe. P̄jlú wlo ga pjãy jëk p̄jlo bek nopga uunkong tjok, ga Sbõ woydëmi p̄jlú bakoe. Gueniyo woyde ga ll̄ebo wl̄ënomi li twëmi Sbõ kong, shãryëmi l̄ong wleni bakoe.

⁴³ »¡Fariseoga, pjãy song jl̄õ, pjãy shdungko! Judíoga syõ uyo roshko ga woydëmi ga pjãy l̄ong sökklo p̄jlú goshko erä. Woydëmi ga miga ll̄ë l̄ëba bomi kong yõtso ll̄ebo soynezl̄ong shtoyo bakoe.

⁴⁴ ¡Pjãy song jl̄õ, pjãy shdungko! Pjãy so shinmo doyo iak buk jyãglo ll̄ëm kjoyoe. Nopga jëk ba kopshko ga ll̄ëye miyde lok ll̄ëme† le.

⁴⁵ Domer shãng kjlara eshko, kjok ll̄gwekklo tara Moisésdë li miydaga p̄jlú wleniyo. Eshko ga tjl̄ë Jesús kong ga «Tjlapga no pingga, ll̄ëye l̄ëp shãng li, e borwa barwoklo» le.

⁴⁶ Kuya ga tjl̄ë ba kong ga «¡Kjok ll̄gwekklo tara Moisésdë li miydagaga p̄jlú wleniyo, pjãy song jl̄õ, pjãy shdungko! Oba pimi l̄ongshko ga tjl̄okwo l̄ëmi ara li shãryëba uunkong ga äe. E so ll̄ebo kwing ä twëmi obl̄ë kong söya wlo kjoyoe. Shãryëmi eni, gueniyo pjãy om go omkjimtë ba sök ll̄ëm, bomi sakkwo go ëmdë ll̄ëm bakoe.

† **11:44** Fariseoga ikoba ga nopga p̄jlú wleniyo, gueniyo jl̄okoyo ga epga owa.

⁴⁷ ¡Pjãý song jlõ, pjãý shdungko! Dënashko ga Sbõ tjlõkwo lagaga, e zrõra bomi tjlapgararë ara, ga jnena lok. E ga pjãý eerishko ga lõng ba sak li poshãryë ber wolësowa wlo.

⁴⁸ E goshko ga pimi lõng oba uunkong kong ga pjãý wotjlík ga zrõra lok li, e pjlúe lëmi. Zrõra, jnena epgarë lok, ga pjãýda beno lõng ba sak shãryaga.

⁴⁹ »E kjĩshko ga Sbõ tjlëno ba kjok miydë li go. Tjlëno ga “Epga kong bor tjlõkwo lagaga ichër oblë oblë. Kjong kjong zrõya lok, kjong kjong shdũya lok, bokrotke lok ara” lara.

⁵⁰ E kjĩshko ga eerishko dbaryo sopga, pjãý shdũya Sbõrë, ba tjlõkwo lagaga zrõra lok tek dãmãrshko dwayo li kjĩshko,

⁵¹ soyara lok Abel go, äär jong Zacarías go. Zacarías, e zrõra lok Sbõ u jong li, õng sho sukklo jong li, e tjrëko. Lër bomi kong ga pjãý shdũya Sbõrë, llëbo shãryara lok ba tjlõkwo lagaga lõng kës kong li kjĩshko.

⁵² »¡Kjok llgwekklo tara Moisésdë li miydagaga pjlú wleniyo, pjãý song jlõ, pjãý shdungko! Pjãý opping kjok llgwekklo li go ara kjĩshko ga shji Sbõ miydë sorë miydëmi lõng pjlú, gueniyo lëmi ë kong llëme. Nopga oblë somi, Sbõ miydë lok llëm wlo, ga pjãý om go ëmdë ga Sbõ miydë lõng llëm bakoe» le.

⁵³ E irgo ga Jesús to eshko dwayo. E dbaryo jek lëkong ga no pinggaga kjok llgwekklo tara Moisésdë li go, fariseoga, e iirkono lok ara ba kong, ga llëbo kjakroke lok ara,

⁵⁴ tjlĩya lok wlo, rote lok llëbo lara li go wlo le.

Bangkjrëy li, e Sbö eröe

¹ E wopro ga oba tjwe jong tjwe jong träk llëm, sho llik llik lë. Eshko ga Jesús tjlë ba oppinggaga kong ga «¡Pjây sjëk fariseoga tjok, ba pjlung shosho uukklo wle tjok! ¡Epga Sbö tjlökwo söga jlökoyo le, gueniyo wotjlik owa ba pjlúshko!

² Llëbo shäryak lütshko kës li wen wëleshko. Llëbo jnek kës li wlëkoba pjire.

³ Eni ga tjlökwo loromi shkëshko li, e kukoba kjok shjiyshko. Tjlökwo loromi lütshko li, e kukoba kjone pogoshko.

⁴ »Pjeyoga. Lër bomi kong ga nopga bangkjrëmi llëme. Bomi doyo zröya lok ga pjlú, gueniyo llëye shärye lok bomi kong obi ga äe.

⁵ Bangkjrako li ë lër bomi kong. Sbö, e bangkjromirë dey. Pjây zröya ga pjlúe. E irgo ga pjây iche äär ber löng iök pjë jong ri ri sjer llëm shtoyo li roshko ga pjlú bakoe. Era bangkjrozïa.

⁶ »¿Sënwa kjwo shkëng (5) soynek dburwa kjwo pjök äska llëmdo? Eni ëmdë ga sënwa li woyojeya Sbörë kjwara llëme.

⁷ Pjâyda tjwlö ara, sënwa ara kjinmo. Bomi käkzong pjlobi shtara Sbörë pjir tjän. E kjïshko ga llëye bangkjrëmi llëme.

Shji lan oba tjok Jesús kjïshko

⁸ »Lër bomi kong ga pjây tjlëno oba kong ga pjây löng bor tjok loromi wleni ga no to ter kjok dogo dwayo ëre tjlë bor parkagaga kjok dogo so li kong ga pjây löng bor tjok lër eni bakoe.

⁹ Gueniyo pjây tjlëno oba kong ga pjây löng bor tjok llëme loromi wleni ga tja tjlë bor parkagaga li kong ga pjây löng bor tjok llëme lër eni bakoe.

10 »Ëye no to ter kjok dogo dwayo ëre lâywë owa ga owa 'li lõya Sbörë ber dret ga pjlúe. Gueniyo ëye Sbö Sëya lâywë owa ga owa 'li lõya llëme.

11 »Pjây shakoba, sökoba judíoga syõ uyo roshko, llëm ga tjlapgaga bokstoshko ga pjây woydë llëm, “¿Tja opwlikë sorë?” lëmi llëm, “¿Llëye lër?” lëmi llëm bakoe.

12 Pjây tjlëshko ga llëye lëmi wlo li, e twaga Sbö Sëyarë bomi kong eshko» le.

Domer dbur ara kjlara

13 Domer shäng kjlara eshko oba tjrëko, tjlë Jesús kong ga «Tjlapga no pingga, bor data wolono, ga ba llëbo beno tjeng li, e shdöya woydë bor shjiydë bor kong llëme. E kjishko ga los ba kong ga llëbo botoya li twe bor kong» le.

14 Kuya ga tjlë ba kong ga «¿Tja iaga ërë beno shäng bomi llgwega, bomi llëbo lëp li shdör wloro?» le.

15 Eshko ga tjlë oba kong ga «iPjây sjëke! Shji wotjlik llëbo tóng bayo ara wlo llëme. Shji wopjlú laga bi llëbo tjeng ara lirë llëme» le.

16 E irgo tjlëno ba kong llëbo jyãglo go. Tjlë ga «Domer shäng kjlara dbur ara wleniyo. Ba kjok buk li kjing go dwla dgara, ga bo kjrara arae.

17-18 Eni ga wotjlik ga “¿Tja orwë llong? ¿Bor dwla bo kjroror ara kjwe jner tjeng kjone? Bor dwla bo jnekklo uyo lok kjwe, e chilawa anmoyõ” le. Wotjlino sök dâw ga tjlë ga “Llëye shäryër miydër tjän. Bor dwla bo jnekklo uyo kjwe shdör, äska shäryër kësks anmoyõ. E roshko bor dwla bo kjwe jner tjeng pjir eshko, bor llëbo oblë oblë tjeng kjwe jner eshko bakoe.

19 Shäryoror eni pjir ga lër bor pjlúshko ga ‘Tja llëbo jnek tjeng ara, äär’lu pjloglo ara kong wlo. Tja woshtë, tja ië ara, tja ber wopjlúe’lër eni eshko já” le.

20 »Gueniyo ga Sbö tjlë ba kong ga “Pja kä llëme. Eeri shkëyo ga pja wolon. ¿Eshko ga bop llëbo jnenop tjeng’li ber ë kongdo?” le.

21 »Eni ga ëye dbur töng, jneya ber ba kong om go wlo, gueniyo llëbo tjwlō ara Sbö kong’li shärye llëm ga era kong, llëbo wen tjwe ba kong eni kjoyo bakoe» le.

Shji woydë llëme

22 E irgo ga Jesús tjlë ba oppinggaga kong ga «Lër bomi kong ga shji woydë llëme. Shji woydë dli kjÿy llëm, shwong kjÿy llëm bakoe.

23 Pjãylöng së, e tjwlō ara, bomi dli kjinmo. Bomi doyo, e tjwlō ara, bomi shwong kjinmo.

24 Sënwa so ëp uaga kjoyo li woyotjlÿzã. Dwla dgue llëm, bo kjre llëm, jneya ba jnekklo uyo roy llëm bakoe. Gueniyo sëya Sbörë. ¡Pjãyda tjwlō ara, sënwa kjinmo!

25 ¿Pjãy woydë ara ga llëye shimi e goro? Bomi’lu iëmi om go dbar kjwara obi ga äe.

26 ¿Eni ga llëbo chirawayo’li shäryëmi ga ä kuzong ga pjãy woydë llëbo oblë kjÿshko llënoró?

27 »Nana kjloshko so woyotjlÿzã. Parkë llëm, shwong sek llëm bakoe. Eni ëmdë ga löng wolësowa ÿyado. Lër bomi kong ga Pjlu Salomón llëbo ara anmoyō. Gueniyo doyono wolësowa, öötong nana kjloshko so ï dik llëme.

28 Kjö sho llë doye Sbörë eni, eeri ga lok pjlú, bong ga sukoba gueniyo. ¿Pjãy doye e kjinmo anmoyö llëmdo? ¿Pjãy mär Sbö go jlökoyo llëm ega?

29 »E kjĩshko ga shji woydë llëme. Shji woydë dli kjĩy llëm, di kjĩy llëm bakoe.

30 Llëbo tjeng kës ëre kjĩshko ga nopga Sbö miydë llëm wleniyo woydë arae. Gueniyo bomi Data, llëye woydëmi dö li miyde sök pjir tjän.

31 Sbö ber bomi pjluyo sorë li woyotjĩmi ara, llëbo oblë oblë kjinmo. Shãryëmi löng eni ga llëbo oblë woydëmi kës li ber bomi kong bakoe.

32 »Pjãy bor öng wlëp ushko so wleni. Pjãy ara llëm, gueniyo woyde Sbörë ga pjãy ber löng no ichagaga ba tjok, sök no pjluyo ãyado lishko. E kjĩshko ga llëye bangkjrëmi llëme.

33 Pjãy llëye tjok ga soynezĩ, ga dburyo twozĩ oba song wleniyo kong. Llëbo tjwlö ara li iëmi ber tjeng ba bapkwö roy kjok dogo, eshko ga llëbo li pjir llëm, lüyotkëba llëm, ue ba sëyarë llëm bakoe.

34 Bomi llëbo tjwlö ara li töng tjeng kjone ga pjãy wotjĩk eshko bakoe.

Shji ber löng bi kãgãyo koshë ãyado

35-40 »No to ter kjok dogo dwayo ëre tjwe llono miydëmi llëme. E kjĩshko ga pjãy ber löng bor koshë, poshãryak löng pjir ãyado. Woyde ga pjãy ber löng parkagaga löng ba kãgãyo koshë wleni. Ba kãgãyo li jek kjok shto oblë orkwosmozlong dbaryo shrëk. Woyde ga ba parkagaga löng ba ushko obi li ber löng ba koshë ãyado, wloshko iök borkek tjeng shjiy, tjwe iröng obishko ga wlokjre lok jekdo ga pjlú wlo. Tjwe kjok rong, llëm ga kjok ba shränto ëmdë ga woyde ga löng ba koshë eni. Ga shronoshko ga

epga wlēna lok eni ga e ber ba kong lok pjlúe. Lēr bomi kong jlōkoyo ga eni ga epga ie wlar'lōng sökklo go, iē wlo, ga dli shiya, sōya, twe ba kong lok om go.

»Tja kuzīa. Ēye tjwe lūrķē llono miyde u sogo lirē kjwe ga ēye opzrēk jek ba ushko llēbo lūyotķē wlo llēme. Ga no to ter kjok dogo dwayo ēre tjwe dbar llono miydēmi llēm kuzong ga pjāy ber lōng bor koshē, poshāryak lōng pjir īyado» le.

Parkaga pjlú, parkaga owa

⁴¹ Eshko ga Pedro tjlē ba kong ga «Tjlapga, ¿tjlōkwo lēp shāng li lēp shāng borwa kong dōre, de oba uunkong kong?»

⁴² «Parkaga ie ba pjlurē ber ba parkagaga oblē daga, sēya āar ba dloyo go kjok orē ga woyde ga parkaga llēye le ba kong li shārye eni wleniyo, kjok miydē ara bakoe. ¿Gueniyo ga kjre sorē?

⁴³ Tjwe irōng obishko ga parkaga wlēya ba pjlurē shāng ba pak shāryē pjlú li, e kongda ber pjlúe.

⁴⁴ Lēr bomi kong jlōkoyo ga era ie ba pjlurē ber shāng ba llēbo uunkong kägāyo.

⁴⁵ Gueniyo ga parkaga li wotjlik owa wleni ga ba pjlú tjwe maling llēme le wleni ga opyorgō to shāng parkagaga oblē shdung, ga glō ara, nēlōtkē ara bakoe.

⁴⁶ Eni wleni ga koshe shāng llēm dbaryoshko ga ba pjlú tjwe. Eshko ga parkaga owa li shdūya, iche jek nopga kā llēm wleniyo llamo tjeng lishko.

⁴⁷ »Parkaga llē, llēye woyde ba pjlurē li miyde pjlú, gueniyo shāryara eni llēm, ba tjlōkwo kolara llēm ga e shdungko, e shpokko ara bakoe.

⁴⁸ Gueniyo parkaga llē, llēbo owa shāryara, miydara llēm kjīshko ga era shdungko bako, gueniyo

e shpokko sira döe. Ëye kong llëbo twara ara ga kong llëbo roke ara, oblë kjinmo. Ëye kong llëbo iara beno tjeng ba wloshko ara ga kong llëbo roke, oblë kjinmo bakoe.

Shji moskwoga ara

⁴⁹ »Tja shrono shäng kjok ëre kjing go, iök borkek wlo wleni. ¡Ga woydër ga iök li pjë jong ri ri tjän!

⁵⁰ Tja kong llëbo wen tjwe owa kjluwe. E kjishko ga tja woydë ara, äär jong llëbo li shäryono bor kong pjir guing.

⁵¹ ¿Tja shrono shäng nopga ichë ber löng wlëp ëng tjok wlo lë mire? Eni llëme. Lër bomi kong ga tja shrono shäng no shdöga, ber löng dboy dboy wlo.

⁵² Eeri jek lëkong ga nopga tjeng u kjwaraso doglo shkëng (5) ga e shdär ber kjing pjök, kjrina doglo mya, kjrina do pjök, ga ber löng ëng moskwo.

⁵³ Dataga, ba wapga domerga, e ber löng ëng moskwo; mekëga, ba wapga walëga, e ber löng ëng moskwo; walëga, ba pjlaydoga, e ber löng ëng moskwo eni bakoe» le.

Llëbo wen li llë loklo

⁵⁴ Eshko ga Jesús tjlë nopga kong ga «Pjäng sho poyong jem pjang dlo jer shwo lëkong li ïmishko ga miydëmi e go ga shunyo shrë lëmi, ga shrë jlë.

⁵⁵ Pjluk tjwe kjok dogro no llëm shwo lëkong dwayo li kumishko ga miydëmi e go ga kjok kjlirkë lëmi, ga shäryë eni jlë.

⁵⁶ ¡Pjäy Sbö tjlökwo söga jlökoyo lëmi, gueniyo pjäy wotjlik owa bomi pjlushko! Llëbo wen kjok dogo, kjok ëre kjing go, e llë loklo miydëmi pjluë. ¿Eni ga llëbo shärye Sbörë eerishko dbaryo li, e llë loklo miydëmi llëm sorëro?

⁵⁷ »¿Llëye ber pjlú, llëye ber owa, e miydëmi llëmdë?

⁵⁸ Pjây sökoba no llgwega shwoy lëbashko ga pjây lan bomi söga li tjok bäm goshko, pjây ie ber tjeng tjlapga wloshko llëm wlo. Shäryëmi eni llëm ga pjây twe tjlapga lirë ba parkagaga kong, pjây shdûya wlo, ga pjây ie ber löng no shdûzlong uyo roshko.

⁵⁹ Lër bomi kong ga pjây opshik eshko dwayo llëm, äär jong dburwa kjöme lara bomi kong li potjwlënomi pjir guing» le.

13

Woyde ga llëbo owa shäryëy löng li, e owa jlöe lëy, ga rayëy

¹ Eshko ga nopga löng kjlöbö tjlë Jesús kong ga «Galilea sopga löng kjlöbö öng zrök, sho suya, pjë dret Sbö kong wlo. E wopro ga nopga ichara bi pjluyo Pilatorë ba zrök, ga zröra lok eshko» le.

² Kuya ga tjlë ba kong ga «¿Pjây wotjlîk ga Galilea sopga li zröraba, epga owa, nopga oblë ba kjokshko so kjinmo kjîshko lëmire?

³ Lër bomi kong ga eni llëme. Gueniyo llëbo owa shäryëmi löng li, e owa jlöe lozî, ga rayozîa. Llëm ga pjây pjir bakoe.

⁴ ¿E ga pjây wotjlîk ga nopga wolono Siloé kjokyo doglo sak kjwara kjingsho kjwong (18), ak sho jong kjökshko eshko li dgono jer ba kjing goshko li, e owa, Jerusalën sopga llamo li kjinmo lëmire?

⁵ Lër bomi kong ga eni llëme. Gueniyo llëbo owa shäryëmi löng li, e owa jlöe lozî, ga rayozîa. Llëm ga pjây pjir bakoe» le.

Kjor jong kjlara, botjyë llëme

⁶ E irgo ga tjlëno nopga kong llëbo jyäglo go. Tjlë ga «Domer shäng kjlara, kjor jong kjlara, ba kjillgwo bo ara kjokyo li tjrëko. Kjor li ko *higuera*. Dbar kjwara ga jek jëk shäng e go, bo tjokde ñya wlo, gueniyo bo drete.

⁷ Eni ga tjlë ba kjok daga li kong ga “Kuzong. Eeri ga öötong lu pjloglo mya ga kjor kjwe ñnshko ga bo wlën kjwara llëme. ¡Kjwe közong! ¿Shto kjrë jong ara llënor?” le ba parkaga li kong.

⁸ »Kuya ga tjlë ba kong ga “Tjlapga, wëyë. Rayos ber jong lu pjlara obi, sor pokër, ga dwlomner,

⁹ botjyëre ñy wlo, llëm ga köm eshko jã ga pjluë” le ba pjlu kong» le.

Woshtozlong dbaryo ga walë poptara Jesúsde kjlara

¹⁰ Woshtozlong dbaryo kjwara ga Jesús sök oba ping judíoga syõ uyo jong kjwara li roshko.

¹¹ Walë sök kjlara eshko, swlo ara lu pjloglo sak kjwara kjingsho kjwong (18) tjän, wloyo Ä sëya kjlararë. Walë li beno shäng wozöngë.

¹² Ñya Jesúsde ga rokara tek ba shwoy, ga tjlë ba kong ga «Pja döktong, pja rayara bop swlo wlerë» le,

¹³ ga orkwo iono ba go. Jekdo eshko ga walë li poptono beno shäng kjlo bek ba shtoshko. Ga opyono beno shäng Sbö poshrëk.

¹⁴ Gueniyo judíoga syõ uyo kägäyo li shäng eshko. Ñya ga iirkono ara, tjlë nopga löng li kong ga «Shji parkozlong dbaryo iak lok kjwo tjer (6). Pjãy poptë woydë ga pjãy tek eshko dbaryo ga pjluë. Gueniyo woshtozlong dbaryo lira llëme» le.

15-16 Kuya Jesúsde ga tjlë ba kong ga «iPjãý Sbö tjlökwo söga jlökoyo lëmi, gueniyo pjãý wotjlik owa bomi pjlúshko! Walë kjwe, e Abraham tjëyo, ga tjeng Ä wloshko eeri ga öötong lu pjloglo sak kjwara kjingsho kjwong (18). ¿Pjãý uunkong bomi öng dök, sömi di ië woshtozlong dbaryo llëmdo? ¿Eni ga walë kjwe döror Ä wloshko dwayo dbar ëreshko ga owa lëmi sorëro?» le.

17 Kuya ba wloyoga lirë ga lökkjrono ara. Gueniyo llamoga löng lira beno löng wopjlu, llëbo shäryara kës li kjishko.

Kjor dwlayo chirawa

18 Eshko ga Jesús tjlë löng li kong ga «¿Sbö ber no pjluoyo sorë, e so llë kjoyo? ¿Lër bomi kong sorë ga pjlú?

19 E so kjor dwlayo chirawa ko *mostaza* dgoroy klung roy kjoyoe. Kuno ga kësband, kjor wleni. Eshko ga sënwa llë usho ywë ba kowo go» le.

Pjlung shosho uukklo

20 E irgo ga tjlë ga «¿Sbö ber no pjluoyo sorë, e so llë kjoyo?

21 E so walë pjlung shosho llruno bayo ara ba uukklo tjok, ga ie ber buk uur wlo kjoyoe. Ba uukklo shdöktong pjlung shosho li kjwang jikong» le.

Kjër bäng bam chira

22 Jesús to jek shäng Jerusalén kjokyo wlo le. Eshko ga jëk shäng irbo goshko ga äär kjok kjrina kjrinishko ga slan oba ping.

23 Pjlara ga no kjlara llëbo kjakrokono ba kong. Tjlë ga «Tjlapga, ¿no kjre Sbörë där wlo li kjlëbö döre?»

24 «Pjây drön ëë, pjây opzrëk jek kjër bäng bam chira li go wlo. Lër bomi kong ga nopga ara opzrëk woydë jek e go wlo, gueniyo jek ga äe.

25 U sogo li u bäng bängzano pjir ga pjây beno löng kjoko li, u bäng li porwëmi kjöw kjöw, ga öö lëmi, pjây tjlä ga “Tjlapga, u bäng dös borwa kong sira” lëmi eni.

»Kuya ga tjlä bomi kong ga “Pjây ë, pjây kjone so, e miydër llëme” le.

26 »Eshko ga pjây tjlä ba kong ga “Dënashko ga tjawa iono bop tjok, ga oba pinop borwa kjokshko bakoe” lëmi eni.

27 »Kuya ga tjlä bomi kong ga “Pjây ë, pjây kjone so, e miydër llëme. Pjây llëbo owa shäryaga eröe. Pjây opkjos bor shwoy ëre dwayo” le.

28-29 »Eshko ga Abraham, Isaac, Jacob, Sbö tjlökwö lagaga löng kës li, e ber löng Sbö sök no pjluvo iyado lishko. Ga nopga kjok kjwang jïkong so sirkek äär ber löng ië ba tjok. Ìmi eni ga pjây iak beno tjeng kjoko kjïshko ga pjây ber tjeng slar eshko, kowo uë, llëbo bang ara bomi kong kjïshko.

30 Eerishko ga kjong kjong tjwlö ara li, e ber löng tjwlö chira eshko. E ga eerishko ga kjong kjong tjwlö chira li, e ber löng tjwlö ara eshko» le.

Jesús slatong Jerusalén sopga kjïshko

31 Eshko ga fariseoga shrono löng kjlëbö, ga tjlä ba kong ga «Pjïu Herodes, pja zröya woydë. E kjïshko ga pja nom jÿy dwayo» le.

³² Kuya ga tjlẽ ba kong ga «Domer lëmi löng li, e oba jyãpgwaga erä. Pjãy nom ba shwoy, ga pjãy tjlẽ ba kong ga “Eeri, bong ga tja shäng Ä sëyaga tjeng oba goshko li ichë to, ga tja shäng oba poptë bakoe. Pak shäryër wlo li, e pjir kjönma” lëmi ba kong eni.

³³ Gueniyo ga eeri, bong, kjönma ga tja to jek shäng Jerusalén kjokyo wlo. Tek këgongshko ga Sbö tjlökwo lagaga zröraba shtoyo eshko.

³⁴ »JJerusalén sopga, tja kuzĩa! Sbö tjlökwo lagaga zrömi. Sbö tjlökwo roy lagaga ichara bomi kong li lömi ak go, zrömi wlo. Woydoror enido ga pjãy tön, kjörkö meyo ba wapga tönö tjeng ba sjägä dirko wleni, gueniyo woydoromi llëme.

³⁵ Tja kuzĩa. Bomi u, e raye Sbörë ber jong tjoksa. Lër bomi kong ga tja ëre ïmi ame, äär jong pjãy tjlẽ löng ga

»“Kjwe ichara Tjlapgarë tjwe kjok ëreshko.

Kjwe kjimte Sbörë”* lëmi löng guing» le.

14

Woshtozlong dbaryo ga swlo poptara Jesúsde kjlara

¹ Woshtozlong dbaryo kjwara ga Jesús öötong shäng fariseo tjwlo ara wleniyo, e ushko, ië ba tjok wlo. Nopga löng eshko li löng ba dë, llëye shärye li ïya lok yõtso wlo.

² Domer sök kjlara eshko swlo ara, poglo dguë do jikong.

³ ïya Jesúsde ga tjlẽ fariseoga löng li kong, kjok ilgwekklo tara Moisésde li miydagaga pjlu wleniyo

* 13:35 Salmo 118.26.

lõng li kong ga «¿Woshtozlong dbaryo ga shji swlo poptë ga pjlúre?» le.

⁴ Kuya lok ga beno lõng kjing erä. Eni ga Jesús orkwo iono swlo li go, ga poptara, tjlë ba kong ga «Pja nom ga pjlúe» le. Kuya ga toe.

⁵ Eshko ga Jesús tjlë nopga li kong ga «¿Bomi wa, bomi õng, e lono di bång roshko woshtozlong dbaryoshko ga shimi jekdo maling llëmdo?» le.

⁶ Kuya lok ga dboryara llëm, beno lõng kjing erä.

Shji manabashko ga shji llë shäryë

⁷ E irgo ga ãya Jesúsdë ga nopga mak li shrono lõngshko ga sökklo wlëya lok pjlú wleniyo, oba tjwlõ ara tjeng lishko. Eni ga tjlëno ba kong llëbo jyäglo go. Tjlë ga

⁸ «Ëbo orkwosmok wlenishko ga pja mana ië ba tjokshko ga pja jek sirkek sökklo kjing, oba tjwlõ ara tjeng lishko llëme. No tjwlõ ara bop kjinmo tjwe shång eshko wleni ga

⁹ bomi maga li tjwe tjlë bop kong ga “Pja kojõzong. Sökklo kjwe twos kjlara wle kong” le kjwe. Eshko ga pja lötkë ara, ga pja ber sök sökklo tjeng iröng wleniyo kjing go shara.

¹⁰ »Pja manabashko ga pja shronoshko ga pja jek sirkek sök sökklo tjeng iröng wleniyo kjing go dey. Eni ga bop maga li tjwe tjlë bop kong ga “Tjlapga, pja tjwlõ ara. Pja tek sirkek sök sökklo ëre pjlú anmoyõ kjing go shara” le bop kong eni kjwe. Eshko ga pja ikoba ga pja tjwlõ tjok.

¹¹ Ëye opyë ber tjwlõ ara ga iëba ber tjwlõ llëme. Ëye opyë ber tjwlõ llëm ga iëba ber tjwlõ ara» le.

¹² Eshko ga tjlë ba maga li kong ga «Pja dli shäryono bayo arashko ga woyde ga oba llëbo ara wleniyo mapdë dö llëm, bop pjeyoga mapdë dö llëm bakoe. Shäryorop eni wleni ga dbar oblë go ga pja kjwe kar maya eni bakoe. Eshko ga pja potjwlëkkïo tjok.

¹³ Pja dli shäryono bayo arashko ga nopga song wleniyo, nopga jëk llëm wleniyo, nopga jëk yökyök wleniyo, nopga kjok ïgö llëm wleniyo, e mapdë dey.

¹⁴ Epgara, pja potjwlëya ga äe. Gueniyo shäryorop eni wleni ga pja ie Sbörë ber wopjlú, ga pja potjwlëga erë, nopga pjlo bek li woshre iröng obi dbaryo lishko» le.

Nopga mana domerdë ara, ië ba tjok wlo

¹⁵ Eshko ga sirkeno sök kjlara ba tjok eshko li tjlë ba kong ga «¡Sbö ber no pjlyuo dbaryo öötongshko ga ëye öötong sök ië ba nopga tjok eshko li ber wopjlú!» le.

¹⁶ Kuya ga tjlë ba kong ga «Domer shäng kjlara, nopga mana träk llëm, tjwe ba ushko ië ba tjok wlo, ga opyono beno shäng dli shäryë ba kong bayo ara.

¹⁷ Öötong iozlong dloyo go ga ba parkaga ichara kjlara, tjlë nopga mana li kong ga “Pjäy tegö. Dli kwirkonoe” le eni.

¹⁸ »Gueniyo kuya lok ga kjlara kjlara llëbo wlëno, jek mana lishko llëm wlo. Bäm go li tjlë ga “Tja kjok tjwlëno kjrina. Tja jongya ba ïk. Tja jnep kësbange” le.

¹⁹ »Kjlara obi tjlë ga “Tja sögla klung workwoklo dopshiga wleniyo tjwlëno doglo sak kjwara (10). Tja jongya ba tjlik. Tja jnep kësbange” le.

20 »Kjłara obi tjlẽ ga “Tja orkwosmok sök eeri jã. Tja jek ga äe” le.

21 »E irgo ga parkaga li tek shrono shäng iröng obi ba pjluyo shwoy, ga roy lara ba kong pjire. Kuya ga iirkono ara, ga tjlẽ ba kong ga “Pja to u'lok ara wleniyo tjrëko, irbo pjlara pjlara bäng go, irbo chilawa oblẽ oblẽ bäng go bakoe. Eshko ga nopga song wleniyo, nopga jëk llëm wleniyo, nopga kjok ïgö llëm wleniyo, nopga jëk yökyök wleniyo, e tek söba” le.

22 »Shäryara eni pjir ga shrono tek shäng iröng obi, tjlẽ ba pjluyo kong ga “Tjlapga, llëye lorop bor kong li shäryoror pjire. Gueniyo iozlong shtoyo obie” le.

23 »Kuya ga tjlẽ ba kong ga “Pja nom nopga wlëk kjok shto oblẽ shara. Pja to u'lok kjwöbö kjwöbö wleniyo tjrëko. Eshko ga ëye wlënop ga ichëp tek bor ushko, bor u'ëre dlin ber jong tjung wlo.

24 Lër bop kong ga nopga manor löng bäm go li, bor dli li ue sira llëme” le ba parkaga kong” le.

Shji jëk Jesús tjok wlo li, e tjwlö tjok

25 Jesús jek jëk shäng irbo go, ga oba jëk löng ba tjok ara. Eni ga bojono iröng, tjlẽ ba kong lok ga

26 «Ëye jëk woydë bor tjok jlökoyo ga woyde ga ba data, ba mekë, ba wapga, ba pjeyoga uunkong, e ie ber woyo ba kong ame. Woyde ga wotjlïk ga “Tja wolonde, de tja wolon llëmde, tja jëk ba tjok” le ïyado bakoe. Shärye eni llëm ga e ber bor oppingga ga äe.

27 Woyde ga llëye shäryëba ba kong bor kjïshko llë pogoshko li, e zrökoba pjang kjlös go ëmdë ga

e ba kong ga llëye llëme le. Eni llëm ga e ber bor oppingga ga ä bakoe.

28 »¿Pjãy kjlara wotjlik ak sho shäryë jong kjókshko wleni ga pja sirkek sök ba woyotjlik ga “¿Tjwíõ kjöm? ¿Dburyo kjwõrde?” lëp bäm go llëmdo?

29 Eni llëm ga u shakklo li shäryorop pjirshko ga dbur pjir eshko wleni ga pja ikoba ga pja joywëba,

30 tjlä ga “Domer kjwe ba pak soyono, ga kjra lara ga pjitong llëm ïzia” lëba eni.

31 »¿Pjlu llë opshik jek ba ëngkjwagaga doglo sak dbäw dbäw pjloglo sak kjwara (10,000) tjok, ëngkjwë pjlu oblë tjok wleni ga ïya ga pjlu oblë li ëngkjwagaga doglo sak dbäw dbäw pjloglo sak pjök (20,000) wleni ga llëye shärye eshko lëmi? ¿Wotjlik ga “¿No kjwõrde? ¿Shji ëngkjwë ba tjok sorë? ¿Shji kjangde, de llëmde?” le eni llëmdo?

32 Eni ga “Shji songe” le wleni ga pjola obishko ga nopga iche jek kjlobö, lan pjlu oblë li tjok wlo, ie ber sök wlëp wlo, ëngkjwë ba tjok llëm wlo.

33 Bomi llëbo tjeng kës li iëmi ber iröng llëm ga pjãy ber bor oppingga llëm eni bakoe.

34 »Dlungna, e pjluë. Gueniyo ga pjlä ameshko ga iëy ber pjlä ba shtoy iröng obi ga äe.

35 Eshko ga llëno ame, ioroy klung kjing go ëmdë ga llëno llëme. E dbukko erä. Eye kwomgwo tjok ga wyoyde ga kuya yõtso» le.

15

Öng wlëp ushko so jeno kjlara

¹ Jesús shäng oba ping wopro ga nopga dbur tönnga Roma so kong, nopga owa wleniyo oblë, e shrono löng ara ba kuk eshko.

² Fariseoga, no pinggaga kjok ilgwekklo tara Moisésdë li go, e löng eshko kjlöbö bakoe. Nopga owa li ñya lok ga tjlä ëng kong ga «Nopga wotjlik owa wlokjre, ga ië ba tjok bakoe» le.

³ Eni ga Jesús tjläno ba kong llëbo jyäglo go. Tjlä ga

⁴ «¿Pjäy kjlara öng wlëp ushko so tjeng doglo sak dbäw (100), ga kjlara jeno wleni ga llëye shäryëp eshko? ¿lamo sak shkaw kjingsho shkaw (99) li iëp ber tjeng ba kjok kjing go, ga pja to jeno li wlëk, äär jong wlënop guing llëmdo?

⁵ Wlënopshko ga pja wopjlúe. Eshko ga iëp buk bop dbopdo,

⁶ söp tek iröng bop ushko, ga bop pjeyoga rokëp uunkong tek eshko. Ga pja tjlä ba kong lok ga “Bor öng jeno li wlënore. Tja wopjlúe. Woydër ga pjäy ber wopjlú botoya dik bakoe” lëp eni.

⁷ »Eni bakoe. Lër bomi kong ga no kjlara, llëbo owa shärye shäng li, e owa jlõe lara, ga rayarashko ga kjok dogo ga löng wopjlú ba kjishko. Eshko ga nopga pjlo bek doglo sak shkaw kjingsho shkaw (99) li, era woyotjliya lok ara llëme.

Dbur jeno kjwara

⁸ »¿Walë shäng kjlara, dbur tjeng kjwo sak kjwara (10) ga jeno kjwara wleni ga llëye shärye? ¿lök borkeya, ga u ro pjloke yötso, ba dbur jeno li wlëna guing llëmdo?

⁹ Wlënashko ga ba pjeyoga roke tek eshko uunkong. Ga tjlä ba kong ga “Bor dbur jeno li

wlënore. Tja wopjlúe. Woydër ga pjäy ber wopjlú botoya dik bakoe” le eni.

¹⁰ »Eni bakoe. Lër bomi kong ga no kjlara, llëbo owa shärye shäng’li, e owa jlõe lara, ga rayarashko ga Sbö parkagaga kjok dogo so löng wopjlú eni bakoe» le.

Wa jeno kjlara

¹¹ Eshko ga tjlë ba kong obi ga «Domer sök kjlara wapga do pjök.

¹² Pjlara ga ba wa miteyo tjlë ba data kong ga “Data, bop llëbo ber bor kong llono wlo’li twos bor kong jekdo” le. Kuya ga ba llëbo tjeng kës’li shdöra ba wapga do pjök’li kong.

¹³ »Dbar kjwöbö ga ba wa miteyo li, llëbo twara ba kong’li soynena pjir, ga dburyo söra jek ba tjok, öötong beno sök kjok shto oblë pjolae. Eshko ga ba dbur’li zana, to shäng sorë pogo.

¹⁴ Zana pjirshko ga kjok shäng lishko ga pjli shrono kësbang, ga llëye wlëya, ue wlo drete.

¹⁵ »Eni ga to shäng pak wlëk domer kjok eshko so kong, ga kong pak twara, ichara köchi dë ba kjokshko.

¹⁶ Parkëshko ga pjli ara, köchi dli worbo li ue woydë, gueniyo twëba ba kong llëme.

¹⁷ »Eni ga wotjlík tjwe kjlay ga “Bor data ushko ga dli träk llëm, ba parkagaga löng kës’li bö tjung iyado, ga dli ber obie. ¡Na ga tja sök wolonto pjirirë!

¹⁸ Tja to bor data shwoy iröng obi dey. Tja äär eshko ga lër ba kong ga ‘Data, tja llëbo owa shäryono Sbö kong, bop kong bakoe.

¹⁹ Bek ga tja tjwlö bop wa dik ame. Tja ios ber bop parkaga wleni dey’lër ba kong eni” le.

20 Eni ga to sök lishko dwayo, jongya ba data shwoy.

»Jek shäng ääto ga ña ba datarë pjola dwayo, ga songe le. Jekdo eshko ga jek zron jong ba wlojkrë, popjlura, ga lõ shira.*

21 »Eshko ga ba wa'li tjlä ba kong ga “Data, tja llëbo shäryono owa Sbö kong, bop kong bakoe. Bek ga tja tjwlö bop wa dik ame” le.

22 »Eshko ga ba data tjlä ba parkagaga löng li kong ga “Pjäy shwong shis maling, pjlu wleniyo, ga doyozi e go. Kong sakkwo ioklo iozi kjwara, drepkwota iozi bakoe.

23 Söglä llgwoklä kjlo pjlu wleniyo li tek sözi, ga zrözi. Shji dli shäryë, ba shrëkklo.

24 Bor wa ëre shinmotkonoe loror, miga shäng së. Jenö bor shjiryo, gueniyo shrono shäng iröng” le. E irgo ga kjarga löng ba shrëk.

25 »E wopro ga ba wa këguëyo shäng parkë kjloshko. Tek shäng iröng tjwayde ushko ga kuya ga oba löng bërë.

26 Eni ga parkaga rokara kjlara, tjlä ba kong ga “E llëro?”

27 »“Bop löng shäng së, shrono shäng pjluë. E kjishko ga söglä llgwoklä kjlo pjlu wleniyo li zröra bop datarë ba shrëkklo” le.

28 »Kuya ga iirkono, opzrëk jek woydë u roshko llëme. Miydara ba datarëshko ga opshino jek ba wlëpyotkë, opzrëk wlo.

29 Gueniyo tjlä ba data kong ga “Miydëp pjlu ga tja parkë shäng bop kong luyo ara, pja kolër ñyado.

* 15:20 *Lö shik* lanyo, e tak pjang Génesis 27.26 go.

Eni ëmdë ga tja kong shwling ushko so chirawa tworop bor kong, tja opshrëk bor pjeyoga tjok wlo pjlara llëme.

³⁰ Gueniyo bop wa bopoya, bop dbur zana dret walëga owa wleniyo tjok li, era kong sögla llgwoklë pjlú wleniyo li zrörop” le.

³¹ »Kuya ga tjlë ba kong ga “Pja sök bor tjok ïyado, bor llëbo tjeng kës li, e bopoya.

³² Gueniyo bop lëng, e shinmotkonoe loror, miga shäng së. Jenö bor shjiryö, gueniyo shrono shäng iröng obi. E kjïshko ga shrëy llëm ga äe” le ba kong» le.

16

Parkaga kägäyo kjok miydë ara, wotjlik maling wleniyo

¹ Eshko ga Jesús tjlë ba oppinggaga kong ga «Domer shäng kjlara dbur ara. Domer li parkaga shäng kjlara, ba parkagaga tjeng kës li kägäyo. E rotaraba ga ba pjluyo li dbur zäya ara sorë pogo.

² Eni ga rokara ba pjluyorë tek ba shwoy, ga tjlë ba kong ga “Pja bor dbur jek shäng ara lëba. ¿E sorëro? Llëbo soynenop kjöm, tjwlnënop kjöm, e kjibokwoyo twos bor kong, bor llëbo dorop sorë li miydër wlo. Pja ber shäng bor parkaga kägäyo ame” le.

³ »Kuya ga wotjlik ga “Tja ie bor pjluyorë ber shäng pak drete. Tja parkë kjloshko ma, ga tja to shäng dbur rokë ga tja lök ara. ¿Era tja orwë llong?

⁴ Woydër ga tja pak llëmshko ga tja wlokjrëba ba ushko. ¿Gueniyo llëye shäryër ga pjlú? Äã, llë miydoror tjän” le.

⁵ »Eshko ga ë pogo tjwlõ ba pjluyo kong li, e rokara tek ba shwoy. Ga tjlẽ shrono shäng bäm li kong ga “¿Pja pogo tjwlõ bor pjluyo kong kjöm?”

⁶ »“Tja pogo tjwlõ kjoyo bayo ba bapkwõ kësbandjung wleni kjwo sak dbäw (100) dik”* le.

»Kuya ga tjlẽ ba kong ga “Bop tjwlõ kjöme li kjibokwoyo ëre kjrozong. Pja sirkes maling, kjibokwo tos kwara oblẽ, gueniyo kjoyo bayo ba bapkwõ kësbandjung wleni kjwo sak shkëng (50) dik” le.

⁷ »E irgo ga tjlẽ shrono shäng kjlara obi li kong ga “¿Pja pogo tjwlõ ba kong kjöm?”

»“Tja pogo tjwlõ dwla bayo ba bapkwõ kësbandjung wleni kjwo sak dbäw (100) dik” le.

»Kuya ga tjlẽ ba kong ga “Bop tjwlõ kjöme li kjibokwoyo ëre kjrozong. Kjibokwo tos kwara oblẽ, gueniyo dwla bayo bapkwõ kësbandjung wleni kjwo sak kwong (80) dik” le.

⁸ »Roy kura ba pjluyorë, ga wotjlik ga “Bor parkaga kägäyo li wotjlik owa ëmdë ga kjok miydë ara, wotjlik malinge” le. Nopga Sbõ miydë llëm wleniyo omshäryë eni bakoe. Llëbo tjeng kjok ëre kjing go pakyo shärye lok pjlú wlo ga epga wotjlik maling, nopga Sbõ i li kjinmo.

⁹ »Lër bomi kong ga pjäy dbur tjok ga zãzĩ oba kjimtoklo, epga ber wopjlú bomi tjok wlo. Eni ga bomi dbur pjitongshko, pjäy wolonoshko ga pjäy wlokraga tjok kjok dogo, shji sök së iyado lishko.

* **16:6 Kjoyo bapkwõ kësbandjung wleni kjwo sak dbäw (100) dik, e bayo litro sak dbäw dbäw pjiloglo mya kjingsho sak dbäw pjiloglo kjäk (3,700) dik** loklo.

10 »Ëye kong llëbo twëy tjwlõ chira ga de pjlú wleni ga miydëy e go ga kong llëbo twëy tjwlõ ara ga de pjlú eni bakoe. Ga ëye kong llëbo twëy tjwlõ chira ga de ma wleni ga miydëy e go ga kong llëbo twëy tjwlõ ara ga de ma eni bakoe.

11 Eni ga bomi dbur, bomi llëbo, e doromi pjlú llëm kjok ëre kjing goshko wleni ga llëbo tjwlõ ara tjeng kjok dogo li twaga ërë bomi kong llëme.

12 ¿Ga llëbo oma i li doromi pjlú llëm ga llëbo twe oblërë ber bomipjõy wlo sorëro?

13 »Ëye parkë pjluyo do pjök kong ga äe. Shärye eni wleni ga kjlara woyde, kjlara woyde llëme. Ber pjlú kjlara tjok, ber owa kjlara tjok. Pjäy wo pjang dbur go iyado ga pjäy parkë Sbö kong ga äe» le.

14 Fariseoga löng eshko kjlëbö. Dbur sïyo kjishko ga tjlökwo li kuya lok ga joywakza lok tjä tjä erä.

15 Eni ga Jesús tjlä ba kong ga «Pjäy llëbo shäryë ara oba bokso, pjäy pjlúe lëba wlo. Gueniyo pjäy wotjlik llëli miyde Sbörë pjire. Nopga kong ga llëbo tjwlõ ara le li, e Sbö kong ga llëbo owa anmoyõ.

Kjok llgwekklo tara Moisésdë li, Sbö ber no pjluyo sorë li, e roy

16 »Kjok llgwekklo tara Moisésdë li, tjlökwo tara Sbö tjlökwo lagaga tek dënashko sorë li, e beno bi kong, kolëy wlo, äär jong Juan No Waga shrono guing. Eshko tek lëkong ga Sbö ber no pjluyo sorë li roy pjlú shdöktong ara, ga nopga drön ëë, Sbö ber ba pjluyo wlo.

17 Gueniyo kjok llgwekklo li, e pjir wlo llëme. Kjopkwo, kjok ëre, e pjir ber dret, gueniyo ga tjlökwo tak lok kjok llgwekklo go li löngko kjwara llëme.

Shji ëng rayë

¹⁸ »Domer ba boy rayono, ga orkwosmono oblë tjok wleni ga llëbo owa shäryayde. Ga ëye orkwosmok walë rayak sök li tjok ga llëbo owa shäryayde bakoe.

Lázaro, e ga domer dbur ara kjlara

¹⁹ »Domer shäng kjlara dbur ara, doyë shwong pjlú, wolëso go. Dbar kjwobi go ga bë shärye kësbang, dli opzang ï.

²⁰ Eshko obi domer sök kjlara ko Lázaro, poglo go ũta ara do jïkong, sirkek sök töshko, domer dbur ara li u bäng zlong.

²¹ Sök oma dli worbo lon töshko li koshë, ue wlo, pjli ara kjïy. Shjiti llë tjwe ba zlong bäng ba ũta li shuk.

²² Dbar kjwara ga domer song li wolono, ga ba sëya söra Sbö parkagaga kjok dogo sorë öötong sök Abraham zlong.

»E ga domer dbur ara li ëmdë ga wolono bako, jnenaba to sakshko.

²³ Ga ba sëya öötong sök iök pjë jong ri ri sjer llëm shtoyo li roshko. Eshko ga song, suya iökdë, bang ara. Eni ga ïya jem pjola dwayo ga Abraham bë sök Lázaro tjok,

²⁴ ga öö le, tjlë ba kong ga “ïkjokë Abraham, tja songe lozong! Tja suya iökdë, bang ara. E kjïshko ga Lázaro kjwe ichos ba sakkwo dbo pök di go, tek di smoktong ba go li sök bor kong iër wlo, bor kjyorkwo zëya wlo” le.

²⁵ »Kuya ga tjlë ba kong ga “Pja wotjlïs sira. Pja sök kjok kjing go obishko ga pja öör sök owa llëme.

Lázarora öör songe. Eerishko ga sök wopjlu jushko, ga pjara sök song, suya iökdë, bang ara.

²⁶ E pjlor kar go ga jushko kjok tjrëk pjang ojong kësbang, borwa shwo lë, bop shwo lë bakoe. E kjishko ga ëye jek ga ä, ëye tek ga ä bakoe”le.

²⁷ »Kuya ga tjle ba kong ga “Kjokë, rokër bop kong ga Lázaro kjwe ichos bor data ushko,

²⁸ kjok owa anmoyö ëre roy sök bor lëmga doglo shkëng (5) löng eshko li kong, tjwe kjok ëreshko llëm wlo”le.

²⁹ »Kuya ga tjle ba kong ga “Llëme. Epga kong kjok llgwekklo tara Moisésdë li beno tjeng ba kong, tjlokwo tara Sbö tjlokwo lagaga tek dënashko sorë li beno tjeng ba kong bakoe. Woyde ga e kolayde lok”le.

³⁰ »Kuya ga tjle ba kong ga “E kole lok llëme. Gueniyo ëbo wolono, ga woshrono iröng obi, ga jek lan ba tjok wleni ga llëbo owa shärye löng li, e owa jlöe le, ga raye eshko”le.

³¹ »Kuya ga tjle ba kong ga “Moisés tjlokwo, Sbö tjlokwo lagaga tjlokwo, e kjre lok llëm ga ëye wolono, ga woshrono iröng obi li tjlokwo kjre lok llëm bakoe”le ba kong eni»le.

17

Shji oblë ichë llëbo owa shäryë llëme

¹ Eshko ga Jesús tjle ba oppinggaga kong ga «Llëbo tjeng ara, pjây iche llëbo owa shäryë wlo. E ber eni iyado. Gueniyo ëye oblë ichono llëbo owa shäryë ga era song jlö, shdungko.

² Kjwozirwa bor tjlokwo kjraga kjlara ichayde llëbo owa shäryë llëm obishko ga ba ichaga li

shakko, apkwo kësband pjrikko ba bêngshko, ga dbukko jer dlung dorong dey.

³ E kjîshko ga pjây sjêke.

»Bop kjlara, e llëbo owa shäryono ga pîzong, “Shäryëp eni ame” los ba kong. Eni ga “E owa jlõe. Shäryër ame” lara bop kong wleni ga llëbo shäryara owa li ios ber tjwlõ llëme.

⁴ Dbar kjwara ga llëbo shäryara bop kong owa pjloglo kjäk (7) ëmdë ga tjwe bop shwoyshko ga tjlë bop kong ga “E owa jlõe. Shäryër ame” leshko ga owa li ios ber tjwlõ llëme» le.

Shji mär Sbö go ga shji llëbo shäryë kësband ga pjlúe

⁵ Eshko ga Sbö tjlõkwo roy lagaga ba äska li tjlë ba kong ga «Tjawa mär löng Sbö go. Tjawa kong dbo twos, tjawa mär ba go jek këgong wlo» le.

⁶ Kuya ga tjlë ba kong ga «Dwlagwo chirawayo ëmdë ga kun jem ga pjlúe. Eni wleni ga pjây mär Sbö go sirawa dö ëmdë ga pjây tjlëno kjor kësband kjwe kong ga “Pja opshis ëre dwayo, pja nom wen jong dlung roy” loromi ga pjây kole, ga shäryë eni.

Shji parkë Sbö kong sorë

⁷ »Pjây kjlara, parkaga shäng kjlara wleni ga brik shäng klung workwë, llëm ga öng dë. ¿Tjwe shäng iröng bop shwoyshko ga llëye lëp ba kong eshko? ¿Pja tjlë ba kong ga “Pja tegö. Pja sirkes sök ië jekdo” lëp ba kong enire? Eni llëme.

⁸ Pja tjlë ba kong ga “Bor dli shäryos bor kong jekdo. Pja poshäryos, pja shwong skwos stek wleniyo, bor dli pjlorguëp bor kong wlo. Tja iono pjir ga ië pja shara” lëp ba kong eni dani.

9 ¿Shäryara bop kong eni pjir ga pja tjlẽ ba kong ga “Tja kjimtorop ara, tja wopjlu bop tjok” lëp ba kong enire? Eni llëm bakoe.

10 Pjã parkaga eniyo wleni bakoe. Pjã ichara Sbörë parkë ga pak li shäryoromi pjir ga woyde ga pjã tjlẽ ga “Tjawa tjwlõ ara llëme. Tjawa parkaga eröe. Llëye lara Sbörë borwa kong li shäryorwarë erä” lëmi eni» le.

Domerga poglo go swlo ara, sho an do jïkong wleniyo poptara Jesúsdë doglo sak kjwara (10)

11 Jesús jek shäng Jerusalén kjokyo wlo lëshko ga jëk shäng Samaria kjokyo, Galilea kjokyo, e tjrëko.

12 Jek äär shäng kjok kjrïnashko ga domerga wen tjeng doglo sak kjwara (10), poglo go swlo ara, sho an do jïkong wleniyo. Tek shrono löng pjola sit,

13 ga öö le, tjlẽ ba kong ga «¡Tjlapga Jesús, tjawa songe lozong!» le.

14 İya ga tjlẽ ga ba kong lok ga «Pjã nom opping syõshtagaga Sbõ kong ba pjeyoga kjïshko li kong, pjã İya lok wlo» le.

Jek löng jëkko wopro ga poptonoe.

15 Kjlara opïno ga beno drëpdrë, sano iröng, ga Sbõ poshrëya shäng pjluk ara.

16 Eni ga jek öötong shäng Jesús zlong bäng ga kjök tonö, kujuno bokdo kjlay klung go, ga tjlẽ ba kong ga «Tja poptorop. Tja beno wopjlu bop tjok e kjïshko» le. Domer li, e Samaria so.

17 Kuya ga tjlẽ nopga löng li kong ga «¿Domerga poptono, e doglo sak kjwara (10) llëmdo? ¿Llamo doglo shkaw (9) li kjwono llong?

18 Domer ëre Samaria so, e judío llëme. Era shrono iröng obi Sbö poshrëk. ¿Judíogara kjwono llong?» le.

19 Eshko ga tjlë domer li kong ga «Pja kojözong. Pja nomo. Pja mär bor go kuzong ga pja poptonoe» le.

Sbö ber no pjluyo dbaryo

20 Pjlara ga fariseoga kjone kjone tjlë Jesús kong ga «¿Sbö ber no pjluyo wlo'li, e dbaryo tjwe llono?»

«Sbö ber no pjluyo li, e llëbo ïkko wleni llëme.

21 “Sbö, e no pjluyo shäng ïzong” lëy ga äe, ïgöy llëme. Sbö ber no pjluyo li, e llëbo wen bomi pjlúshko» le ba kong.

22 Eshko ga tjlë ba oppinggaga kong ga «Dbar tjwe kjwara ga no to ter kjok dogo dwayo ëre ïmi woydë ara jek pjlara obi. Gueniyo eshko ga tja ïmi llëme.

23 Eshko ga no tjwe shäng tjlë bomi kong ga “¡Shäng na ïzia!” le. Oblë tjlë ga “¡Shäng kjwe!” le bomi kong, gueniyo jlö lëmi llëm, pjây jek eshko llëme.

24 Tja tjwe iröng obishko ga e ber so llgwllëng ller kälä lletllet kjok dogo llaw pogo kjoyoe. Eni ga tja ïga nopga uunkongdë wëllëe.

25 Gueniyo e bäm go ga tja shdungoba ara guing. Tja wlokjre nopga löng eerishko dbaryo lirë llëme.

26 »No to ter kjok dogo dwayo ëre tjwe iröng obi döröshko ga llëbo shäryë kjok ëre kjing go li, e ber so llëbo shäryono Noé dbaryoshko li dik.

27 Eshko ga kjok ëre pitë llëm obishko ga nopga to löng wlëp dli uë, di ië, orkwosmok ëng tjok, öötong Noé opzrëno jem kjoyong kësband roshko

dbaryoshko. Eshko ga shunyo shrono kësbang, ga nopga li söra dirë, shtena drete.

²⁸ »Lot dbaryo ga nopga opshäryono eni bakoe. To löng dli uë, di ië, llëbo tjwlëk, llëbo soynek, dwla dguë, u ywë, beno löng llë le.

²⁹ Gueniyo Lot opshino Sodoma kjokyo dwayo irgo ga akkwo lono ter iök, shunyo shrono wleni, ga nopga li pjira drete.

³⁰ Ga tja wen obishko ga shäryë eni bakoe.

³¹ »Eshko dbaryo ga ëye sök ba u dbo kjing sdok li kjing go ga jek llëbo beno tjeng ba u roshko li kjrë llëm, tök jekdo dey. Eye shäng ba kjokshko ga jek ba ushko iröng, llëbo beno tjeng li kjrë llëm bakoe.

³² Llëye weno Lot boy kong dënashko li woy-otjlizä.

³³ »Eye wotjlik opdë om go, zrökoba bor kjishko llëm wlo le ga äär kjok dogo llëme. Gueniyo ëye jëk bor tjok jlökoyo, e zröraba bor kjishko ëmdë ga era ber sök së iyado kjok dogo.

³⁴ Lër bomi kong ga eshko dbaryo ga nopga tjeng do pjök bukklo kjwaraso kjing go. Kjlara söya, kjlara ie ber buk eshko.

³⁵⁻³⁶ Ga walëga löng do pjök llëbo kläk. Kjlara söya, kjlara ie ber shäng eshko»* le.

³⁷ Kuya lok ga tjlä ba kong ga «Tjlapga, ¿shäryë eni li, e kjone?»

«Shinmo doyo buk kjone ga lä tjwe tön tjeng ara eshko» le ba kong.

* **17:35-36** Tek dënashko ga kjibokwo ëre jyä taraba oblë oblë ara. Ga kjone kjone tjlä ga «Kjlara söya, kjlara ie ber shäng eshko. Ga domerga löng do pjök parkë kjloshko. Kjlara söya, kjlara ie ber shäng eshko.»

18

Kjok llgwegaga kjlara, e ga syã kjlara

¹ Eshko ga Jesús tjlëno ba oppinggaga kong llëbo jyãglo go, epga syõshtë ber löng Sbõ kong ãyado wlo, wosonkë llëm wlo.

² Tjlë ba kong ga «Kjok buk kjrinasako ga no shäng kjlara no llgwegaga, ëye bangkjre llëm, Sbõ ëmdë ga bangkjre llëm bakoe.

³⁻⁴ Kjok esako ga syã shäng kjlara. Tjwe tjlapga kjok llgwegaga wleniyo li shwoy enido, tjlë ga “Bor wloyo, e llgwegaga bor kong sira. Tja wlikozong” le ba kong eni enido. Kjok llgwegaga sök li ãya öör ga llgwegaga woydë tjlapga lirë ba kong llëme. Eni ga ãya jek tjwe obi, ãya jek tjwe obi.

»Gueniyo pjlara ga tjlapga li wotjlik ga “Tja, ëye bangkjrer llëm, Sbõ ëmdë ga bangkjrer llëm bakoe.

⁵ Gueniyo walë kjwe tjwe shäng bor barwë ara enido. E kjishko ga llëbo li llgwegaga kong, tja barwe ame wlo. Llëm ga tjwe bor barwë jek obi, ga tja ie ber sök wlëp llëme” le.

⁶ »Llëye lara no llgwegaga owarë li, e woyotjlijã.

⁷ ¿Pjãy wotjlik ga Sbõ, ba nopga kjlara tjeng li wlike llëme lëmiro? Epga syõshtë lok ba kong shkë dba, wlike wlo. ¿Pjãy wotjlik ga dborye maling llëme lëmiro?

⁸ Lër bomi kong ga wlike maling. ¿Gueniyo ga no to ter kjok dogo dwayo ëre tjwe kjok ëre kjing goshko ga nopga wlën löng mär bor gore?» le.

Fariseo kjlara, e ga dbur töngga Roma so kong kjlara

⁹ Nopga löng eshko kjlöbö, wotjlik ga «Tjawa jök pjlo bek, oblëra jök bëy llëme» le eni. Eni ga Jesús tjläno ba kong llëbo jyäglo go. Tjlë ga

¹⁰ «Domerga öötong löng Sbö u zlong bäng do pjök syöshhtë. Kjlara, e fariseo, kjlara obi, e dbur töngga Roma so kong.

¹¹ Eshko ga fariseo li syöshtono shäng kojong, tjlä ga “Sbö, tja no oblë dik llëme. Tja lürkë llëm, tja llëbo owa shäryë llëm, tja pë oma boy oblë tjok llëm bakoe. Dbur töngga kjwe jök owa, tjara jök eni llëme. Tja wopjlú bop tjok e kjishko.

¹² Sondë kjwobi go ga tja ië llëm bop kong dbar pjök. Llëbo wlënor li shtër äär ba sakyö (10) go, ba sakyö (10) go, shir kjrina kjrina, ga twër bop kong” le eni.

¹³ »Dbur töngga lira beno shäng ro pjola sira. Llëbo owa shäryara li bangyo ba kong ara kjishko ga beno shäng pjlu kjing shpok, ga jok dogo jem ïya woydë sira llëm, lökthë ara Sbö bokso kjïy. Eni ga syöshtono, tjlä ga “Sbö, tja llëbo owa shäryono ara. Tja songe lozong” le.

¹⁴ »Lër bomi kong ga brik lokshko ga dbur töngga li beno shäng pjlo bek Sbö bokso, fariseo lira llëme. Eye opyë ber tjwlö ara ga ie ber tjwlö llëme. Eye opyë ber tjwlö llëm ga ie ber tjwlö ara» le.

Llëbo shäryara Jesúsde pjlu, kjwozirga kong

¹⁵ Eshko ga kjwozirga sökoba jek Jesús kong, Jesús orkwo ië ba kjing go wlo. ïya ba oppinggagarë ga kjwozirga sögaga li wlona.

¹⁶ Eni ga ba oppinggaga li rokara Jesúsde tek ba shwoy, ga tjlä ba kong ga «Kjwozirga somi llëm, tek

wëyë bor shwoy. Ëye ber kjwozirga jüni ga Sbö ber ba pjluyo.

¹⁷ Lër bomi kong jlökoyo ga ëye Sbö tjlökwo kjrë kjwozirwa dik llëm ga äär ber sök Sbö sök no pjluyo ÿyado lishko llëme» le.

Domer dbur ara kjlara

¹⁸ Tjlapga shäng kjlara eshko tjwlö ara wleniyo. Tjlë Jesús kong ga «Tjlapga no pingga, pja pjlúe. ¿Lëye shäryër, tja ber sök së ÿyado Sbö tjok wlo?»

¹⁹ «¿Tja pjlúe lëp ega? Pjlú li, e Sbö eröe.

²⁰ Kajok llgwekklo tara Moisésdë li, e miydëp tjän. “Shji pë oma boy oblë tjok llëme. Shji no zrök llëme. Shji lürkë llëme. Shji oblë jyöyotkë llëme. Bop data, bop mekë, e bangkjros, ios ber tjwlö ara” * le.

²¹ Kuya ga tjlë ba kong ga «Tjlökwo lëp shäng kës li, e shäryër shäng enido, tja tek dwlas lë obishko» le.

²² Kuya ga tjlë ba kong ga «Llëbo shäryorop kës li, e pjlúe. Gueniyo llëbo beno kjrina obi. Pja nom bop llëbo tjeng kës li soynek pjir, ga dburyo twos oba song wleniyo kong. Enira pja llëbo ara kjok dogo. Pjir ga pja tek bor tjok, pja pin wlo» le.

²³ Kuya ga beno shäng woydë ara, dbur ara kjishko.

²⁴ Woydë ara li ÿya Jesúsde ga tjlë ga «Nopga dbur ara wleniyo äär ber löng Sbö sök no pjluyo ÿyado lishko wlo ga kjange.

²⁵ Öng jëkklo sok kësbang wleniyo opzrëk jek shkö bokkwo bäng go ga kjange. Gueniyo nopga dbur

* **18:20** Éxodo 20.12-16; Deuteronomio 5.16-20.

ara wleniyo äär ber löng Sbö sök no pjluyo ïyado lishko wlo ga kjang anmoyõ» le.

²⁶ Kuya löng eshko lirë ga tjlë lok ba kong ga «¿Enira ëye dârdo?»

²⁷ «Llëye shärye norë ga ä li, e shärye Sbörë ga pjlúe» le.

²⁸ Eshko ga Pedro tjlë ba kong ga «Borwa llëbo tjeng kës'li rayororwa beno pjir, tjawa jek bop tjok wlo» le.

²⁹ Kuya ga tjlë ba kong lok ga «Lër bomi kong jlökoyo ga ëye, ba u, ba boy, ba kjlara, ba data, ba mekë, ba wapga, e rayara, Sbö ber ba pjluyo wlo ga

³⁰ äska wlëya ara anmoyõ. Kjuk ëre kjing go ga wlëya llëye rayara li pjloglo ara obi. Ga llonoshko ga ber sök së ïyado Sbö tjok» le.

Jesús lano ba wolon dbaryo kjïshko jek obi

³¹ Eshko ga ba oppinggaga doglo sak kjwara kjingsho pjök (12) li rokara dboshko, ga tjlë ba kong ga «Shji to Jerusalén kjokyo. Eshko ga llëye tara Sbö tjlökwo lagagarë no to ter kjok dogo dwayo ëre kjïshko li, e shäryë eni.

³² Tja twëba nopga judío llëm wleniyo kong, ga tja joywe lok, tja läywe lok owa, tröng twe lok bor go,

³³ tja shpoya lok no shpokklo go, ga tja zröya. Gueniyo äär dbargwo mya ga tja woshre Sbörë iröng obi» le.

³⁴ Llëye lara li, e llë loklo miydara lok llëme. E tjlökwo rong kjïshko ga llë loklo miydara lok llëme.

Domer kjok ïgö llëm wleniyo poptara Jesúsde kjlara

³⁵ Jesús jëk shäng ääto Jericó kjokyoshko ga domer sök kjlara eshko kjok ïgö llëm wleniyo. E sök dbur rokë irbo li sor go.

³⁶ Kuya sök ga nopga jëk löng träk llëm ga tjlä ga «¿Oba jëk löng llë kjïshko?»

³⁷ «Jesús, Nazaret so li tekdo shäng» läba ba kong.

³⁸ Kuya ga tjlä ba kong dbo go ga «¡Jesús, David tjëyo, tja songe lozong!» le.

³⁹ Kuya nopga jëk löng Jesús bäm go lirë ga tjlä ba kong ga «Pja kjinkozong» le ba kong, gueniyo kjinkë llëme.

Tjläno dbo go jek obi, tjlä ga «¡David tjëyo, tja songe lozong!» le.

⁴⁰ Eni ga Jesús kojongö shäng ga tjlä löng li kong ga «Tek sözi bor shwoy» le, ga söra lok jek ba shwoy. Eshko ga tjlä ba kong ga

⁴¹ «¿Lläye woydëp ga shäryër bop kong?»

«Tjläpga, tja kjok ik woydë» le ba kong.

⁴² Kuya ga tjlä ba kong ga «Kjok is jek obi. Pja mär bor go kuzong ga pja poptonoe» le.

⁴³ Jekdo eshko ga beno shäng kjok ïgö wëllë, ga to jek shäng Jesús tjok Sbö poshrëk. İya nopga löng eshko lirë ga beno löng Sbö poshrëk bakoe.

19

Zaqueo

¹ E irgo ga Jesús opzrëno jek Jericó kjokyo roshko, tur pjlor kalëkong wlo le.

² Domer sök eshko kjlara ko Zaqueo, e dbur ara. E parkë shäng dbur töngga Roma so kong li kägäyo.

³ Jesús, e sorë İya woydë. Gueniyo domer li sok chirawa töshko, ga oba ara. E kjïshko ga İya ga äe.

⁴ Eni kuzong ga Jesús tek tjwe irbo e go miy-darashko ga jek zron jong ba bäm go këm jüni. Ga tjyono jem kjor jong eshko kjlara li ko roy, ĩya wëlle wlo.

⁵ Jesús jek shäng irbo e goshko ga ĩya sök kjomo, ga tjlä ba kong ga «Zaqueo, pja oplõs kjwey dwayo ter töshko maling. Eeri ga tja ber sök bop ushko» le.

⁶ Kuya ga oplono ter töshko maling, ga Jesús wlokjrara shäng wopjlúe.

⁷ Eni ga ĩya löng eshko lirë ga Jesús läywe lok owa ara. Tjlë lok ëng kong ga «Domer kjwe llëbo owa shäryaga. ¿Jesús kjwe jek ba ushko llëno?» le lok eni.

⁸ Eshko ga Zaqueo kojongö shäng, tjlä Jesús kong ga «Tjlapga, bor llëbo tjeng kës li twër bëy oba song wleniyo kong. Ga ëbo llëbo lüyotkoror jyäpgwër ĩ wleni ga äska twër iröng bayo llëbo kjroror li pjloglo pkëng (4)» le.

⁹ Kuya ga tjlä ba kong ga «Eeri ga pja döktong, bop pjeyoga löng bop ushko li tjok. Jlökyo ga pja Abraham tjëyo.

¹⁰ No to ter kjok dogo dwayo ëre shrono shäng no jeno löng wleniyo, e wlëga, e döga» le.

Parkagaga doglo mya

¹¹ Jesús jek jek shäng ääto Jerusalén kjokyoshko ga nopga jek löng ara ba tjok, llëye le li kuya lok wlo. Wotjlik lok ga äär Jerusalén kjokyo ga Sbö ber no pjlyuo dbaryo li eshkoro lara. Miga eni llëme. E kjishko ga Jesús tjläno ba kong llëbo jyäglo go.

¹² Tjlë ga «Pjlara ga domer shäng kjlara, tjwlo ara wleniyo. To kjok shto oblë pjola, iëba ber sök

ba kjokshko sopga pjluyo wlo, ga tjwe iröng ba kjokshko wlo le.

13 Opshiydë llëm obishko ga ba parkagaga rokara doglo sak kjwara (10). Kjlara kjlara kong dbur twara bayo ara, ga tjlä ba kong lok ga “Pjäy ber löng dbur shak ëre go, tja tjwe iröng obi guing” le ba kong, ga toe.

14 »Gueniyo ÿwa kjok eshko sopga lirë shjiktëng. E kjishko ga nopga ichara kjlöbö ba irgo, tjlä ga “Kjwe woydërwa ber borwa pjluyo llëme” le lok eni.

15 Woydara lok eni llëm ëmdë ga iaraba beno sök ba pjluyo.

»E irgo ga tek shrono iröng ba kjokshko. Shrono shäng ga ba parkagaga kong dbur twara li, e rokara, dbur shano e go kjöme miyde wlo.

16 »Parkaga shrono shäng bäm go li tjlä ba kong ga “Tjlapga, bop dbur tworop bor kong li go ga kjingsho sharor kjringswo sak kjwara (10) obi” le.

17 »Kuya ga tjlä ba kong ga “Pjlúe. Pja parkaga pjlú wleniyo. Pja kong llëbo tworor chira, ga dorop pjlö beke. E kjishko ga pja iër ber no ichaga kjok kjringswo sak kjwara (10)” le.

18 »E irgo ga parkaga shrono shäng kjlara obi, tjlä ba kong ga “Tjlapga, bop dbur tworop bor kong li go ga kjingsho sharor kjringswo shkëng (5) obi” le.

19 »Kuya ga tjlä ba kong ga “Eni ga pja iër ber no ichaga kjok kjringswo shkëng (5)” le.

20 »E irgo ga parkaga shrono shäng kjlara obi, tjlä ba kong ga “Tjlapga, bop dbur tworop bor kong kjupargue li kjros iröng. Popgoror beno tjeng jangsher roshko, jer llëm wlo.

21 Miydër pjlú ga pja kjange. Pja parkono llëmshko ga pja dbur shak eshko, ga pja dwla bo kjrë, dwla dgorop llëmshko bakoe. E kjishko ga pja bangkjröror ara”le.

22 »Kuya ga tjlë ba kong ga “Pja parkaga owa wleniyo. Pja llgwer, tjlökwo lëp shäng om go li go. Miydëp pjlú ga tja kjange. Tja parkono llëmshko ga tja dbur shak eshko, ga tja dwla bo kjrë, dwla dgoror llëmshko bakoe.

23 E kjishko ga bor dbur ëre sörop, jnenop beno dbur jnezlong uyo roshko kjwe dey. Eni kjwe ga tja tjwe iröng obi ga tja dbur töno e kjinmo kjwe” le ba kong.

24 »Eshko ga pjlú li tjlë ba parkagaga oblë löng eshko li kong ga “Ba dbur tjeng ba wloshko kjwe dözi, twozi kjlara shäng dbur shara kjringswo sak kjwara (10) li kong” le.

25 »Kuya lok ga tjlë ba kong ga “Tjlapga, kjwera dbur tjeng kjringswo sak kjwara (10) tjän” le.

26 »Kuya ga tjlë ba kong ga “Lër bomi kong ga ëye llëbo tjok ga sëya jek obi. Ëye llëye llëm ga llëye tjeng sirawa li döya ba shjiryö drete.

27 E ga bor wloyoga lira, tja woydara ber ba pjluyo llëme. Epgara to shami, ga tek sözi, zrömi bor bokshto wlo”» le.

Jesús öötong opzrëno jek Jerusalén kjokyo, pjlú wleni

28 Jesús tjlëno eni pjir ga jek jongya Jerusalén kjokyo obi,

29 ga öötong shäng Betfagé kjokyo, Betania kjokyo, e ber löng Olivos dlupyo poglo go. Eshko ga ba oppinggaga jek löng ba tjok li rokara do pjök,

³⁰ ga tjlë ba kong ga «Pjãý nom kjok buk bi bok-shto kjweshko. Eshko ga öng so kwomgla kjoyo dre töshko ilgwoклë wleniyo wlëmi sök kjro go kjlara wlënggla, kjing go ëye opyoydë llëm wleniyo. Komi, ga tek sömi bor kong.

³¹ Eshko ga ëbo tjlë bomi kong ga “¿Komi kjweni ega?” le bomi kong wleni ga “Woyde Tjlapgarë” lëmi ba kong eni» le.

³² Eni ga jek öötong löng eshko, ga öng wlëna sök kjlara, lara ba kong sorë li eni.

³³ Kõya löngshko ga ãya ba sogogarë ga tjlë lok ba kong ga «¿Öng kjwe komi llëno?»

³⁴ «Woyde Tjlapgarë» le ba kong.

³⁵ Eni ga öng li tek söra shrono löng Jesús kong, ga ba shwong kop lëkong iara lok öng li kokso kjing go. Eshko ga Jesús kjimtara lok opyë sök öng li kjing go, ga jeke.

³⁶ Jek sökshko ga nopga jëk löng ba tjok ara. Kjone kjone, ba shwong kop lëkong skwara lok, ga kwoptara lok irbo bäng go ba bäm go.

³⁷ Jek sök ääto kujözlöng irboyoshko ga nopga jëk löng ba tjok li, öö le lok, wopjlu kjishko. Ga Sbö poshrëya lok träk llëm, llëbo ãydëba llëm wleniyo ãna lok ara kjishko.

³⁸ Tjlë ga

«Pjlu kjwe ichara Tjlapgarë shrono kjok ëreshko.

Kjwe kjimte Sbörë.

Löng kjok dogo li löng wopjlu Sbö tjok,
poshrëya lok träk llëme.

“Pja kësbange” le lok ba kong» le.

³⁹ Fariseoga löng eshko kjlöbö, nopga li tjreko. Kuya lok ga tjlē Jesús kong ga «Tjlapga no pingga, bop oppinggaga kjwe kjinkozong» le.

⁴⁰ Kuya ga tjlē ba kong ga «Lër bomi kong ga kjwepga kjinkoror kjwe ga akkwo tjeng kjwey, öö le shara» le.

⁴¹ Jek sök ääto Jerusalén kjokyo ga kjok li ñna, ga slatong ara,

⁴² tjlē ga «Jerusalén sopga, pjây iaga ber löng wlēp li ë, e miydomirë llēm obi. Woydoror ga miy-doromi tjän, gueniyo jnek tjeng pjir bomi kong, miydëmi llēm wlo.

⁴³⁻⁴⁴ Sbö shrono sök bomi ikshko ga wlokjroromi llëme. E kjishko ga dbar tjwe bomi kong owa kjrina. Eshko ga pjây popde bomi moskwogarë lok, ga pjây kopjrîya lok pjribri, pjây opshik tök llaw llēm wlo. Bomi kjok kjeryo shäryak ak go pjribri kjókshko kjwe dloya lok ber tjeng töshko, akkwo ëmdë ber tjeng ëng kjing go kwara llëme. Eshko ga pjây zröya lok» le.

Llëbo soynegaga löng Sbö u zlong bäng li ichara Jesúsde drete

⁴⁵ Jesús opzrëno jek Jerusalén kjokyo roshko irgo ga öötong shäng Sbö u zlong bäng ga nopga löng eshko llëbo soynek li ichara opshik ey dwayo,

⁴⁶ tjlē ga «Sbö tjlökwö tak pjang eni: “Bor u, e kowëba ber syö uyo wlo.* Gueniyo ioromi beno jong lü uyo”»† le.

⁴⁷ Dbar kjwobi go ga Jesús öör shäng nopga ping Sbö u zlong bäng. Ga syöshtaga kägäyoga, no ping-gaga kjok llgwekklo tara Moisésde li go, tjlapgaga

* **19:46** Isaías 56.7. † **19:46** Jeremías 7.11.

tjwlö ara wleniyo, e tjlä ëng kong ga «¿Zröy sorë ga pjlú?» le lok eni enido.

⁴⁸ Gueniyo shaya lok ga ä, Jesús zlong bäng nopga löng ara ba kuk kjishko.

20

«¿Pja ichaga ërë?» lara Jesús wloyogarë ba kong

¹ Dbar kjwara ga Jesús Sbö tjlökwö roy pjlú lono oba kong Sbö u zlong bäng. Eshko ga oba pïya shäng wopro ga syöshtaga kägäyoga, no pinggaga kjok llgwekklo tara Moisésdë li go, judío tjlapgaga kjok llgwegä wleniyo, e tek shrono löng ba zlong bäng

² ga tjlä lok ba kong ga «¿Lläye shäryëp shäng li shäryëp ega? ¿Pja ichaga ërë?»

³ «Pjäy kong llëbo kjakrokër bakoe. Kjakrokër ga tja dboryozïa.

⁴ ¿Juan No Waga, e ichaga ërë no wë? ¿Ichaga Sbörëre, de norë?» le ba kong.

⁵ Kuya lok ga tjlä ëng kong ga «Ichaga Sbörë loroy ba kong wleni ga “¿Tjläkwö kjroromi llëm ega?” le bi kong.

⁶ Gueniyo Juan, e Sbö tjlökwö laga le nopga uunkongdë. E kjishko ga ichaga norë lëy ga ä bakoe. Loroy eni wleni ga shji zröya lok ak go» le.

⁷ Eni ga tjlä lok Jesús kong ga «E ichaga ërë miydërwa llëme» le.

⁸ Kuya ga tjlä ba kong ga «E kjishko ga tja ichaga ërë lër bomi kong llëm bakoe» le.

Parkagaga owa

⁹ Eshko ga Jesús tjläno nopga kong llëbo jyäglo go. Tjlä ga «Domer shäng kjlara kjok sogo. Pjlara

ga kjillgwo dwlayo dgara ba kjokshko, ga kjok li poskwona parkagaga kjlöbö kong, potjwlëya ï, ga to kjok shto oblë dbar kop ara wlo.

¹⁰ Öötong kjillgwo bo kjrozlong dbaryo ga ba parkaga ichara kjlara, kjillgwo bo ber ba kong li rokë parkagaga beno löng ba kjok daga li kong. Gueniyo ga ba parkaga ichara tjwe shäng li shpokza lok tjã tjã, ga ichara lok to iröng or go.

¹¹ E irgo ga ba parkaga ichara jek eshko kjlara obi. Öötong shäng kjok buk lishko ga läywara lok owa, shpokza lok tjã tjã, ga ichara to iröng or go bakoe.

¹² E irgo ga ba parkaga ichara jek eshko kjlara obi. Era shpokza lok tjã tjã, dbukza lok jek kjoko, srëng llë kwono llaw pogo.

¹³ »Eni ga domer li wotjlik ga «¿Tja orwë llong? Bor wa woydër ara ëre ichotë shara. Èrera bangkjre lok kjwe» le.

¹⁴ »Gueniyo öötong shäng eshko ga ba wa li ïya parkagaga kjok daga löng lirë ga tjlä lok ëng kong ga «Llono ga kjwe ber kjok ëre sogo. Zröroy wleni ga kjok ëre kjrëy, ber buk bi kong wlo» le.

¹⁵ Eni ga shira lok kjok li roy dwayo, ga zröra lok.

»¿Eni ga llëye shärye kjok sogo lirë ba tjok lok lëmi?

¹⁶ E jongya eshko ba zrök dani. Pjir ga parkagaga wlëya oblë, kjok li de lok ba kong wlo» le.

Kuya lok ga tjlä lok ga «¡Ay! ¡Eni llëme!» le.

¹⁷ Eshko ga nopga li ïya Jesúsde jek drëng ga tjlä ba kong lok ga «Sbö tjläkwo tak pjang eni:

»«Akkwo woydara u shäryagagarë lok llëm li,
e iak beno buk bäm go,

beno tjlwō ara, oblē kjinmo.”*

¿E llē loklo lēmiro?

18 Ēye lono akkwo ère kjing go ga tar pjās erä. Ga akkwo ère lono è kjing go ga e sho shguir ber tjeng lulue» le.

19 Tjlēno llēbo jyāgļo go li kuya no pinggaga kjok llgwekklo tara Moisésdē li go, syōshtaga kägāyogarē ga miydara lok ga ba layde shäng. Shaya lok woydē, bāngzaya lok wlo. Gueniyo oba bangkjre lok ara.

Shji kā potjwlēk pjlu kēsbangyo sök Roma kjokyo li kong

20 Eshko ga nopga ichara lok kjlōbö oba li tjrēko, Jesús tjlōkwo kuk wlo. Nopga li ikoba ga pjlo bek wleniyo, miga llēme. Woydara lok ga llēbo kjakroke Jesús kong, dborye bëy llēm ga doshaya lok e go, rote no ichaga Roma so li kong wlo.

21 Eshko ga nopga ichara li tjlē lok Jesús kong ga «Tjlapga no pingga, miydērwa ga pja tjlē bek, oba pim tjlōkwo bek li go bakoe. Nopga tjlwō kjöm pogo, e bop kong ga tjlwō beke. Pja tjlē bek è pogo kong. Woyde Sbörē ga shji jēk sorē li lēp jlōkoyo.

22 ¿Eni ga shji kā potjwlēk pjlu kēsbangyo sök Roma kjokyo li kong ga pjłure?» le.

23 Kuya ga miyde ga lōng wotjlik owa. E kjīshko ga tjlē ba kong ga

24 «Dburwa kā potjwlēkkļo li tek sōzī bor kong kjwara» le, ga tek sōra lok ba kong kjwara, in wlo. Eni ga kjrara, ga tjlē ba kong lok ga «¿Domer jyāgļo sök dburwa ère go jū è? ¿Ko tak pjang ère go jū è?»

* 20:17 Salmo 118.22.

«Kjwe p̄lu kēsbangyo sök Roma kjokyo li ĩ» le lok ba kong.

²⁵ Kuya ga t̄lě ba kong lok ga «Eni ga llēye p̄lu ĩli, e twozĩ ber p̄lu kong, gueniyo llēye Sbö ĩli, e twozĩ ber Sbö kong bakoe» le.

²⁶ Eni ga llēbo lara oba kong li go ga llēbo wlēya lok, rote wlo le li, e wlēna llēme. E kjĩshko ga beno löng yēy le erä, jek kjingtēng löng erä.

No woshrozlöng dbaryo

²⁷ Saduceoga wot̄l̄ik ga no wolono ga woshrē ame le. Eni ga eshko dbaryo ga saduceoga tek shrono löng Jesús shwoy kjlōbö ga t̄lě ba kong ga

²⁸ «T̄l̄apga no pingga, kjibokwo tara Moisésdē beno p̄jang li t̄lě ga “Ēye wolono, wapga beno ba boy tjok llēm ga shinmo kjlarayo li orkwosmok ba boy beno sök li tjok, wa tjok wleni ga e ber shinmo li ĩ wleni wlo.”†

²⁹ »P̄l̄ara ga domerga löng doglo kjäk (7) epenga döe. Ba kēguēyo orkwosmono, ga wolono, gueniyo wapga beno llēme.

³⁰⁻³¹ Eni kuzong ga ba lēng orkwosmono ba syā tjok, gueniyo wolono jek, ga wapga beno llēm bakoe. Ba lēmga orkwosmono ba syā tjok kjlara kjlara eni bako, ga wolono uunkong, gueniyo wapga beno ba boy tjok llēme.

³² E irgo ga walē li to wolono bakoe.

³³ ¿Eni ga domerga doglo kjäk (7) li orkwosmono uunkong walē li tjok kuzong ga no woshrozlöng dbaryoshko ga walē li ber domerga kjone dey li boy?»

† **20:28** Deuteronomio 25.5-6.

34 «Eerishko ga nopga orkwosmok ëng tjok kjok ëre kjing go.

35 Gueniyo lono ga nopga tjwlõ ara Sbö bokso woshre ber löng ba tjok wlo li, era orkwosmok ame,

36 ga wolon ame bakoe. Eshko ga ber löng Sbö parkagaga kjok dogo so wleni shara. Woshrara Sböre kjishko ga beno löng Sbö wapga.

37 »Dënashko ga Moisés öötong shäng kji sho pjë jong ri rishko ga tjlä ga “Sbö, e Abraham, Isaac, Jacob, e Sbö”[‡]le. Miydëy e go ga shji wolono ga shji woshre iröng obi.

38 Sbö, e shinmoga Sbö llëme. E nopga löng së li Sbö. Ba kong ga shji nopga uunkong löng së, shji wolono ëmdë ga eni» le ba kong.

39 No pinggaga kjok llgwekklo tara Moisésdë li go löng eshko kjlöbö. Kuya kjone kjonerë ga tjlä ba kong ga «Tjlapga no pingga, dboryorop beke» le.

40 Eshko dbaryo jek lëkong ga ëye wokjang llëbo kjakrokë ba kong wlo ame.

¿No pjluvo iche le Sböre li, e ë?

41 Eshko ga Jesús tjlä nopga löng li kong ga «¿“No pjluvo iche le Sböre li, e David tjëyo tek ber ba irgo li” lëba eni ega?

42 Kjibokwo ko *Salmos* go ga David tjlökwö tonö om go, tjlä ga

»“Tjlapga tjläno bor Tjlapgayo kong ga

‘Pja tek wlar ber sök bor orkwo këlëkong,

43 äär jong bop moskwoga zanor pjir guing,

eshko ga twër ber bop kong ichëp wlo’ ”§ le.

‡ 20:37 Éxodo 3.6. § 20:43 Salmo 110.1.

44 ¿Eni ga no pjluyo li kowara Daviddë ba Tjlapgayo kuzong ga e ber ba tjëyo tek ber ba irgo li sorë?» le.

No pinggaga kjok llgwekklo tara Moisésdë li go wlonä Jesúsde

45 Eshko ga Jesús tjlëno ba oppinggaga kong shara. Gueniyo nopga löng eshko li omkuno lok bakoe. Tjlë ga

46 «Pjãý sjëk, no pinggaga kjok llgwekklo tara Moisésdë go li tjok! Jëk löng doyono shwong kur may, tjwlö ara wleniyo go äe. Woyde lok ga bangkjreba llëbo soynezlóng shtoyo. Judíoga syö uyo roshko ga woyde lok ga löng sökklo pjlú goshko. Oba tön, iëshko ga shärye lok eni bakoe.

47 Gueniyo ga walëga song, beno löng syã wleniyo, ba u döya lok ba shjiryo. E irgo ga syöshtë wop ara, “Nopga kjwera pjlúe” lëba ba kjishko wlo le. Nopga eniyo, e shdüya Sbörë ara anmoyö, oblë kjinmo» le.

21

Syã kjlara dburwa twono Sbö kong

1 Pjlara ga Jesús sök Sbö u zlong bängshko ga İya ga nopga dbur ara wleniyo tek löng dbur ië jong ba hapkwo roy.

2 Eshko ga syã song wleniyo shrono shäng kjlara, ga dburwa iara kjwo pjökdewa. Ba dburwa iara li, e tjwlö chira anmoyö wleniyo. İya Jesúsde ga

3-4 tjlë ga «Nopga dbur ara wleniyo kjwe omiono ara wleni jlöe. Gueniyo kjwe ba worbo wleniyo iayde. Syã song wleniyo kjwera, ba dburwa tjeng sira li woydara ba llëbowa tjwlëkklo. Eni ëmdë ga

twarra Sbö kong drete. E kjĩshko ga lër bomi kong jĩłokoyo ga syã kjwe, dburwa iara sira tjwłõ llëm wleni jĩłoe. Gueniyo Sbö kong ga tjwłõ ara, llamo omiono lok kës wle kjinmo» le.

«Sbö u pjir ber drete» lara Jesúsdë

⁵ Eshko ga ba oppinggaga kjong kjong l'ong Sbö u lãywë, tjlë lok ga «Ak lok kjwe wolëso. Llëbo oblë oblë twaraba, iaraba beno tjeng dboy Sbö kong kjwe wolëso bakoe» le lok eni.

Eshko ga Jesús tjlë ga

⁶ «Dbar tjwe kjwara ga llëbo ĩmi l'ong kës kjwe, e pjir ber drete. Akkwo ëmdë ber tjeng ëng kjing go kjwara llëme» le.

Kjok pjir dbaryo jyãgłõ

⁷ Kuya lok ga tjlë ba kong ga «¿Llëye lëp shäng li, e shäryë llono? ¿E shäryë dörö li jyãgłõ wen llë?»

⁸ «Pjãy sjëk, pjãy jyãpgwëba llëm wlo. Eshko ga nopga wen tjwe ara, tjlë ga “No pjłuyo ichara Sbörë shrono shäng li tja” le. Tjlë jek obi ga “Dbaryo li shronoe” le. Gueniyo pjãy jek ba tjok llëme.

⁹ »Roy kumi ga oba ëngkjwë kjok shto oblë oblë ara, llëm ga oba ëngkjwë ba pjłuyo sök li long wloshko ga llëye bangkjrëmi llëme. E shäryë eni kjluwe. Gueniyo eshko ga kjok pjir dbaryo li äätë llëm obi.

¹⁰ »Tjëyoga oblë oblë ëngkjwë lok ëng tjok. Nopga kjok shto oblë oblë so ëngkjwë lok ëng tjok bakoe.

¹¹ Kjok shto oblë oblë goshko ga yo tjwe kës kës, pjli tjwe ara, swło tjwe oblë oblë bakoe. Ga kjok dogoshko ga llëbo ĩydëba llëm wleniyo wen kës kës, ga bangkjrëba ara.

12 »Gueniyo llëbo tjeng kës ère bäm go ga pjây shakoba, shdungoba wlo. Pjây sökoba judioga syõ uyo roshko, pjây llgweya lok eshko wlo, ga pjây ie lok ber löng no shdüzlong uyo roshko. Bor kjishko ga pjây sökoba pjlupga kës kës boksho, no ichagaga boksho bakoe.

13 Eshko ga llëbo ñnami, kuromi li roy lëmi ba kong, miyde lok wlo.

14 »Gueniyo pjây äätë eshko llëm obishko ga pjây wotjlik ga “¿Tja opwlikë sorë?” lëmi llëme.

15 Eshko ga pjây kong tjlökwo twër, pjây opwlikë wlo. Kuya lok ga wotjlik ga pjây kjok miydë ara le, ga pjây kar dborye lok ga äe.

16 Gueniyo pjây wloyo ber bomi dataga, bomi mekëga, bomi pjeyoga bakoe. Pjây twe lok tjlapgaga kong, pjây shdüya lok wlo, ga pjây kjone kjone zröya lok bakoe.

17 Pjây ñywa nopga uunkongdë shjiktëng bor kjishko.

18 Gueniyo pjây dër ñyado, pjây jer kjlara llëm wlo. Bomi käkzong ëmdë ga jer pjlara llëme.

19 Ga pjây mär Sbö go äär jong ba dbo go ga pjây ber löng së ñyado.

20 »Ïmi ga Jerusalén kjokyo kopjrina ëngkjwagaga ararë pjirishko ga miydëmi e go ga ba pjirzlong dbaryo li döröe.

21 Eshko ga ëye löng Judea kjokyo ga tök jem dlup lëkong, ëye löng Jerusalén kjokyo roshko ga tök ey dwayo, ga ëye löng ba kjokshko ga tjwe iröng Jerusalén kjokyo ame.

22 Jerusalén so shdungglo dbaryo li eshko, tak pjang Sbö tjlökwo go sorë li eni.

²³ E dbaryo ga walëga löng kjlaraso llëm, e song jlõe. Walëga kjwozirwa tjeng nä ië, e song jlõ bakoe. Eshko ga kjok ëreshko sopga song ara anmoyõ, shdüya Sbörë ara.

²⁴ Kjong kjong zrökoba dröng go. Kjong kjong sökoba to dbo go kjok shto oblë oblë. Ga nopga judío llëm wleniyo äär ber löng Jerusalén kjokyo, ga llëbo owa shärye lok eshko, äär jong ba dbaryo pjitong guing.

No to ter kjok dogo dwayo li tjwe iröng obi dbaryo

²⁵ »Eshko ga kjok dogoshko ga llëbo ÿydëba llëm wleniyo wen dlo go, mok go, dbala go bakoe. Kjok ëre kjing goshko ga dlung, e pjublunyo kësks ara, pjlukyo ara bakoe. E kjishko ga tjëyoga oblë oblë ber löng sëya llëm, kjok bangkjre lok ara.

²⁶ Llëbo wen tjwe kjok ëre kjing go li ikobashko ga kjone kjone wopjir jek kjlulu erä. Llëbo lok kjopkwo go ëmdë ga jek dete erä bakoe.

²⁷ Eshko ga ikoba ga no to ter kjok dogo dwayo ëre ter tjwe pjäng sho roy, ga bor dbo kälä ikoba wëlle.

²⁸ Llëbo ëre ïmi kjwlë enishko ga miydëmi e go ga bomi döga dbaryo li döröe. E kjishko ga eshko dbaryo ga pjây dbokjrozong. Ga pjây wotjlis llëye wen dörö li kjishko» le.

²⁹ Eshko ga tjläno ba kong llëbo jyäglo go. Tjlë ga «Kjor ko *higuera* kjwe ïzïa. Kjor oblë oblë kjwe ïzi bakoe.

³⁰ Korga wen tjaglënsško ga miydëmi e go ga lushko dbaryo äätoe.

³¹ Eni ga llëbo tjeng kës ëre shäryë li ïnishko ga miydëmi e go ga Sbö ber no pjluyo dbaryo li ääto eni bakoe.

³² Lër bomi kong jlökoyo ga nopga löng eerishko dbaryo kjone kjone wolontë llëm obishko ga llëye lër shäng bomi kong ëre shäryë uunkong.

³³ Kjopkwo, kjok ëre, e pjir ber drete. Gueniyo bor tjlökwoora ber pjang ÿyado.

³⁴ »Pjây sjëk, bor tjlökwo woyotjlizï ÿyado. Pjây sgara löng nelötkë, llëbo owa shäryë, llëbo tjeng kjok ëre kjing go woyotjlik wleni ga eshko dbaryo ga pjây wlëya löng llë lëmi.

³⁵ Llëbo wen eshko dbaryo li, e wen tjwe nopga tjeng kjok kjwang jïkong kës li kong.

³⁶ ¡Eni ga pjây sjëke! Pjây syöshtos Sbö kong ÿyado, pjây döya llëbo owa shäryë kës li dwayo wlo, no to ter kjok dogo dwayo ëre ber wopjlú bomi tjok wlo bakoe» le.

³⁷ Dbar kjwobi go ga Jesús öör shäng oba ping Sbö u zlong bäng, ga kjok sëng ga opshino jek iröng beno sök Olivos dlupyoshko.

³⁸ Ga kjok shröngto ga nopga uunkong öör Sbö u zlong bäng ba kuk.

22

«¡Jesús, e shay, zröy wlo sorë ga pjlú?» lara ba wloyogarë

¹ Eshko ga Israel tjëyoga döktong tek Egipto kjokyo dwayo dbaryo shrëkklo, pjlung shosho suk pjir shäryak ba uukklo tjok llëm dbaryo li döröe.

² Eshkoshko ga syöshtaga kägäyoga, no pinggaga kjok ilgwekklo tara Moisésdë li go, e töno lok ga tjlë

lok ëng kong ga «¿Jesús, e shay, zröy wlo sorë ga pjlú?» le, gueniyo oba bangkjre lok ara.

³ Jesús oppinggaga doglo sak kjwara kjingsho pjök (12) kjlara ko Judas Iscariote. Eshko dbaryo ga Ä shrono, pjonon ba go.

⁴ Eni ga Judas öör shäng syöshtaga kägäyoga, Sbö u daga kägäyoga, e ik, Jesús twe ba kong lok sorë li lanyotkë ba kong lok wlo.

⁵ Kuya lok ga beno löng wopjlu, ga tjlä lok ba kong ga «Enira pja potjwlenwa» le.

⁶ Kuya ga «Jöio. Enira pjlú» le. Eshko jek lekong ga beno shäng wotjlik ga «¿Jesús twër ba kong sorë ga pjlú? Woyde ga dbar oba ara llëm wlenishko» le.

Jesús iono ba oppinggaga tjok

⁷ E irgo ga pjlung shosho suk pjir shäryak ba uukklo tjok llëm dbaryo li öotonge. E dbaryo ga öng wlëp ushko so llgwoklä zröya, sho suya, Israel tjëyoga döktong tek Egipto kjokyo dwayo dbaryo shrëkklo.

⁸ Eshko ga Jesús tjlä Pedro, Juan kong ga «Pjäy nom dli shäryë, Israel tjëyoga döktong tek Egipto kjokyo dwayo dbaryo li shrëy wlo» le.

⁹ Kuya lok ga tjlä ba kong ga «¿Shäryërwa kjone ga pjlú?»

¹⁰ «Pjäy nom jek u lok arashko. Eshko ga domer wlëmi shäng kjlara, di bapkwö sök jong kjwara ba dlu kjing go, roshko di. Pjäy jek ba irgo äär jong opzrëk jek u roy jong kjone ga eshko.

¹¹ Eshko ga pjäy tjlä u sogo kong ga “Tjlapga no pingga tjlä ga ‘¿Israel tjëyoga döktong tek Egipto kjokyo dwayo dbaryo shrëkklo li, e dliyo uër bor

oppinggaga tjok li kjeryo kjone? le” lëmi ba kong eni.

¹² Eni ga pjây kong, kjër pïya jong kjomo kjwara kësbang, poshäryak pjire. Llëye uëy wlo li shäryëmi pjir ber tjeng bäm go eshko» le ba kong.

¹³ Eni ga ba oppinggaga do pjök li to jek öötong löng eshko ga llëye lara Jesúsde li wlëna tjeng eshko uunkong eni. E irgo ga dbar shrëkklo li dliyo poshäryara lok.

¹⁴ Öötong ba dloyo go ga Jesús öötong shäng Sbö tjlökwo roy lagaga ba äska li tjok, ga sirkeno löng tjë jïkong dli ioklo jong li zlong.

¹⁵ Eshko ga Jesús tjlë ba kong ga «Tja wotjli no ara ga tja shdüydëba llëm obishko ga dbar shrëkklo ëre dliyo uër bomi tjok loror.

¹⁶ Lër bomi kong ga uër ame, äär jong Sbö ber no pjluyo dbaryoshko jä, dbar shrëkklo ëre llë loklo shäryono pjir ga eshko» le.

¹⁷ Eshko ga di ioklo kjrara kjwara, roshko kjillgwo bo dyo dbo ara, ga tjlë Sbö kong ga «Tjawa kong kjillgwo bo dyo tworop ëre. Tjawa ber wopjlú bop tjok e kjïshko» le. E irgo ga tjlë ba oppinggaga kong ga «Kjrozï, shdözï ëng kong.

¹⁸ Lër bomi kong ga kjillgwo bo dyo iër ame, äär jong Sbö ber no pjluyo dbaryoshko jä» le.

¹⁹ E irgo ga pjlung shosho suk pjir kjrara kjwara, ga tjlë Sbö kong ga «Tjawa kong dli tworop ëre. Tjawa ber wopjlú bop tjok e kjïshko» le. E irgo ga pjlung shosho li tora, twara sira sira ba oppinggaga kong, ga tjlë ba kong lok ga «Ëre bor sho wleni, twak bomi kong. Shäryëmi jüni, bor woyoshroklo» le.

20 Ga uara lok irgo ga shäryara eni obi, kjillgwo bo dyo dbo ara tjok, tjlä ga «Tjläkwo twara Sbörë tjaglën, beno İyado wlo. Shärye wlo ga bor srëng li kwon bomi kjışko. Kjillgwo bo dyo ëre, e ba jyăglo.

21 Gueniyo bor soynega li sök ië bor tjok jüşko.

22 Llëbo wen no to ter kjok dogo dwayo ëre kong owa, İara Sbörë sorë li eni. Gueniyo bor soynega, era song jlöe» le.

23 Kuya lok ga tjlä ëng kong ga «¿Ëlayde İëba?» le lok ëng kong eni.

24 E irgo ga opyono lok ënglë kar kar, tjlä lok ga «¿Shji kjone dey tjwlö ara, İlamo li kjinmo?» le lok ëng kong eni.

25 Kuya Jesüsdë ga tjlä ba kong lok ga «Miydëmi pjlu ga kjok ëre kjing go ga nopga judío İlëm wleniyo ichagaga ba nopga ichë parkë ara ba kong. Ba nopga dbo ara wleniyo opyë lok ko no kjimtaga.

26 Gueniyo woydër ga pjây omshäryë eni İlëme. Ëye opyë woydë ber tjwlö ara oblë kjinmo ga opyë ber tjwlö İlëm dey. Ëye opyë woydë ber oblë ichaga ga ber shäng oblë kjimtaga dey.

27 Nopga tjeng do pjök ga kjlara sök ië, kjlara shäng dli pjlorguë ba kong. ¿Kjone dey ga tjwlö ara İëba? Sök ië li İëba. Gueniyo tjara shäng bomi tjreko, parkaga bomi kong wleni.

28 »Pjây löng bor tjok İyado. Llëbo kës li weno bor kong owashko ga tja rayoromi İlëme.

29 E kjışko ga İlono ga pjây iër ber löng no pjluoyo, tja İara bor Datarë beno sök no pjluoyo sorë ga eni.

30 Ga Sbö ber no pjluoyo İishko ga pjây äär ber löng ië bor tjok eshko, ga pjây sirkek äär löng pjlu

sökklo kjing go, Israel tjëyoga kjinggwwo sak kjwara kjingsho pjök (12) li llgwëk wlo» le.

«Pjã y tjlïya Ärë» lara Jesúsde ba oppinggaga kong

³¹ Eshko ga tjlë Pedro kong ga «¡Simón, tja kuzong! Shji dwla pjloyongshko ga ba pjlungyo dbuk ber llëno ame. Pjã y tjlïya woydë Ärë eni, pjã y ber llëno ame eni bako wlo. Ga pja iara Sbörë beno shäng tjlïya eni wlo.

³² Gueniyo Simón, tja syöshtono Sbö kong bop kjïshko, pja kjimte mär ber shäng bor go wlo, pja mär bor go jlökoyo iröng obishko ga bop pjeyoga kjimtëp mär bor go eni bako wlo» le.

³³ Kuya ga tjlë ba kong ga «Tjlapga, tja sökoba no shdüzlong uyo roshko bop tjok, llëm ga tja zrökoba jek bop tjok ëmdë ga tja shäng bop tjok, pja rayër llëme» le.

³⁴ Kuya ga tjlë ba kong ga «Pedro, lër bop kong ga pjesit kjok shränto ga kjörkö kjluntë llëm obishko ga “Jesús, e ë miydër llëme” lorop oba kong pjloglo mya tjän» le.

³⁵ E irgo ga Jesús tjlë ba kong lok ga «Kjupä ga pjã y ichoror jek löng dbur sho tjok llëm, kjla tjok llëm, drepkwota tjok llëm bakoe. ¿Eshko ga llëye söromi llëm li kjïshko ga songyo kjroromire?»

«Llëme» le lok ba kong.

³⁶ Eshko ga tjlë ba kong lok ga «Eni. Gueniyo eeri ga ëye dbur tjok ga söya. Eye kjla tjok ga söya bakoe. Eye dröng llëm ga ba shwong kop lëkong soyneya, dröng tjwlëkklo.

37 Sbö tjlökwo tak pjang eni: “ ‘Domer kjwe llëbo owa shäryaga’ laraba ara.”* E bor layde, ga wop ä ga shäryë bor kong eni kjluwe» le.

38 Kuya lok ga tjlë ba kong ga «Tjlapga, jüşhko dröng tjeng kjwang pjök» le.

Kuya ga tjlë ba kong ga «Erö ga bue» le.

Jesús syöshtono Sbö kong Getsemaní kjokyo

39 E irgo ga Jesús opshino jek Olivos dlupyo ba oppinggaga tjok, sgara löng sorë ga eni.

40 Öötong löng eshko ga tjlë ba kong lok ga «Pjäy syöshtos Sbö kong ara, pjäy tjliya Äreshko ga pjäy kjimte Sbörë, llëbo owa shäryë llëm wlo» le.

41 E irgo ga opkiono jek ba zlong bäng dwayo wop ak dburoy lonshko wleni. Eshko ga kjök tono, syöshtono Sbö kong,

42 tjlë ga «Data, woydër ga llëbo wen owa bor kong dörö li, e wen tjwe bor kong llëme. Woydöp eni wleni ga shäryos eni. Gueniyo ga e laga tjarë llëm, e laga ber pjarë» le.

43 Eshko ga Sbö parkaga kjok dogo so weno shäng kjlara ba kong, kong dbo twe obi wlo.

44 Ga woydë ara llëbo wen tjwe ba kong owa li kjishko ga syöshtono ara, shorya tjök tjök klung kjing go srëng dik.

45 Syöshtono pjir ga kojono, ga tek shrono shäng ba oppinggaga tjeng lishko ga wlëya bë tjeng pë, woydë lok ara kjishko.

46 Ga tjlë ba kong lok ga «¿Pjäy pë egaro? Pjäy kojözong. Pjäy syöshtos Sbö kong ara, pjäy tjliya

* 22:37 Isaías 53.12.

Ärëshko ga pjây kjimte Sbörë, llëbo owa shäryë llëm wlo» le.

Jesús shara ba wloyogarë

⁴⁷ Jesús tjlëydë pjité llëm obishko ga nopga tjwe jong träk llëme. Ba oppinggaga doglo sak kjwara kjingsho pjök (12) kjlara ko Judas, e tek shäng ba bäm go. Eshko ga tek shrono shäng Jesús zlong bäng, lõ shiya† wlo.

⁴⁸ Eshko ga Jesús tjlë ba kong ga «Judas, ¿no to ter kjok dogo dwayo ëre lõ ship, iëp ber tjeng oba wloshko wlore?» le.

⁴⁹ Tek löng llëno miydara ba oppinggaga löng lirëshko ga tjlë lok ba kong ga «Tjlapga, ¿shji ëngkjwë ba tjok dröng gore?» le.

⁵⁰ Jekdo eshko ga kjlara jüni dröng shino, ga syöshtaga kësbangyo li parkaga kwomgwo këëkkong zakza tas jer lon pjik buk töshko erä.

⁵¹ Eshko ga Jesús tjlë ba oppingga li kong ga «¡Wëyë! ¡Kjweni llëme!» le, ga parkaga li kwomgwo porwara, ga poptonoe.

⁵² Eshko ga tjlëno ba kjrägaga kong. Epga syöshtaga kägäyoga, Sbö u daga kägäyoga, judío tjlapgaga kjok llgwegä wleniyo bakoe. Tjlë ba kong lok ga «¿Pjây tjwe bor shak dröng tjok, wlëng no shpokklo tjok kjweni ega? ¿Tja shamishko ga tja ëngkjwë bomi tjok lëmiro?

⁵³ Tja öör shäng oba ping ara, Sbö u zlong bäng, pjây löng lishko. ¿Tja sharomi eshko llëm egaro? Gueniyo dbaryo koshoromi li, e öötonge. Eni tjok ga kjok ichaga li beno Äre» le.

† 22:47 **Lõ shik** lanyo, e tak pjäng Génesis 27.26 go.

⁵⁴⁻⁵⁵ Eshko ga Jesús shara lok, söra to jongya syōshtaga kēsbangyo li ushko. Pedro jek shäng kä kjwaraso kä kjwaraso ba irgo. Öötong löng eshko ga opzrēno jek u li roshko, ga Pedro beno sök iökkok, u bongkjako, iök borkegaga löng li tjok.

⁵⁶ Eshko ga kjoglo shäng kjlara, syōshtaga kēsbangyo parkaga wleniyo. Īna ga Pedro sök iökkok. Ga ĩya yōtso robyē wēļeshko ga tjlē nopga löng li kong ga «Domer sök kjwe jēk shäng Jesús tjok bakoe» le.

⁵⁷ Kuya sök ga tjlē kjoglo li kong ga «ĵyō! ĵE ē miydēr llēme!» le.

⁵⁸ Wop tjok ga oblē omīno, ga tjlē ba kong ga «Pja ěmdē ga ba kjlarayo» le.

Kuya ga tjlē ba kong ga «ĵyō! ĵTja llēme!» le.

⁵⁹ Wop ara obi ga oblē tjlē ga «Domer kjwe Galilea so. E kjīshko ga miydērwa pjlu ga kjwe jēktong shäng ba tjok» le.

⁶⁰ Kuya ga tjlē ba kong ga «ĵyō! ĵLēye lēp shäng li miydēr llēme!» le.

Pedro shäng tjlē obishko ga kjörkö kjlunoe.

⁶¹ Eshko ga Tjlapga Jesús bojono tek, Pedro ĩya drēng, ga woyoshre Pedrorē kjlay ga Jesús tjlēno ba kong ga «Kjörkö kjluntē llēm obishko ga “Jesús, e ē miydēr llēme” lorop oba kong pjloglo mya tjän» lara.

⁶² Eni ga opshino ey dwayo, ga slatong ara jlōkoyo.

Jesús joywara ba dagagarē

⁶³ E irgo ga nopga löng Jesús daga li ba joywono, ga shpora lok ara.

⁶⁴ Ga bokkwo go shwomzrëng kjrochara lok tuke. Ga tjlë lok ba kong ga «Pja yoga ërë los borwa kong» le.

⁶⁵ Ga lãywara lok owa oblë oblë ara bakoe.

Jesús söraba öötong shäng Judío Kjuk Ilgwegaga Këskësyo bokshto

⁶⁶ Kjuk shröngto ga Judío Kjuk Ilgwegaga Këskësyo tönö lok uunkong, syöshtaga kägäyoga, no pinggaga kjok ilgwekklo tara Moisésdë li go bakoe. Eshko ga Jesús söra lok, jek öötong shäng tjlapgaga li bokshto.

⁶⁷ Ga tjlë lok ba kong ga «¿No pjluyo ichara Sbörë shrono shäng li, e pjare? Los borwa kong» le.

Kuya ga tjlë ba kong lok ga «Loror bomi kong wleni ga tjlökwo kjrëmi llëme.

⁶⁸ Ga pjây kong llëbo kjakrokër kjwe ga tja dbyëmi llëm bakoe.

⁶⁹ Gueniyo Sbö, llëye shärye woydë li shärye ga pjlúe. Ga eeri jek lëkong ga no to ter kjok dogo dwayo ëre sirkeno öötong sök ba orkwo këlëkong» le.

⁷⁰ Kuya lok ga tjlë ba kong ga «¿Eni ga pja Sbö Ware?»

«Lëmi löng pjäydë om go eni» le ba kong.

⁷¹ Kuya lok ga tjlë ëng kong ga «Lë shäng om go ba kjamo go. ¿Nopga wlëy ba rotë obi llëno?» le lok eni.

23

Jesús söraba Pilato bokshto

¹ E irgo ga löng eshko li kojono uunkong, ga Jesús söra lok, jek öötong löng Pilato bokshto.

² Eshko ga rote löng ara. Tjlë ga «Domer kjwe wlënorwa shäng oba shdök ara kjok kjwang jïkong. Oba pïya shäng kä potjwlëk pjlu kësbangyo sök Roma kjokyo li kong llëme le eni. Tjlë obi ga “No pjluyo ichara Sbörë shrono shäng li, e tja” le eni bakoe» le.

³ Eni ga Pilato tjlë ba kong ga «¿Judío pjluyo li pjare?»

«Ïlep sök om go liro» le ba kong.

⁴ Eni ga Pilato tjlë syöshtaga kägäyoga kong, nopga tjeng ara li kong ga «Domer ëre bor kong ga llëye owa shäryara ber shdungko wlo drete» le.

⁵ Gueniyo tjlë lok jek obi ga «Tjïökwo le shäng li go ga oba shdöya ara Judea kjokyo kjok kjwang jïkong. Soyara tek shäng Galilea kjokyo dwayo, era eni tjok ga shrono shäng jüshko bakoe» le.

Jesús söra Herodes bokshto

⁶ Kuya ga tjlë ba kong ga «¿Domer ëre Galilea sore?»

⁷ «Ëng» le lok ba kong. Eni ga ichara Pilatorë jek Herodes shwoy, e Galilea so pjluyo kjïshko. Ey dbaryo ga Herodes sök Jerusalén kjokyo.

⁸ Eni ga söra lok, jek öötong shäng ba bokshto ga Herodes beno wopjlú anmoyö. Jesús, e lanyotkëba ara li kura tek kjupäbäshko, ga ïya woydë, llëbo ïydëba llëm wleniyo pïya ba kong wlo.

⁹ E kjïshko ga kong llëbo kjakrokara ara, gueniyo dboryara llëme.

¹⁰ Syöshtaga kägäyoga, no pinggaga kjok ilgwekklo tara Moisésdë li go, e löng eshko bakoe. Ga rotara lok ara iir go.

11 Eshko ga joywara Herodesdë ara. Ba ëngkjwagaga omshäryono eni bakoe. Doyara lok shwong tjwlõ ara go, pjlu shwongyo dik, joywe lok wlo, ga ichara jek iröng obi Pilato shwoy.

12 Ey dbaryo ga Herodes, Pilato, e opyono beno löng wopjlu ëng tjok. Bäm go ga löng iirkë ëng tjok erä.

Jesús ichara Pilatorë, zröya lok wlo

13 E irgo ga nopga rokara Pilatorë uunkong tek ba shwoy, syöshtaga kägäyoga, no ichagaga, e tjok.

14 Töna löng pjir ga tjlä ba kong ga «Domer ëre söromi shäng bor bokshto, oba shdöya ara kjishko lämi. E kjishko ga llëbo kjakroror ba kong ara bomi bokshto, gueniyo rotëmi löng li, e bor kong ga llëye drete.

15 Herodes kong ga llëye dret bakoe. Ichara shrono shäng bi kong iröng obi e kjishko. Miydër pjlu ga llëye owa shäryara ber zrökko wlo drete.

16-17 E kjishko ga shdun. E irgo ga rayër toe» le.*

18 Kuya lok ga öö le lok uunkong, tjlä Pilato kong ga «jDomer kjwe zrözong! jBarrabäs döpdë borwa kong dey!» le.

19 (Domer le löng li, e bängzak shäng no shdüzlong uyo roshko. Dënashko ga ba pjlu, e woyde llëme. E kjishko ga ëng töno oblë tjok kjlöbö, ga ëngkjwono lok pjlu nopga tjok, ga nopga zröra lok. E kjishko ga bängzak shäng eshko.)

* **23:16-17** Tek dënashko ga kjibokwo ëre jyä shiraba oblë oblë ara. Ga kjone kjone tjlä ga «... le. Äär lu pjlobi go ga dbar shrëkkloshko ga nopga bängzak tjeng no shdüzlong uyo roshko li raye no ichagarë kjlara kjluwe.

²⁰ Jesús döya woydë Pilatorë, ga tjlëno nopga löng li kong jek obi.

²¹ Gueniyo öö le lok uunkong, tjlë ba kong ga «¡Zrös pjang kjlös go! ¡Zrös pjang kjlös go!» le lok eni.

²² Eni ga Pilato tjlëno ba kong jek pjlara obi, öötong pjloglo mya. Tjlë ga «¿Llë kjÿy? Llëbo owa shäryara li lozĩ bor kong. Llëye wlënor ba go owa ber zrökko wlo drete. E kjishko ga shdun. E irgo ga rayër toe» le.

²³⁻²⁴ Kuya ga öö le lok jek tjë jìkong, Jesús iche zröya lok pjang kjlös go wlo. Eni ga nopga löng li wlëpyotke Pilatorë ga ä kuzong ga wotjlino oblë, llëye woyde lok li shäryara ba kong eni.

²⁵ Eni ga domer bängzak shäng no shdüzlong uyo roshko lara lok li döra, ga Jesúsda twara ba ëngkjwagaga kong, llëye woydara nopgarë ba kong li shärye lok ba kong wlo.

Jesús zröraba pjang kjlös go

²⁶ Jesús söya lok jek zröya pjang kjlös go wlo wopro ga domer tek shäng kjlara ko Simón, e Cirene so. Tek shäng iröng ba kjokshko dwayo ga shara ëngkjwagaga jek löng lirë, ga ichara lok dbo go Jesús kjlös li sök ba irgo.

²⁷ Oba jëklöng ara ba irgo, tjrëko walëga löng ara, slar ara ba kjishko.

²⁸ İya Jesúsde bojono iröng, ga tjlë ba kong ga «Walëga Jerusalén so, pjäy slar bor kjishko llëme. Pjäy slar bomi kjishko dey, bomi wapga kjishko bakoe.

²⁹ Llono ga oba tjlë ga “Walëga kjrong, wapga llëm wleniyo, löng wopjlú li epga” lëba eni.

30 Ey dbaryo ga nopga tjlē dlup tjeng'li kong ga
 »“Pjāy'lon ter borwa kjing go,
 tjawa jek jēktēng ber dret wlo”† le eni.

31 ¿Shāryēba eni kjour kēsōng kong ga llēye wen kjour
 dogro'li kong?»‡ le.

32 Eshko ga domerga owa wleniyo sōra tjeng do
 pjök, zrōya lok Jesús tjok wlo.

33 Ga öötong löng kjokyo ko No Kä Dboglo
 dlupyoshko ga Jesús löra lok pjang kjlös go,
 domerga do pjök'li tjok, kjlara pjang or kēlē, kjlara
 pjang or milē, kjlösyo dboy dboye.

34 Eshko ga Jesús tjlē ga «Data, llē shāryayde
 miyde löng llēme. E kjishko ga llēbo owa shārye löng
 ère lös ba kong ber drete» le.

Eshko ga èngkjwagaga tjeng'li tjōto lok llēbo jyāglio
 go, Jesús shwong'li ber è kong ïya lok wlo. §

35 Nopga löng ara eshko ba ik. No ichagaga löng
 li omlāywono lok owa ara, tjlē ga «Oba oblēra dōra,
 eeri ga woyde ga opdök om go. Tjlēno ga no pjlyo
 ichara Sbörē shrono shäng'li e lara, e kjruga Sbörē
 om go lara eni bakoe. Lara eni li jlō wleni ga
 woyde ga opdök om go» le lok eni.

36 Èngkjwagaga löng li omjoywono lok bakoe.
 Kjillgwo bo dyo shpoä twara lok ba kong ie wlo,
 joywe lok wlo.

37 Ga tjlē lok ba kong ga «Pja judío pjlyo jlō
 wleni ga pja opdös om go» le.

† 23:30 Oseas 10.8. ‡ 23:31 *Kjour kēsōng* le li, e *Jesús* loklo. *Kjour dogro* le li, e *nopga owa* loklo. Eni ga Jesús shdunaba ara eni kuzong ga nopga owa ber shdungko kjang anmoyō. § 23:34 Löyde lok pjang kjlös go llēm obishko ga ba shwong skwara lok pjire.

38 Ga Jesús lök pjangshko li kopshko, kjibokwo iak pjang kwara, e zröya lok llë kjï miydëba wlo. Kjibokwo tak pjang li tjlë ga «Domer ëre, e judío pjluyo.»

39 Domerga owa wleniyo lök lok ba tjok kjlara omlâywono eni bakoe. Tjlë ga «¿No pjluyo ichara Sbörë shrono shäng li, e pja llëmdo? Pja opdös om go, ga tjawa dös eni bakoe» le.

40 Gueniyo kuya ba kjlara pjang lirë ga tjlë ba kong ga «¿Pja Sbö bangkjrë llëmdo? ¿Pja shdungoba ba tjok bek llëmdo?

41 Shjira llëbo owa shäryono jlökoyo, shji shdungoba wlo. Gueniyo domer kjwera, llëye owa shäryara llëme» le.

42 Eshko ga tjlë Jesús kong ga «Pja äär ber sök no pjluyoshko ga tja woyoshrëba» le.

43 Kuya ga tjlë ba kong ga «Lër bop kong jlökoyo ga eeri dö ga pja ber sök bor tjok kjok ko Paraíso* lishko» le.

Jesús wolono pjang kjlös go

44-45 Öötong dlo dluw bek ga kjok ro zoktong kjok kwang jïkong beno yët erä. Beno eni äär jong dlo pjö lë wleni. Eshko ga Sbö u roshko ga shwong kësbang iak pjang eshko li dwlëtong ter aas beno ktring pjök.

46 Ga Jesús tjlëno dbo go, tjlë ga «Data, bor sëya ëre iër ber tjeng bop wloshko» le, ga wolonoe.

47 Lök pjang kjlös go li bokshto ga ëngkwaga Roma so li kägäyo shäng eshko kjlara. Llëbo weno

* 23:43 Sbö sök kjok dogo li kjokyo kowëba **Paraíso**.

li ĩya ga Sbö poshrëra, ga tjlë ga «Shinmo lõk pjang kjlös go kjwe, e pjlo bek jlõe» le.

⁴⁸ ĩya nopga lõng eshko lirë ga to iröng ba ushko pjlu kjing shpok, woydë ara kjishko.

⁴⁹ Gueniyo nopga Jesús miydë pjlu wleniyo li beno tjeng llëbo tjeng kës ëre ĩk pjola sit, walëga tek tjeng Galilea kjokyo dwayo Jesús tjok li tjok.

Jesús doyo jnena José

⁵⁰⁻⁵¹ Eshko ga domer shäng kjlara ko José. E Arimatea so. E wotjlik pjlu, pjlo bek Sbö bokso. Sbö ber no pjluoyo dbaryo li koshe sök bakoe. Domer li Judío Kjøk Llgwegaga Këskësyo kjlarayo, gueniyo llëye shäryara lok Jesús kong li woydara llëm, ba kong ga beno bëy llëme.

⁵² Jesús wolono irgo ga domer li jek öötong shäng Pilato shwoy, ga Jesús doyo rokara ba kong, jneya wlo.

⁵³ E irgo ga jek öötong shäng shinmo lõk pjang kjlös go lishko. Eshko ga doyo li lona ter töshko, popgara shwong ko pjublún, pjlu wleniyo go, ga söra jek sakshko. Eshko ga iara beno buk pjlebgwo kak jong guëmkwota roshko. Eshko ga ëye iaydëba llëm obi.

⁵⁴ Dbar eshko ga poshäryozlång dbaryo li ey. Eshko ga woshtozlong dbaryo li dlöyo ääto, kjok sëng tjän.

⁵⁵ Walëga tek tjeng Galilea kjokyo dwayo Jesús tjok li jek lõng José irgo, ga shinmo doyo iara beno buk sakshko sorë li, e ĩna lok pjire.

⁵⁶ E irgo ga jek öötong lõng ushko, poshtikklo llë lõ pjleblë wleniyo, e shäryë, shinmo doyo poshtik e go wlo lara. Gueniyo shäryayde pjitë

llëm obishko ga woshtozlong dbaryo li öötonge. E kjïshko ga woshtono lok, tak pjang kjok lïgwekklo tara Moisésdë go sorë li eni.

24

Jesús woshrono iröng obi

¹ Öötong sondë kjok shröngto ga jek lok jongya sakshko, Jesús doyo iak buk lïshko. Poshtikklo shäryara li söya tjeng ba tjok.

² Öötong löng eshko ga ak kësband jong ba sak bängzakklo li wlëna lok dik beno jong pjlëbgwo li sor go.

³ Eni ga opzrëno jek pjlëbgwo li roy, gueniyo shinmo doyo drete.

⁴ Woyotjlïya löng obishko ga domerga weno tjeng do pjök, shwong kälä lletlet.

⁵ İya lok ga beno löng sëya llëm, ga kjök tono, kujono bokdo kjlay klung go. Eshko ga domerga li tjlë ba kong lok ga «¿Shäng së li wlëmi shinmo tjrëko llënoró?

⁶ Buk na llëme. Woshrara Sbörë iröng obi. Zröydëba llëm obishko ga llëye lara bomi kong Galilea kjokyo li woyoshrozïa. Tjlëno ga

⁷ “No to ter kjok dogo dwayo ëre iëba ber tjeng nopga owa wloshko guing, tja zröya lok pjang kjlôs go wlo. Gueniyo äär dbargwo mya ga tja woshre Sbörë iröng obi” lara bomi kong eni» le.

⁸ Kuya lok ga tjlökwo lara li woyoshrae.

⁹ Eni ga opshino lok eshko dwayo, ga jek öötong löng Jesús oppinggaga doglo sak kjwara kjingsho kjlara (11) li löngshko. Eshko ga llëbo ñna, kura kës li

lara lok pjir ba kong, ba pjeyoga llamo tjeng eshko ba tjok li kong bakoe.

¹⁰ Tjlökwo roy sögaga li, e María Magdala so, Juana, María Santiago mekë, walëga llamo oblë li bakoe.

¹¹ Kuya Jesús oppinggaga lirë lok ga tjlökwo kjre lok llëme. Wotjlik lok ga walëga li skwë kjoyoe le.

¹² Eni ëmdë ga Pedro jek zron jong sakshko. Öötong shäng eshko ga opzrëno jek ba roshko, ga shwong shinmo pjrikklo li ina beno buk eshko eröe. E irgo ga to iröng ushko, llëbo weno shinmo kong li woyotjliya jek shäng.

Jesús weno ba oppinggaga do pjök kong

¹³ E irgo ga Jesús oppinggaga do pjök jek jëk löng irbo jek jong äär Emaús kjokyo li bäng. Emaús kjokyo ber buk pjola, shji opshik jek jëk Jerusalén kjokyo dwayo kjok shröngto ga shji äär kjok eshko dlo dlw dik wleni.*

¹⁴⁻¹⁵ Jëk löng llëbo shäryono Jesús tjok li lanyotkë ëng tjok. E wopro ga Jesús tek shrono shäng ba zlong, ga jek jëk shäng ba tjok,

¹⁶ gueniyo e ë miydara lok jekdo llëm, woydara Sbörë eni llëm kjishko.

¹⁷ Eshko ga Jesús tjlä ba kong ga «¿Pjäy jek jëk löng llë lanyotkë ëng tjok?» le.

Kuya lok ga slongtëng löng, woydë ara.

¹⁸ Kjlara ko Cleofas tjlä ba kong ga «¿Kjakrokëp ega? Llëbo shäryono Jerusalén kjokyo tjaglën jä, e miydara nopga uunkongdë. U iğa llë ëmdë ga

* **24:13** Jerusalén kjokyo dwayo äär Emaús kjokyo wlo ga e wop kilómetro sak kjwara kjingsho kjwara (11) dik.

ommiydono lok pjire. ¿Eni ga pjara ommiydono llëm sorëro?»

19 «¿Llëbo shäryono eshko li llë?» le.

Kuya lok ga tjlë ba kong ga «Domer shäng kjlara ko Jesús, e Nazaret so. E Sbö tjlökwo laga, llëye shärye li, llëye le li, e dbo ara. Sbö kong ga tjwlö ara, nopga kong ga eni bakoe.

20 Gueniyo syöshtaga kägäyoga, bi tjlapgaga, e twara lok oba kong, zrökoba wlo, ga zröraba pjang kjlös go.

21 Tjawara wotjlino ga e shji Israel tjëyoga döga lororwa. Gueniyo shäryono eni eeri ga öötong dbargwo mya tjän.

22 »Eerishko kjok shröngto ga walëga jëk löng borwa tjok kjong kjong jek öör löng sakshko,

23 gueniyo shinmo li doyo wlëna llëme. Tek shrono lok iröng obi ga tjlë borwa kong ga “Sbö parkagaga kjok dogo so weno löng borwa kong yoshko wleni, ga tjlë ga ‘Jesús, e woshrara Sbörë iröng obi’ le lok borwa kong eni” le.

24 E irgo ga borwa pjeyoga kjong kjong jek öör löng sakshko bebi, ga llëbo wlëna lok, lara walëga lirë sorë li eni. Gueniyo Jesúsda ina lok llëme» le.

25 Kuya ga tjlë ba kong lok ga «¡Pjây kä kjange! ¿Pjây opping llonoro? ¿Tjlökwo lara Sbö tjlökwo lagagarë lok tek këgongshko kës li, e kjrëmi llonoro?

26 ¿No pjlyuo iche le Sbörë li, e shdungoba bäm go wlo, e irgo ga ie Sbörë ber tjwlö ara llëmdo?» le.

27 E irgo ga tjlökwo tak pjang ba kjishko Sbö tjlökwo go li, e pjllögwera ba kong pjire. Soyara Moisés kjibokwoyo li go, äär pjë jong Sbö tjlökwo

lagaga tek dēnashko so kjibokwoyo tjeng kēs li go bakoe.

²⁸ Ga jek lōng ääto kjok äär woydē lishkoshko ga Jesús jek jēk shāng obi, äär jek kēgong woydē wleni.

²⁹ Gueniyo mana lok ber sök ba tjok. Tjlē lok ba kong dbo go ga «Pja jek kēgong ame. Kjok sēng tjän, kjok ro zatoe. Pja ber sök borwa tjok kjok ēreshko dey» le. Kuya ga opzrēno jek shāng ba tjok, ber sök ba tjok eshko wloro lara lok.

³⁰ Eshko ga sirkeno sök ba tjok lok, iē wlo, ga pjlung shosho suk pjir kjrara kjwara, ga tjlē Sbō kong ga «Tjawa kong dli tworop ēre. Tjawa ber wopjlu bop tjok e kjīshko» le. E irgo ga pjlung shosho li tora, twara sira sira ba kong lok.

³¹ Jekdo eshko ga bokkwo roshwino wleni, e ē miydara lok pjir, gueniyo sök li jek jēktēng erä.

³² Eshko ga tjlē lok ēng kong ga «Shji tek jek lōng ba tjok irbo bāngshko ga Sbō tjlōkwo pjlołlgwera bi kong. ¿Eshkoshko ga shji wopjlu ara anmoyō llēmdo?» le.

³³ Jekdo eshko ga sano jek irōng Jerusalén kjokyo. Öötong lōng eshko ga Jesús oppinggaga doglo sak kjwara kjingsho kjlara (11) li wlēna tōno lōng eshko, nopga oblē tjok.

³⁴ Ga tjlē lok shrono lōng li kong ga «Tjlapga Jesús woshrono irōng obi jlōe. E weno shāng Simón kong tjän» le.

³⁵ Kuya lok ga llēbo weno ba kong irbo bāng li, e lara ba kong pjire. Pjlung shosho suk pjir torashko ga e ē miydara lok sorē li, e lara ba kong pjir bakoe.

Jesús weno ba oppinggaga doglo sak kjwara kjingsho kjlara (11) li kong

36 Ga lanyotke löng obi wopro ga Jesús weno shäng ba tjrëko, ga tjlë ba kong lok ga «Miga. Pjãý ber löng wlëpe» le.

37 İya, kuya lok ga beno löng sëya llëm, bangkjre lok ara. Wotjlik lok ga ba shingyo le.

38 Eni ga Jesús tjlë ba kong obi ga «¿Pjãý sëya llëm ega? ¿Tja woshrono iröng obi woyotjlïmi llëm ega?

39 ¡Tja li shängdo! Bor orkwo ère İzïa. Bor dre ère İzïa. Tja porwozïa. Bi shingyo, e sho dret, dboglo dret, botoyara tjok» le.

40 Lara eni ga ba orkwo bäng, ba dre bäng, e pina ba kong lok.

41 Kuya, İya lok ga tjlökwo kjrayde lok jlökoyo llëm obi, gueniyo beno löng wopjlú anmoyö, yèy le lok bakoe. Eshko ga tjlë ba kong lok ga «¿Pjãý jüşko llëbo uako tjokde?» le.

42 Kuya lok ga kong mã sho suk pjir wleniyo twara ba kong bok kjwara,

43 ga kjrara, uara ba bokshto.

44 Eshko ga tjlë ba kong lok ga «Tja shäng bomi tjok obishko ga tja tjlëno bomi kong ga “Tjlökwo tak pjang bor kjishko Moisés kjibokwoyo li go, Sbö tjlökwo lagaga tek dënashko so kjibokwoyo tjeng kës li go, kjibokwo ko *Salmos* go, e shäryë uunkong kjluwe” loror bomi kong eni» le.

45 Eshko ga epga kjimtara Sbö tjlökwo tak pjang li llë loklo miydë pjlúe.

46 Tjlë ba kong ga «Tjlökwo tak pjang li tjlë eni: “No pjluyo iche le Sbörë li, e wolon wlo. Gueniyo äär dbargwo mya ga woshre Sbörë iröng obi.”

47 Tjlökwo tak pjang obi tjlë eni: “Ba ko goshko ga tjlökwo lëba tjëyo kjrina kjrina löng kjok ère kjing go

li kong. Tjłkwo lēba li ěre: ‘Llēbo shāryĕy lōng owa li, e owa jlōe lĕy, ga rayĕy ga owa pjang bi go li lōya Sbōrĕ ber drete.’”

⁴⁸ Pjāy beno lōng llēbo ĩnomi, kuromi li roy laga oba kong.

⁴⁹ Ga bomi go Sbō Sĕya ichĕr kjok dogo dwayo āār ber kĕsbang bomi tjok, lara bor Datarĕ jlōkoyo sorĕ li eni. Gueniyo pjāy ber lōng ěreshko Jerusalĕn kjokyo, ěye lĕr shāng bomi kong li shrono guing» le.

Jesús to jem kjok dogo

⁵⁰ E irgo ga epga sōra jek Jerusalĕn kjokyo dwayo, ōōtong lōng Betania kjokyo. Eshko ga orkwo poyono, ga tjłkwo lara beno pjłú ba kong lok.

⁵¹ Shāng tjłĕ obishko ga opkjono eshko dwayo, ga sōra Sbōrĕ to jem kjok dogo.

⁵² E irgo ga poshrĕra lok ara, ga sano to tek lōng wopjłú irōng Jerusalĕn kjokyo.

⁵³ Eshko ga beno lōng Sbō poshrĕk, ba u zlong bāng enido.

**Sbö Tjłõ^{kwo}
New Testament and Shorter Old Testament in Teribe
(PM:tfr:Teribe)**

copyright © 2008 Wycliffe Bible Translators, Inc.

Language: Teribe

Translation by: Wycliffe Bible Translators, Inc.

Teribe [tfr], Panama

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Teribe

© 2008, 2007, Wycliffe Bible Translators, Inc.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

cxl

2014-04-30

PDF generated using Haiola and XeLaTeX on 18 Mar 2025 from source files
dated 29 Jan 2022

539cf8e3-01bf-5f34-8833-610f18367f8c